



2) „vatreno oružje” je svako prijenosno cijevno oružje koje ispaljuje, služi za ispaljivanje ili se može prepraviti za ispaljivanje sačme, zrna ili projektila djelovanjem zapaljivog potisnog sredstva, osim predmeta koji su izrađeni za uzbunjivanje, signaliziranje, spašavanje života, ubijanje životinja, lov harpunom ili u industrijske ili tehničke svrhe, pod uvjetom da se mogu upotrebljavati samo u navedene svrhe i ako se smatraju starim oružjem, s tim da se ne odnose na kategorije iz člana 6. ovog zakona. Smatra se da je neki predmet sposoban za prepravljivanje kako bi ispaljivao sačmu, zrno ili projektil djelovanjem zapaljivog potisnog sredstva, ako ima izgled vatrenog oružja i ako ga je moguće prepraviti zbog njegove konstrukcije ili materijala od kojeg je izgrađen;

3) „bitan dio” znači cijev, kućište, uvodnik metaka, uključujući i gornji i donji uvodnik, ako je primjenjivo, vodilica, cilindar, zatvarač ili nosač zatvarača koji su, s obzirom na to da su odvojeni predmeti, uključeni u kategoriju vatrenog oružja na koje su postavljeni ili na koje se namjeravaju postaviti;

4) „oružje za ličnu zaštitu” čine pištolji i revolveri kalibra 4,8 mm i veći;

5) „kratko vatreno oružje” je oružje čija cijev nije duža od 30 cm ili čija ukupna dužina oružja ne prelazi 60 cm;

6) „dugo vatreno oružje” je svako vatreno oružje osim kratkog vatrenog oružja;

7) „lovačko oružje” je vatreno oružje kategorije B sa kojim se smije loviti divljač u skladu s propisima o lovstvu;

8) „sportsko oružje” je dugo vatreno oružje glatkih cijevi do kalibra 12, olučenih cijevi do kalibra 12,7 mm, odnosno 0,50 inča, kratko vatreno oružje do kalibra 11,43 mm, odnosno 0,45 inča, pištolji i revolveri velikog kalibra podešeni za sportske svrhe, malokalibarske puške i malokalibarski pištolji i revolveri kalibra 5,6 mm sa ivičnim paljenjem sa

olučenim (užlijebljenim) ili neolučenim (glatkim) cijevima, vazdušne puške, vazdušni pištolji, revolveri, oružje sa tetivom, kao i drugo oružje koje se koristi u sportskim disciplinama u skladu s propisima o sportu;

9) „vatreno oružje s jednostrukim okidanjem” je vatreno oružje koje nema spremnik koje se prije svakog hica puni ručnim ubacivanjem naboja u komoru ili u nišu za punjenje na poklopcu cijevi;

10) „automatsko vatreno oružje” je svako vatreno oružje koje se nakon hica automatski napuni i koje može ispaliti više od jednog naboja jednokratnim pritiskanjem obarača;

11) „poluautomatsko vatreno oružje” je oružje koje je nakon ispaljivanja svakog metka ponovo pripravno za ispaljivanje i kod kojeg je iz cijevi jednokratnim pritiskanjem obarača moguće ispaljivati samo po jedno zrno;

12) „vatreno oružje s repetirajućim mehanizmom” je oružje kod kojeg je nakon ispaljivanja svakog metka potrebno ručno preko mehanizma ubaciti zrno u cijev;

13) „kombinovano oružje” je oružje sa dvije ili više olučenih (užlijebljenih) i neolučenih (glatkih) cijevi različitog kalibra;

14) „trofejno oružje” je vatreno, vazdušno i hladno oružje koje se čuva kao uspomena i predstavlja ličnu ili porodičnu uspomenu, a koje je trajno onesposobljeno za upotrebu;

15) „staro oružje” je oružje koje je proizvedeno prije 1895. godine i/ili oružje koje se puni sa usta cijevi crnim barutom i koje se pali kremenom, fitiljem ili kapislom i koje predstavlja kulturno nasljeđe ili ima istorijsku vrijednost i nije više u upotrebi;

16) „onesposobljeno vatreno oružje” je vatreno oružje koje je trajno onesposobljeno za upotrebu, osiguravajući da su svi bitni dijelovi dotičnog vatrenog oružja postali trajno neupotrebljivi i da ih nije moguće ukloniti, zamijeniti ili modificirati kako bi se

vatreno oružje na bilo koji način ponovo osposobilo;

17) „vazdušno oružje” su sve vrste pušaka, pištolja, revolvera i druge naprave koje pod pritiskom vazduha, opruge ili ugljen dioksida izbacuju metalne kuglice ili druge projekte;

18) „airsoft i paintball naprave” su puške i pištolji, odnosno sportski rekviziti namijenjeni izbacivanju plastičnih, gumenih ili želatinoznih projektila na isti način kao i vazdušno oružje, s tim da mogu imati veći kalibar od vazdušnog oružja i mogu raditi u automatskom režimu i da je energija projektila manja od energije vazdušnog oružja;

19) „gasno/plinsko oružje” su puške, pištolji i revolveri i druge naprave koje pod pritiskom barutnog ili sabijenog gasa/plina raspršuju nadražljive tvari za onesposobljavanje pojedinca koje na ljudsko zdravlje imaju kratkotrajan učinak;

20) „oružje za uzbunjivanje i signalizaciju” su naprave s ležištem municije namijenjene samo za ispaljivanje municije bez projektila izazivanjem glasnog pucnja, neškodljivih nadražujućih tvari (kloracetofenon, ortoklorbenzen – malon - dinitril i oleoresin capsicum), drugih aktivnih tvari ili pirotehničke municije za signalizaciju (svijetleće signalne rakete), te koje se ne mogu prepraviti za ispaljivanje sačme, zrna ili projektila djelovanjem zapaljivog potisnog sredstva;

21) „konvertibilno oružje” je gasno, startno i signalno oružje, kao i svako drugo oružje koje ima cijev i izgledom podsjeća na vatreno oružje i koje se, s obzirom na konstrukciju i materijal od koga je napravljeno, može prepraviti tako da ispaljuje bojevu municiju;

22) „hladno oružje” je oružje koje ne uključuje vatru ili eksploziju kao rezultat upotrebe baruta ili drugih eksplozivnih materija. U hladno oružje spada oružje na daljinu i ručno borbena oružja za blizak

kontakt. Oružje na daljinu jeste svako oružje koje može da djeluje na mete van udaljenosti prsa u prsa, odnosno na rastojanjima većim od fizičkog dometa samog oružja. Pod oružjem na daljinu se smatra oružje s tetivom u koje spadaju lukovi, samostreli i druge naprave koje snagom napete tetive ili druge elastične materije potiskuju strijelu ili drugi projektil. Ručno borbena oružja su ručno oružje ili oružja za blizak kontakt ili bilo koje oružje koje se koristi u direktnoj borbi prsa u prsa;

23) „paradno i akustično oružje” je vatreno oružje koje je posebno prepravljeno za isključivu upotrebu ispaljivanja municije bez projektila, za upotrebu u pozorišnim predstavama, fotografiranju, filmskom i televizijskom snimanju, rekonstrukciji istorijskih događaja, povorkama, sportskim događajima i obuci;

24) „reprodukcije oružja” je oružje izrađeno da izgleda kao neko specifično oružje, a koje može i funkcionisati kao oružje;

25) „dekorativno oružje (imitacije oružja)” su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje;

26) „registrovano oružje” je oružje za koje je izdata odgovarajuća isprava o oružju.

#### b) municija

1) „municija” su meci kao cjelina ili njegovi sastavni dijelovi, uključujući čahure, inicijalne kapisle, potisno punjenje, zrna ili projektili koji se koriste u vatrenom oružju, a koja se nabavlja na osnovu važeće isprave o oružju;

2) „lažna municija” je municija koja ne sadrži inicijalnu kapislu, barutno ili eksplozivno punjenje;

3) „municija s probojnim učinkom” je municija za vojnu upotrebu pri čemu je projektil presvučen košuljicom i ima čvrstu probojnu jezgru;

4) „municija s eksplozivnim projektilima” je vojna municija koja sadrži punjenje koje eksplodira prilikom udara;

5) „municija sa zapaljivim projektilima” je vojna municija kod kojeg projektil sadrži hemijsku smjesu koja se zapali prilikom dodira sa zrakom ili prilikom udara;

6) “projektil” je sastavni dio metka.

c) isprave o oružju

1) „odobrenje za nabavljanje i posjedovanje vatrenog oružja” je isprava o oružju na osnovu koje fizička i pravna lica mogu nabaviti i posjedovati vatreno oružje;

2) „odobrenje za držanje vatrenog oružja” je isprava o oružju koja se izdaje pravnom licu za držanje vatrenog oružja;

3) “oružni list” je isprava o oružju na osnovu koje se drži, odnosno drži i nosi oružje u skladu sa ovim zakonom i sadrži podatke o oružju (vrstu, marku, model, kalibar, serijski broj vatrenog oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku, ako je drugačija od oznake na kućištu ili uvodniku metaka vatrenog oružja) i podatke o vlasniku oružja (ime i prezime, datum i mjesto rođenja, država rođenja, jedinstveni matični broj i adresa stanovanja);

4) „dozvola za nošenje vatrenog oružja” je isprava na osnovu koje fizičko lice ima pravo nošenja pištolja, odnosno revolvera registrovanog za ličnu sigurnost kategorije B;

5) „odobrenje za sakupljanje i držanje starog oružja” je isprava o oružju koja omogućava fizičkom i pravnom licu sakupljanje i držanje starog oružja bez prava nošenja;

6) „kolekcionarska dozvola” je isprava za sakupljanje i držanje starog oružja koja se izdaje fizičkom i pravnom licu (kolekcionaru) koje posjeduje više od deset komada različitog registrovanog oružja, bez prava nošenja;

7) „potvrda o prijavi oružja” je isprava koju izdaje nadležna policijska stanica za oružje kategorije C;

8) „uvjerenje o ispunjavanju uvjeta za neposredno rukovanje oružjem i municijom” je isprava o oružju koja se radi obavljanja djelatnosti izdaje fizičkom, odnosno odgovornom licu u pravnom licu ili fizičkom licu radi obavljanja poslova zaštite i čuvanja, kao i drugim fizičkim licima koji neposredno rukuju sa oružjem i municijom;

9) „potvrda za nošenje oružja i municije” je isprava koja se izdaje članu streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta;

10) „potvrda za prenošenje oružja i municije” je isprava koja se izdaje članu streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta, u svrhu prenošenja oružja i municije.

d) subjekti

1) „vlasnik oružja” je fizičko ili pravno lice kome je izdata odgovarajuća isprava o oružju;

2) „trgovac oružjem” je pravno lice ili fizičko lice registrirano za obavljanje djelatnosti čija se trgovina ili poslovanje sastoji u cjelini ili djelimično od trgovine, razmjene, popravke, modifikacije ili prepravljavanja vatrenog oružja ili bitnih dijelova ili trgovine, razmjene, modifikacije ili prepravljavanja municije;

3) „posrednik” je svako fizičko ili pravno lice, koje nije trgovac oružjem, čija se trgovina ili poslovanje sastoji u cjelini ili djelimično od pregovaranja ili ugovaranja transakcija za kupovinu ili prodaju vatrenog oružja, bitnih dijelova ili municije ili opskrbu njima;

4) „kolekcionar” je svako fizičko ili pravno lice posvećeno prikupljanju i očuvanju vatrenog oružja, bitnih dijelova ili municije u

historijske, kulturne, znanstvene, tehničke i obrazovne svrhe ili svrhe očuvanja nasljeđa;

5) „čuvari” su fizička lica koja su u skladu sa Zakonom o agencijama i unutrašnjim službama za zaštitu ljudi i imovine („Službene novine Federacije Bosne i Hercegovine“, broj: 78/08 i 67/13), ( - u daljem tekstu: Zakon o agencijama i unutrašnjim službama za zaštitu ljudi i imovine) u radnom odnosu u agencijama za zaštitu ljudi i imovine ili u pravnim licima koja su organizirala vlastitu unutrašnju službu i koji su angažirani na poslovima fizičke zaštite ljudi i imovine;

6) „lovočuvari” su fizička lica koja u lovočuvarskoj službi u skladu sa Zakonom o lovstvu („Službene novine Federacije Bosne i Hercegovine“, broj: 4/06, 8/10 i 81/14), ( - u daljem tekstu: Zakon o lovstvu), obavljaju poslove zaštite i čuvanja lovišta;

7) „čuvari šuma” su fizička lica koja u čuvarskoj službi u skladu sa Zakonom o šumama („Službeni glasnik Unsko-sanskog kantona“, broj: 22/12, 16/16, 2/17, 25/17 i 4/19), ( - u daljem tekstu: Zakon o šumama), obavljaju poslove zaštite i čuvanja šuma i šumskih zemljišta.

e) radnje

1) „registracija oružja” je unos podataka o oružju (vrstu, marku, model, kalibar, serijski broj vatrenog oružja i oznaku na njegovom kućištu ili uvodniku metaka), unos podataka o bitnim dijelovima (serijski broj ili jedinstvenu oznaku, ako je drugačija od oznake na kućištu ili uvodniku metaka vatrenog oružja) i unos podataka o vlasniku oružja (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa stanovanja) u službene evidencije propisane ovim zakonom, kao i propisima donijetim na osnovu ovog zakona, uz izdavanje odgovarajuće isprave o oružju;

2) „držanje oružja” je radnja koja podrazumijeva držanje i posjedovanje oružja

na osnovu oružnog lista ili odobrenja za držanje oružja;

3) „nošenje oružja” je radnja koja podrazumijeva nošenje oružja na osnovu odgovarajuće isprave o oružju;

4) „prenošenje vatrenog oružja” je radnja koja podrazumijeva da se oružje koje se drži na osnovu odobrenja ili odgovarajuće isprave o oružju, uz prethodnu prijavu nadležnoj policijskoj stanici, može prenositi u slučaju promjene prebivališta ili boravišta fizičkog lica, odnosno promjene sjedišta pravnog lica, popravke, modifikacije ili prepravke oružja, smrti vlasnika, odnosno korisnika oružja, odlaska u lov, na sportsko takmičenje, na strelište ili u drugim opravdanim slučajevima;

5) „popravljanje oružja” je otklanjanje kvarova na oružju, zamjena ili ugradnja originalnih dijelova;

6) „modifikacija ili prepravljavanje oružja” je prilagođavanje oružja drugoj municiji ili svojoj prvobitnoj svrsi, zamjena ili ugradnja bitnih dijelova i drugi zahvati na oružju kojima se utiče na njegovo funkcionisanje ili na tehnička svojstva;

7) „dobrovoljna predaja oružja, bitnih dijelova i municije” podrazumijeva jasnu i nedvojbenu izjavu vlasnika ili nekog drugog lica koje ima opravdan interes, da oružje, bitne dijelove i municiju dobrovoljno predaje nadležnoj policijskoj stanici.

f) ostalo

1) „civilno strelište” je otvoreni ili zatvoreni objekat (streljana) koji može biti i vojno strelište dopušteno za civilnu upotrebu ili drugo službeno strelište, namijenjen sportsko-rekreativnom gađanju i edukaciji, koji ispunjava tehničke i sigurnosne uvjete za upotrebu registrovanog ili prijavljenog oružja;

2) „muzej” je stalna institucija u službi društva i njegovog razvoja, otvorena javnosti, u kojoj se nabavlja, čuva, istražuje i izlaže

vatreno oružje, bitni dijelovi ili municija u istorijske, kulturne, znanstvene, tehničke i obrazovne svrhe, te svrhe očuvanja nasljeđa ili rekreativne svrhe;

3) „električni paralizator (elektrošoker)” je ručna naprava koja pomoću visokog električnog napona privremeno onesposobljava lice;

4) „sprej za omamljivanje” je naprava namijenjena civilnom tržištu, koja sadrži i prilikom upotrebe raspršuje nadražujuća hemijska jedinjenja u koncentracijama dozvoljenim po prihvaćenim međunarodnim standardima;

5) „optički nišan” je naprava kojom se oružju povećava preciznost;

6) „minsko-eksplozivna sredstva” su sve vrste bombi, mina, granata i drugih naprava opremljenih s eksplozivnom materijom ili detonatorom, (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja;

7) „mužari-prangije” su ručne ili samostojeće naprave namijenjene za izazivanje glasnog pucnja, koje su konstruisane tako da ne mogu primiti cjeloviti naboj, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine;

8) „posebna oprema za vatreno oružje” je svaki mehanizam namijenjen kao dodatak za osnovni model oružja, čijom primjenom se mijenjaju mogućnosti kod upotrebe oružja, osim optičkog nišana;

9) „ispitavanje vatrenog oružja” je provjeravanje ispravnosti funkcionisanja oružja i ispravnosti pojedinih dijelova vatrenog oružja, te kontrola izdržljivosti cijevi i drugih odgovarajućih dijelova pod određenim pritiskom;

10) „obilježavanje žigom vatrenog oružja” je utiskivanje propisanih žigova na određene dijelove vatrenog oružja za koje je ispitivanjem utvrđena ispravnost;

11) “tehnički pregled vatrenog oružja” je pregled koji se obavlja radi provjere tehničke ispravnosti oružja;

12) „mehanički trag vatrenog oružja” je trag koji nastaje upotrebom vatrenog oružja i koji dijelovi vatrenog oružja kao što su čelo zatvarača, izvlakač, izbacivač, udarna igla, polja i žljebovi cijevi ostavljaju na zrnu i čahuri metka ispaljenog iz vatrenog oružja;

13) „amnestija lica” je oslobađanje od odgovornosti za nelegalno posjedovanje oružja kategorije B, prilikom dobrovoljne predaje istog;

14) „legalizacija oružja” je postupak registracije neregistrovanog oružja kategorije B koje je lice posjedovalo bez odobrenja za nabavljanje oružja, a za koje nije potrebno dokazivati porijeklo oružja.

### **Član 3. (Primjena)**

(1) Fizička i pravna lica mogu nabavljati i posjedovati oružje, bitne dijelove i municiju samo po odredbama ovog zakona.

(2) Odredbe ovog zakona primjenjuju se i na strane državljane sa stalnim boravkom ili privremenim boravkom dužim od jedne godine. Privremeni boravak duži od jedne godine podrazumijeva kontinuirano produženje privremenog boravka po istom osnovu po kojem je stranom državljanu odobren privremeni boravak čije produženje traži.

(3) Prenosnje oružja, bitnih dijelova i municije preko državne granice Bosne i Hercegovine vrši se u skladu sa odredbama Zakona o graničnoj kontroli („Službeni glasnik Bosne i Hercegovine”, broj: 53/09, 54/10 i 47/14).

(4) Lica sa područja drugog entiteta, kantona ili Brčko Distrikta Bosne i Hercegovine imaju pravo nošenja oružja na području Unsko-sanskog kantona uz odgovarajuću važeću ispravu za to oružje izdatu od strane nadležnog organa.

(5) Kretanje oružja, bitnih dijelova i municije vrši se u skladu sa Zakonom o kontroli kretanja oružja i vojne opreme („Službeni glasnik Bosne i Hercegovine”, broj: 53/09 i 22/16).

#### **Član 4.**

##### **(Izuzeci od primjene Zakona)**

(1) Odredbe ovog zakona ne odnose se na oružje i municiju za potrebe Oružanih snaga Bosne i Hercegovine, policijskih organa, sudske policije, kazneno popravni ustanova, Obavještajno - sigurnosne agencije Bosne i Hercegovine i na druge državne organe kada nabavljaju, drže i nose oružje i municiju po posebnim propisima.

(2) U smislu ovog zakona ne smatra se oružjem:

a) mužari, prangije i drugi predmeti koji su izrađeni za spašavanje života, ubijanje životinja ili u industrijske ili tehničke svrhe, pod uvjetom da se mogu upotrebljavati samo u navedene svrhe;

b) oružje za uzbunjivanje i signalizaciju;

c) dekorativno oružje (imitacije oružja);

d) električni paralizator (elektrošoker);

e) sprej za omamljivanje;

f) municija za vazdušno oružje;

g) lažna municija.

#### **Član 5.**

##### **(Primjena Zakona o upravnom postupku)**

(1) Na sva pitanja postupka koja nisu uređena ovim zakonom primjenjuju se odredbe Zakona o upravnom postupku („Službene

novine Federacije Bosne i Hercegovine”, broj: 2/98 i 48/99).

(2) U slučajevima kada vlasnik oružja ne obavijesti nadležnu policijsku stanicu o promjeni adrese ili ga na adresi na kojoj je prijavljen nije moguće pronaći ili odbija prijem pismena i u svim drugim slučajevima u kojima nije moguće uručenje, dostavljanje pismena vrši se putem oglasne ploče nadležne organizacione jedinice Uprave policije Ministarstva unutrašnjih poslova u kojoj se vodi postupak.

(3) Dostavljanje se smatra izvršenim poslije isteka 15 dana od dana stavljanja pismena na oglasnu ploču.

(4) O izdavanju svih odobrenja donesenih na osnovu ovog zakona odlučuje se rješenjem.

(5) Protiv rješenja donesenih na osnovu ovog zakona može se izjaviti žalba Ministarstvu unutrašnjih poslova u roku od 15 dana od dana prijema rješenja.

## **DIO DRUGI - ORUŽJE I MUNICIJA**

### **POGLAVLJE I. KATEGORIZACIJA ORUŽJA**

#### **Član 6.**

##### **(Kategorizacija oružja)**

Oružje se prema odredbama ovog zakona razvrstava u tri kategorije:

a) kategorija A - zabranjeno oružje:

1) minsko-eksplozivna sredstva i dijelovi;

2) eksplozivni vojni projektili i bacači;

3) automatsko vatreno oružje;

4) vatreno oružje koje je skriveno u drugim predmetima;

5) municija s probojnim, eksplozivnim ili zapaljivim projektilima, te projektili za takvu municiju;

6) municija za pištolje i revolvere koja ima ekspanzijski učinak, te meci za takvu municiju, osim municije za lov ili sportsko oružje za lica kojima je dozvoljeno koristiti ga;

7) sve vrste oružja s integralnim prigušivačima, prigušivači namijenjeni oružju i dijelovi za prigušivače;

8) automatsko vatreno oružje koje je prepravljeno u poluautomatsko vatreno oružje;

9) bilo koje od slijedećeg poluautomatskog vatrenog oružja sa središnjom udarnom iglom:

- kratko vatreno oružje koje omogućuje ispaljivanje više od 21 naboja bez ponovnog punjenja ako je spremnik kapaciteta većeg od 20 naboja dio tog vatrenog oružja ili se u njega umeće odvojivi spremnik kapaciteta većeg od 20 naboja,

- dugo vatreno oružje koje omogućuje ispaljivanje više od 11 naboja bez ponovnog punjenja ako je spremnik kapaciteta većeg od 10 naboja dio vatrenog oružja ili se u njega umeće odvojivi spremnik kapaciteta većeg od 10 naboja;

10) poluautomatsko dugo vatreno oružje koje se može smanjiti na dužinu manju od 60 cm, a da ne izgubi svoju funkciju i to sklopivim ili teleskopskim nastavkom ili nastavkom koji se može ukloniti bez upotrebe alata;

11) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje;

12) posebna oprema za vatreno oružje.

b) kategorija B – oružje za koje je potrebno odobrenje:

1) repetirajuće kratko vatreno oružje;

2) jednostrijelno kratkocijevno vatreno oružje sa središnjom udarnom iglom;

3) jednostrijelno kratkocijevno vatreno oružje s rubnim paljenjem, ukupne dužine do 28 cm;

4) poluautomatsko dugocijevno vatreno oružje kod kojeg spremnik i ležište naboja zajedno primaju više od 3 naboja, u slučaju vatrenog oružja s rubnim paljenjem, odnosno više od 3, ali manje od 12 naboja, u slučaju vatrenog oružja sa središnjom udarnom iglom;

5) poluautomatsko kratkocijevno vatreno oružje, osim onog navedenog u tački a) podtačka (9) kategorije A ovog člana;

6) poluautomatsko dugocijevno vatreno oružje navedeno u tački a) podtačka (9) kategorije A ovog člana, kod kojeg spremnik i ležište naboja ne mogu zajedno primiti više od 3 naboja, pri čemu se spremnik može odvojiti, odnosno nije sigurno da se uobičajenim alatom ne može prepraviti u oružje kod kojeg spremnik i ležište naboja zajedno primaju više od 3 naboja;

7) repetirajuće i poluautomatsko dugocijevno vatreno oružje sa glatkom cijevi ukupne dužine do 60 cm;

8) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje;

9) poluautomatsko vatreno oružje za civilnu upotrebu koje je slično oružju sa automatskim mehanizmom, osim onog navedenog u tački a) podtačka (8), (9) i (10) kategorije A ovog člana.

c) kategorija C – oružje koje je potrebno prijaviti:

1) repetirajuće dugocijevno vatreno oružje, osim onog navedenog u tački b) podtačka 7) kategorije B;



- 2) dugocijevno oružje s jednom ili više jednostrijelnih olučenih (užlijebljenih) cijevi;
- 3) poluautomatsko dugocijevno vatreno oružje, osim onog navedenog u kategoriji A ili B;
- 4) jednostrijelno kratkocijevno oružje s rubnim paljenjem ukupne dužine najmanje 28 cm;
- 5) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju, a koje se mogu prepraviti za ispaljivanje sačme, zrna ili projektila djelovanjem zapaljivog potisnog sredstva ili u paradno ili akustično oružje;
- 6) trofejno oružje i drugo vatreno oružje razvrstano u kategoriju B, koje je onesposobljeno u skladu sa pravilnikom o onesposobljavanju oružja;
- 7) dugo vatreno oružje s jednostrukim okidanjem i neolučenim (glatkim) cijevima;
- 8) vazdušno oružje;
- 9) gasno oružje;
- 10) airsoft i paintball naprave;
- 11) reprodukcije oružja.

### **Član 7. (Ograničenja)**

- (1) Zabranjeno je nabavljanje, posjedovanje, držanje ili nošenje, trgovina, pregovaranje ili ugovaranje transakcija za kupovinu ili prodaju vatrenog oružja, bitnih dijelova i municije ili opskrba njima ili dogovaranje transfera vatrenog oružja, bitnih dijelova i municije kategorije A, osim ako ovim zakonom nije drugačije propisano.
- (2) Nabavljanje i posjedovanje poluautomatskog vatrenog oružja sa središnjom udarnom iglom iz člana 6. stav (1)

tačka a) kategorije A podtačka 9) može se odobriti sportskim strijelcima ako:

- a) ispunjavaju uvjete iz člana 9. ovog zakona;
- b) aktivno vježbaju za sudjelovanje u streljačkim takmičenjima koje priznaje službeno priznata sportska streljačka organizacija ili međunarodni i službeno priznati sportski streljački savez;
- c) posjeduju potvrdu službeno priznate sportske streljačke organizacije u kojoj je navedeno da je sportski strijelac član streljačkog kluba i da se redovno, najmanje 12 mjeseci bavi streljaštvom u tom klubu i da vatreno oružje ispunjava tražene specifikacije za streljačku disciplinu koju priznaje međunarodni i službeno priznati sportski streljački savez.

(3) Zabranjeno je nabavljanje, posjedovanje, držanje i trgovina hladnog oružja kojem je osnovna namjena napad ili nanošenje ozljeda, te nošenje takvog hladnog oružja na javnom mjestu, osim u svrhu sportskog takmičenja.

(4) Zabranjeno je nabavljanje, posjedovanje, držanje i trgovina podvodnih pušaka i drugih predmeta, koji snagom opruge, napete gume ili sabijenog plina izbacuju osti ili harpun i koji su isključivo namijenjeni ribolovu.

(5) Zabranjeno je nabavljanje, posjedovanje, držanje ili nošenje oružja i bitnih dijelova kategorije B bez odgovarajuće isprave o oružju.

(6) Oružje kategorije C nabavlja se u slobodnoj prodaji, a drži se ili nosi na osnovu izdate potvrde o prijavi oružja.

(7) Oružje kategorije C može nabavljati, držati ili nositi lice koje je navršilo 21 godinu života.

(8) Naprave s ležištem municije oblikovane tako da mogu ispaljivati samo municiju bez projektila, neškodljive nadražujuće tvari, druge aktivne tvari ili pirotehničko signalnu municiju (oružje za uzbuđivanje i

signalizaciju) ne mogu se prepraviti za ispaljivanje sačme, zrna ili projektila djelovanjem zapaljivog potisnog sredstva.

(9) Zabranjeno je popravljavanje, modifikacija ili prepravljavanje vazdušnog, gasnog, airsoft i paintball naprava i reprodukcije oružja, za ispaljivanje bojeve municije, kao i svakog drugog oružja, osim onog navedenog u članu 58. ovog zakona.

## **POGLAVLJE II. NABAVLJANJE ORUŽJA, BITNIH DIJELOVA I MUNICIJE**

### **Član 8. (Podnošenje i postupak rješavanja zahtjeva)**

(1) Zahtjev za izdavanje odobrenja za nabavljanje i posjedovanje vatrenog oružja i bitnih dijelova za fizička i pravna lica, zahtjev za nošenje vatrenog oružja, zahtjev za izdavanje uvjerenja o ispunjavanju uvjeta za neposredno rukovanje oružjem i municijom, zahtjev za izdavanje odobrenja za spravljanje municije, zahtjev za izdavanje odobrenja za nabavljanje eksplozivnih materija u svrhu spravljanja municije, zahtjev za izdavanje odobrenja za sakupljanje i držanje starog oružja, zahtjev za izdavanje odobrenja za nabavljanje oružja, bitnih dijelova i municije radi prodaje i zahtjev za izdavanje odobrenja za nabavljanje oružja za potrebe civilnog strelišta podnosi se na propisanom obrascu policijskoj upravi Uprave policije Ministarstva unutrašnjih poslova prema mjestu prebivališta, odnosno sjedišta podnosioca zahtjeva (- u daljem tekstu nadležna policijska uprava).

(2) Zahtjev za izdavanje i zamjenu oružnog lista, odobrenja za držanje vatrenog oružja, dozvole za nošenje vatrenog oružja i prijava za posjedovanje oružja kategorije C podnosi se na propisanom obrascu policijskoj stanici policijske uprave Uprave policije Ministarstva unutrašnjih poslova prema mjestu prebivališta, odnosno sjedišta podnosioca

zahtjeva (- u daljem tekstu nadležna policijska stanica).

(3) Zahtjev za izdavanje odobrenja za provođenje obuke u rukovanju oružjem, odobrenja za obavljanje djelatnosti (trgovina, popravljavanje, modifikacija ili prepravljavanje i onesposobljavanje oružja) i odobrenja za osnivanje civilnih strelišta podnosi se Upravi policije Ministarstva unutrašnjih poslova (- u daljem tekstu Uprava policije).

(4) Obrazac zahtjeva iz stava (1), (2) i (3) ovog člana, kao i svih drugih zahtjeva vezanih za izdavanje isprava o oružju, te izgled i sadržaj obrazaca isprava o oružju i drugih dokumenata propisat će se pravilnikom koji donosi ministar Ministarstva unutrašnjih poslova (- u daljem tekstu ministar) na prijedlog policijskog komesara Uprave policije Ministarstva unutrašnjih poslova (- u daljem tekstu policijski komesar).

(5) Postupak rješavanja zahtjeva za izdavanje odobrenja za nabavljanje i posjedovanje oružja, izdavanje i zamjena isprava o oružju, kao i postupak izdavanja potvrda, obavještenja i drugih dokumenata, utvrdit će se pravilnikom koji donosi ministar na prijedlog policijskog komesara.

(6) Postupak rješavanja zahtjeva za provođenje obuke u rukovanju oružjem, odobrenja za obavljanje djelatnosti (trgovina, popravljavanje, modifikacija ili prepravljavanje i onesposobljavanje oružja) i odobrenja za osnivanje civilnih strelišta, utvrdit će se pravilnikom koji donosi ministar na prijedlog policijskog komesara.

(7) Imenovanje i način rada komisija i drugih u postupku ocjene ispunjavanja uvjeta i opravdanosti zahtjeva za izdavanje odobrenja i isprava o oružju utvrdit će se pravilnikom koji donosi ministar na prijedlog policijskog komesara.

(8) Način i uvjeti za siguran smještaj i čuvanje oružja i municije utvrđuje se pravilnikom koji donosi ministar na prijedlog policijskog komesara.

### **Član 9.**

#### **(Izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu)**

(1) Nadležna policijska uprava izdat će fizičkom licu odobrenje za nabavljanje i posjedovanje vatrenog oružja i bitnih dijelova kategorije B ukoliko ispunjava opće i posebne uvjete.

(2) Opći uvjeti za izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu su:

a) da je državljanin Bosne i Hercegovine ili stranac sa stalnim boravkom ili privremenim boravkom dužim od jedne godine;

b) da je navršio 21 godinu života;

c) da ima opravdani razlog za nabavljanje i posjedovanje oružja;

d) da nije osuđivan za krivično djelo ili da se protiv lica ne vodi krivični postupak, osim za krivična djela protiv sigurnosti javnog prometa;

e) da u posljednje dvije godine od dana pravosnažnosti rješenja o prekršaju, odnosno prekršajnog naloga nije kažnjavao za prekršaj protiv javnog reda i mira koji se odnosi na fizički napad, učestvovanje u tuči, fizičko zlostavljanje, izazivanje tuče ili za prekršaj propisan Zakonom o oružju i municiji za koji je izrečena zaštitna mjera oduzimanja oružja, bitnih dijelova i municije ili za prekršaj zbog nasilja u porodici ili ako mu je u skladu sa Zakonom o zaštiti nasilja u porodici izrečena zaštitna mjera ili za prekršaj sa elementima fizičkog nasilja u skladu sa drugim propisima, kao i da se protiv tog lica ne vodi postupak za takve prekršaje;

f) da ne postoje okolnosti koje negativno utiču na javni red i mir, odnosno interese sigurnosti, kao i da ne postoje druge okolnosti koje ukazuju da bi oružje moglo biti zloupotrijebljeno, kao što je: prekomjerno uživanje alkohola, konzumacija opojnih droga ili drugih omamljujućih sredstava, izraženo poremećeni porodični odnosi, sukobi s okolinom, agresivno i ekscesno ponašanje i drugi poremećaji u ponašanju, kriminalističko - obavještajni razlozi i razlozi koji ukazuju na povezanost sa licima iz kriminalističko - obavještajne evidencije i slično.

(3) Posebni uvjeti za izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu su:

a) da je zdravstveno sposoban za držanje, posjedovanje i nošenje oružja;

b) da raspolaže tehničkim znanjem za pravilno rukovanje oružjem i da poznaje propise koji se odnose na držanje, čuvanje i nošenje oružja;

c) da ima uvjete za siguran smještaj i čuvanje oružja.

(4) Izuzetno od stava (2) tačka b) ovog člana, odobrenje za nabavljanje, koje ne uključuje kupnju, i posjedovanje oružja može se izdati i licima sa navršenih 18 godina koja po posebnim propisima obavljaju poslove policijskog službenika, službenika sudske policije, službenika straže kazneno - popravnih ustanova, službenika obavještajno - sigurnosne agencije Bosne i Hercegovine, profesionalna vojna lica, pripadnici agencija i unutrašnjih službi za zaštitu ljudi i imovine, čuvari šuma, lovišta i ribolovišta, kao i članovima sportske streljačke organizacije koji se aktivno takmiče u streljaštvu ili licima sa položenim lovačkim ispitom.

(5) Opravdanost zahtjeva za izdavanje odobrenja za nabavljanje i posjedovanje oružja utvrđuje komisija u skladu sa pravilnikom iz člana 8. stav (7) i (8) ovog zakona.

**Član 10.****(Utvrđivanje uvjeta za izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu)**

(1) Uvjet iz člana 9. stav (2) tačka a) i b) podnosilac zahtjeva dokazuje dostavljanjem fotokopije lične karte i obavijesti o prebivalištu – boravištu sa ličnim podacima (PBA – 3 obrazac).

(2) Fizičko lice ima opravdan razlog za nabavljanje i posjedovanje vatrenog oružja ako vatreno oružje nabavlja u svrhu lične sigurnosti, radi zaštite imovine, bavljenja lovom ili sportom.

(3) Fizičko lice ima opravdani razlog za nabavljanje i posjedovanje vatrenog oružja u svrhu lične sigurnosti i radi zaštite imovine, ukoliko učini vjerovatnim da bi mu mogla biti ugrožena lična sigurnost i imovina.

(4) Fizičko lice ima opravdan razlog za nabavljanje i posjedovanje lovačkog oružja ukoliko je član lovačke organizacije i ukoliko ima položen lovački ispit, što dokazuje uvjerenjem o članstvu u lovačkom društvu, članskom knjižicom i uvjerenjem o položenom lovačkom ispitu.

(5) Fizičko lice ima opravdan razlog za nabavljanje i posjedovanje sportskog oružja ukoliko je član sportske streljačke organizacije i aktivno se bavi sportskim streljaštvom, što dokazuje uvjerenjem sportske streljačke organizacije čiji je član i članskom knjižicom.

(6) Uvjet iz člana 9. stav (2) tačke d) ovog zakona, odnosno da se protiv lica ne vodi krivični postupak, dokazuje se na osnovu uvjerenja nadležnog suda koje dostavlja podnosilac zahtjeva, a činjenica o neosuđivanosti utvrđuje se po službenoj dužnosti.

(7) Uvjet iz člana 9. stav (2) tačka e) ovoga zakona utvrđuje se provjerom u prekršajnoj evidenciji nadležne policijske stanice.

(8) Uvjet iz člana 9. stav (2) tačka c) i f) ovog zakona utvrđuje se terenskom provjerom policijskog službenika nadležne policijske stanice.

(9) Lovačke i streljačke organizacije su obavezne da u roku od osam dana od dana prestanka članstva svoga člana o navedenom dostave obavijest nadležnoj policijskoj stanici.

**Član 11.****(Dostavljanje dokaza o ispunjavanju posebnih uvjeta)**

(1) Uvjet iz člana 9. stav (3) tačka c) ovoga zakona, utvrđuje policijski službenik na adresi podnosioca zahtjeva.

(2) Podnosilac zahtjeva koji ispunjava opće uvjete iz člana 9. stav (2) ovog zakona, će u roku od 60 dana od dana podnošenja zahtjeva dostaviti dokaze o ispunjavanju posebnih uvjeta iz člana 9. stav (3) tačka a) i b) ovog zakona.

**Član 12.****(Utvrđivanje zdravstvene sposobnosti)**

(1) Uvjet iz člana 9. stav (3) tačka a) ovoga zakona podnosilac zahtjeva dokazuje uvjerenjem o zdravstvenoj sposobnosti za držanje, odnosno za držanje i nošenje oružja, a zaposlena lica u institucijama iz člana 4. stav (1) ovog zakona koja nabavljaju vatreno oružje u svoje lične svrhe, ovaj uvjet dokazuju ispravom o zaposlenju nadležne institucije.

(2) Uvjerenje iz stava (1) ovog člana izdaje nadležna zdravstvena ustanova s rokom važenja od šest mjeseci od dana izdavanja.

(3) Isprava o zaposlenju iz stava (1) ovog člana ne može biti starija od šest mjeseci od dana izdavanja.

(4) Uvjete koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja, način i postupak obavljanja zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije i sadržaj uvjerenja o izvršenom zdravstvenom pregledu, utvrdiće se pravilnikom, koji donosi ministar na prijedlog policijskog komesara u saradnji sa Ministarstvom zdravstva, rada i socijalne politike.

### **Član 13.**

#### **(Promjene zdravstvene sposobnosti)**

(1) Nadležna zdravstvena ustanova koja ima saznanja o promjeni zdravstvenog stanja vlasnika oružja, a koje može uticati na njegovu sposobnost za držanje i nošenje oružja, dužna je odmah po saznanju za takvu promjenu obavijestiti policijsku stanicu prema mjestu prebivališta vlasnika oružja.

(2) Nadležna policijska stanica jednom godišnje obavještava nadležnu zdravstvenu ustanovu o vlasnicima oružja.

### **Član 14.**

#### **(Utvrđivanje tehničkog znanja za pravilno rukovanje oružjem i za poznavanje propisa koji se odnose na držanje, čuvanje i nošenje oružja)**

(1) Ispunjavanje uvjeta iz člana 9. stav (3) tačka b) ovog zakona za oružje kategorije B podnosilac zahtjeva dokazuje:

a) potvrdom o položenom ispitu o osposobljenosti za pravilno držanje, nošenje i rukovanje oružjem Ministarstva unutrašnjih poslova ili

b) potvrdom o položenom ispitu o osposobljenosti za pravilno držanje, nošenje i rukovanje oružjem koju izdaje sportska

streljačka, odnosno druga organizacija ili ustanova koja posjeduje odobrenje za provođenje obuke u rukovanju oružjem.

(2) Izuzetno od stava (1) ovog člana, lica koja posjeduju registrovano vatreno oružje u skladu sa ranije važećim propisima i lica koja obavljaju ili su obavljali poslove policijskog službenika, službenika sudske policije, službenika straže kazneno - popravnih ustanova, službenika obavještajno - sigurnosne agencije Bosne i Hercegovine, pripadnici agencija i unutrašnjih službi za zaštitu ljudi i imovine, profesionalna vojna lica, rezervne vojne starješine, oslobođena su obuke za pravilno rukovanje oružjem i obuke o poznavanju propisa koji se odnose na držanje, čuvanje i nošenje oružja, kao i druga lica koja su kroz školovanje i druge vidove obuke osposobljena za pravilno rukovanje oružjem i poznaju propise koji se odnose na držanje, čuvanje i nošenje oružja, što dokazuju odgovarajućom ispravom.

(3) Program obuke i način osposobljavanja za pravilno rukovanje i poznavanje propisa u vezi držanja, čuvanja i nošenja oružja, imenovanje i način rada komisije utvrdiće se pravilnikom, koji donosi ministar na prijedlog policijskog komesara.

### **Član 15.**

#### **(Odobrenje za provođenje obuke u rukovanju oružjem)**

(1) Odobrenje za provođenje obuke u rukovanju oružjem Uprava policije će izdati ako:

a) je sportska streljačka organizacija ili ustanova upisana u sudski registar,

b) su ispunjeni prostorni i tehnički uvjeti za čuvanje, smještaj i upotrebu oružja i municije, kojima se osigurava da oružje i municija ne dođe u posjed neovlaštenih lica i ne ugrozi sigurnost ljudi i objekta;

c) ako odgovorno lice organizacije ili ustanove za provođenje obuke u rukovanju oružjem ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona, a ako će provoditi obuku u rukovanju oružjem mora da posjeduje certifikat obrazovne ili stručne ustanove ili druge odgovarajuće organizacije ili institucije za certificiranog instruktora za provođenje obuke u rukovanju oružjem;

d) ako zaposleno lice koje će provoditi obuku u rukovanju oružjem u organizaciji ili ustanovi za provođenje obuke u rukovanju oružjem ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona i ako posjeduje certifikat obrazovne ili stručne ustanove ili druge odgovarajuće organizacije ili institucije za certificiranog instruktora za provođenje obuke u rukovanju oružjem.

(2) Zahtjev za izdavanje odobrenja za provođenje obuke u rukovanju oružjem će se odbiti ako podnosilac zahtjeva ne ispunjava uvjete iz stava (1) ovog člana.

(3) Odobrenje za provođenje obuke u rukovanju oružjem Uprava policije će ukinuti i zabraniti dalje obavljanje djelatnosti ako organizacija ili ustanova za provođenje obuke u rukovanju oružjem prestane ispunjavati uvjete iz stava (1) ovog člana.

(4) Postojanje uvjeta iz stava (1) ovog člana utvrđuje komisija u skladu sa pravilnikom iz člana 8. stav (7) i (8) ovog zakona.

## Član 16.

### **(Izdavanje odobrenje za nabavljanje i posjedovanje vatrenog oružja pravnom licu radi naoružanja čuvara, lovočuvara i čuvara šuma)**

(1) Odobrenje za nabavljanje i posjedovanje vatrenog oružja kategorije B u cilju naoružanja čuvara, lovočuvara, čuvara šuma i

drugih radnika koji neposredno vrše poslove zaštite i čuvanja, može se izdati:

a) pravnom licu koje obavlja poslove zaštite ljudi i imovine putem osnivanja posebnih agencija za te poslove ili organiziranjem unutrašnje službe zaštite u pravnom licu u skladu sa Zakonom o agencijama i unutrašnjim službama za zaštitu ljudi i imovine;

b) korisniku lovišta koji ima osnovanu lovočuvarsku službu radi obavljanja poslova zaštite i čuvanja lovišta u skladu sa Zakonom o lovstvu;

c) pravnom licu koje obavlja poslove zaštite i čuvanja šuma i šumskih zemljišta putem osnivanja čuvarske službe u skladu sa Zakonom o šumama;

d) drugim pravnim licima kojima je prema posebnim propisima potrebno oružje radi zaštite i čuvanja, pod uvjetom da imaju osnovanu čuvarsku službu.

(2) Odobrenje za nabavljanje i posjedovanje oružja pravnim licima iz stava (1) ovog člana nadležna policijska uprava će izdati ako:

a) odgovorno lice u pravnom licu ispunjava opće i posebne uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona;

b) zaposleno lice koje će u pravnom licu obavljati poslove zaštite i čuvanja ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona;

c) ako ima prostor za siguran smještaj i čuvanje oružja i municije.

(3) Pravno lice iz stava (1) tačka a) ovog člana može nabaviti i posjedovati oružje kategorije B čiji je broj propisan Zakonom o agencijama i unutrašnjim službama za zaštitu ljudi i imovine.

(4) Pravna lica iz stava (1) tačka b), c) i d) ovog člana mogu nabaviti i posjedovati

vatreno oružje kategorije B čiji broj zavisi od potrebe i broja zaposlenih lica koja imaju potrebu za korištenje oružja, što se utvrđuje pravilnikom, koji donosi ministar na prijedlog policijskog komesara.

(5) Pravnom licu iz stava (1) tačka a) ovog člana, nadležna policijska uprava će izdati odobrenje za nabavljanje i posjedovanje oružja u skladu sa Zakonom o agencijama i unutrašnjim službama za zaštitu ljudi i imovine i njegovim podzakonskim propisima, te uz prethodnu saglasnost Federalnog ministarstva unutrašnjih poslova.

### **Član 17.**

#### **(Uvjerenje o ispunjavanju uvjeta za neposredno rukovanje oružjem i municijom)**

(1) Uvjerenje o ispunjavanju uvjeta za neposredno rukovanje oružjem i municijom će se radi obavljanja djelatnosti izdati fizičkom, odnosno odgovornom licu u pravnom licu ili fizičkom licu radi obavljanja poslova zaštite i čuvanja, kao i drugim fizičkim licima koji neposredno rukuju sa oružjem i municijom, ako su ispunjeni uvjeti iz člana 9. stav (2) tačka a), b), d), e) i f) i stava (3) tačka a) i b) ovog zakona.

(2) Postojanje uvjeta iz stava (1) ovog člana utvrđuje komisija u skladu sa pravilnikom iz člana 8. stav (7) ovog zakona.

(3) Zahtjev za izdavanje uvjerenja iz stava (1) ovog člana će se odbiti kada se u postupku utvrdi da podnosilac zahtjeva ne ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona.

### **Član 18.**

#### **(Odobrenje za nabavljanje i posjedovanje vatrenog oružja i municije radi obavljanja muzejske djelatnosti)**

(1) Odobrenje za nabavljanje i posjedovanje vatrenog oružja, bitnih dijelova i municije radi obavljanja muzejske djelatnosti, nadležna policijska uprava će izdati muzeju, kao i

pravnom i fizičkom licu koji nabavljaju čuvaju, istražuju i izlažu vatreno oružje, bitne dijelove ili municiju u istorijske, kulturne, znanstvene, tehničke i obrazovne svrhe, te u svrhe očuvanja nasljeđa ili rekreativne svrhe (muzejski eksponati) pod uvjetom da:

a) posjeduje rješenje Ministarstva obrazovanja, nauke, kulture i sporta kojim je utvrđeno da su ispunjeni uvjeti za obavljanje muzejske djelatnosti (muzej, muzejska zbirka, muzejska izložba ili galerija) u pogledu odgovarajućeg muzejskog materijala, prostorija i opreme za obavljanje muzejske djelatnosti i da ima potreban broj stručnih muzejskih radnika u skladu sa Zakonom o muzejskoj djelatnosti ("Službeni glasnik Unsko - sanskog kantona", broj: 6/01 i 10/03);

b) fizičko lice, odnosno odgovorno lice u pravnom licu ispunjava opće i posebne uvjete člana 9. stav (2) tačka a), b), d), e) i f) i stava (3) tačka a) i b) ovog zakona;

c) zaposleno lice koje neposredno rukuje sa oružjem ili municijom ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona;

d) ima prostor za siguran smještaj i čuvanje oružja i municije.

(2) Pravna i fizička lica iz stava (1) ovog člana mogu nabaviti i posjedovati oružje kategorije B i C.

(3) Izuzetno, pravnim i fizičkim licima iz stava (1) ovog člana može se odobriti nabavljanje i posjedovanje oružja kategorije A pod uvjetom da se drže na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata ili su od tih objekata odvojeni zaštitnim grudobranom ili zidom koji pruža punu zaštitu od eksplozija i požara.

(4) Pravno lice iz stava (1) ovog člana može nabaviti i posjedovati oružje, bitne dijelove i municiju čiji broj zavisi od potrebe i broja zaposlenih što se utvrđuje pravilnikom iz člana 16. stav (4) ovog zakona.

#### **Član 19.**

**(Odobrenje za nabavljanje i posjedovanje vatrenog oružja za potrebe lovačke ili sportske streljačke organizacije ili ustanove koja posjeduje odobrenje za provođenje obuke u rukovanju vatrenim oružjem, naučnog istraživanja za koje je potrebno oružje, snimanja filmskih i prikazivanja pozorišnih predstava, te za potrebe aerodroma radi odstrela, plašenja i rastjerivanja ptica i divljači)**

(1) Odobrenje za nabavljanje i posjedovanje vatrenog oružja izdat će se pravnom licu koje je registrovano kod nadležnog organa za obavljanje djelatnosti: lovačke ili sportske streljačke, odnosno druge organizacije ili ustanove koja posjeduje odobrenje za provođenje obuke u rukovanju vatrenim oružjem, naučnog istraživanja za koje je potrebno oružje, snimanja filmskih i prikazivanja pozorišnih predstava, te za potrebe aerodroma radi odstrela, plašenja i rastjerivanja ptica i divljači i sl.

(2) Odobrenje za nabavljanje vatrenog oružja pravnim licima iz stava (1) ovog člana nadležna policijska uprava će izdati ako:

a) ako odgovorno lice u pravnom licu ispunjava uvjete člana 9. stav (2) tačka a), b), d), e) i f) i stava (3) tačka a) i b) ovog zakona;

b) ako zaposleno lice koje neposredno rukuje sa oružjem ili municijom ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona;

c) ako ima prostor za siguran smještaj i čuvanje oružja.

(3) Pravno lice iz stava (1) ovog člana može nabaviti i posjedovati oružje, bitne dijelove i municiju čiji broj zavisi od potrebe i broja zaposlenih što se utvrđuje pravilnikom iz člana 16. stav (4) ovog zakona.

#### **Član 20.**

**(Rješavanje o zahtjevu pravnog lica)**

(1) Ispunjavanje uvjeta iz člana 16. stav (2) tačka a) i b), člana 18. stav (1) tačka a), b) i c) i člana 19. stav (1) i stav (2) tačka a) i b) ovog zakona utvrđuje komisija u skladu sa pravilnikom iz člana 8. stav (7). ovog zakona.

(2) Prostorni i tehnički uvjeti smještaja i čuvanja oružja i municije iz člana 16. stav (2) tačka c), člana 18. stav (1) tačka d) i člana 19. stav (2) tačka c) ovog zakona utvrđuju se u skladu sa pravilnikom iz člana 8. stav (8) ovog zakona.

(3) O izdavanju odobrenja iz člana 16., 18. i 19. ovog zakona odlučuje nadležna policijska uprava prema mjestu sjedišta pravnog lica, odnosno prema mjestu sjedišta podružnice.

#### **Član 21.**

**(Odobrenje za nabavljanje i posjedovanje vatrenog oružja i bitnih dijelova kategorije B)**

(1) Odobrenje za nabavljanje i posjedovanje vatrenog oružja i bitnih dijelova kategorije B fizičkim i pravnim licima iz člana 16., 18. i 19. ovoga zakona izdaje se u formi rješenja sa rokom važenja od šest mjeseci od dana izdavanja.

(2) Odobrenje za nabavljanje i posjedovanje vatrenog oružja i bitnih dijelova kategorije B koje nije iskorišteno u roku iz stava (1) ovog člana mora se vratiti nadležnoj policijskoj upravi u roku od osam dana od dana isteka roka.

(3) Odobrenje iz stava (1) ovog člana će se ukinuti ako fizičko lice prestane ispunjavati uvjete iz člana 9. ovog zakona, odnosno ako pravno lice prestane ispunjavati uvjete iz člana 16., 18. i 19. ovog zakona.



**Član 22.****(Odbijanje zahtjeva za nabavljanje i posjedovanje vatrenog oružja i bitnih dijelova kategorije B)**

(1) Zahtjev za izdavanje odobrenja za nabavljanje i posjedovanje vatrenog oružja i bitnih dijelova kategorije B će se odbiti rješenjem ako podnositelj zahtjeva ne ispunjava uvjete iz člana 9., odnosno iz člana 16., 18. i 19. ovoga zakona.

(2) Ukoliko se zahtjev za izdavanje odobrenja za nabavljanje i posjedovanje vatrenog oružja i bitnih dijelova odbija zbog kriminalističko – obavještajnih razloga ili zbog razloga koji ukazuju na povezanost sa licima iz kriminalističko – obavještajne evidencije iz člana 9. stav (2) tačka f) ovog Zakona u rješenju se neće posebno obrazlagati utvrđeno činjenično stanje.

(3) Na način iz stava (2) ovog člana će se postupiti i u drugim slučajevima u kojima je u skladu sa ovim zakonom propisano donošenje rješenja o odbijanju zahtjeva.

**Član 23.****(Registracija vatrenog oružja i bitnih dijelova)**

(1) Fizičko lice koje je nabavilo vatreno oružje i bitne dijelove na osnovu odobrenja za nabavljanje i posjedovanje, dužno je u roku od osam dana od dana nabavljanja nadležnoj policijskoj stanici podnijeti zahtjev za registraciju vatrenog oružja i bitnih dijelova radi izdavanje oružnog lista.

(2) Pravno lice koje je nabavilo vatreno oružje i bitne dijelove na osnovu odobrenja za nabavljanje i posjedovanje, dužno je u roku od osam dana od dana nabavljanja nadležnoj policijskoj stanici podnijeti zahtjev za izdavanje odobrenja za držanje vatrenog oružja i bitnih dijelova.

**Član 24.****(Izdavanje isprava o oružju)**

(1) Oružni list i odobrenje za držanje vatrenog oružja izdaje nadležna policijska stanica sa rokom važenja od pet godina.

(2) Potvrda o prijavi oružja se izdaje na neodređeno vrijeme, a u slučaju promjene vlasništva nad oružjem vlasnik je dužan potvrdu vratiti organu koji je potvrdu izdao.

(3) Vlasnik oružja kojem je izdat oružni list, dozvola za nošenje oružja, odnosno odobrenje za držanje vatrenog oružja dužan je u roku od 15 dana prije datuma isteka važnosti isprave o oružju podnijeti zahtjev za zamjenu isprave o oružju.

(4) Nadležna policijska stanica će izvršiti zamjenu isprave o oružju ako vlasnik oružja ispunjava uvjete iz člana 9., odnosno člana 16., 18. i 19. ovog zakona.

(5) Zahtjev za zamjenu isprava o oružju će se odbiti kada se u postupku zamjene utvrdi da vlasnik oružja ne ispunjava neki od uvjeta iz člana 9., odnosno člana 16., 18. i 19. ovog zakona.

(6) Ako vlasnik oružja u roku od 15 dana prije datuma isteka važnosti isprave o oružju ne podnese zahtjev za zamjenu isprave o oružju i u slučaju iz stava (5) ovog člana nadležna policijska uprava će oduzeti oružje, bitne dijelove, municiju i isprave o oružju i postupiti u skladu sa članom 52. ovog zakona.

(7) Izuzetno od odredbe stava (5) ovog člana nadležna policijska uprava će donijeti zaključak kojim se postupak zamjene isprava o oružju prekida ako se nakon podnošenja zahtjeva za zamjenu isprave o oružju utvrdi da se protiv vlasnika oružja vodi krivični ili prekršajni postupak.

(8) Nakon izdavanja isprava iz stava (1) ovog člana, nadležna policijska stanica može i prije isteka roka od pet godina vršiti povremene provjere da li vlasnik oružja ispunjava uvjete iz člana 9., odnosno člana 16., 18. i 19. ovog zakona.

**Član 25.****(Odbijanje zahtjeva za izdavanje oružnog lista i odobrenja za držanje vatrenog oružja)**

(1) Nadležna policijska uprava će odbiti zahtjev za izdavanje oružnog lista, odnosno odobrenja za držanje vatrenog oružja ako je podnosilac zahtjeva nabavio vatreno oružje nakon isteka roka iz člana 23. ovog zakona, kao i u slučaju kada se u postupku registracije utvrdi da je prestao ispunjavati uvjete iz člana 9., odnosno člana 16., 18. i 19. ovog zakona.

(2) Nadležna policijska uprava će odbiti zahtjev za izdavanje oružnog lista, odnosno odobrenja za držanje vatrenog oružja za vatreno oružje i bitne dijelove za koje se ne može dokazati porijeklo i koje nije obilježeno žigom u skladu sa posebnim propisom.

(3) U slučaju iz stava (1) ovog člana nadležna policijska uprava će oduzeti vatreno oružje, bitne dijelove i postupiti u skladu sa članom 52. ovog zakona.

(4) U slučaju iz stava (2) ovog člana nadležna policijska uprava će oduzeti vatreno oružje i bitne dijelove, koje će se dostaviti Upravi policije radi uništenja.

**Član 26.****(Nošenje vatrenog oružja)**

(1) Nošenje vatrenog oružja može se odobriti fizičkom licu koje posjeduje vatreno oružje u svrhu lične sigurnosti i radi zaštite imovine na osnovu izdatog oružnog lista za držanje oružja, ako zbog opravdanih razloga, postoji potreba za nošenjem vatrenog oružja izvan stambenog prostora na kojem ima pravo vlasništva ili korištenja i ako je nakon izdavanja oružnog lista za držanje oružja proteklo šest mjeseci.

(2) Zahtjev za nošenje vatrenog oružja nadležna policijska uprava će odbiti ako ocijeni da to ugrožava interese sigurnosti ili ukoliko se preduzimanjem redovnih i dodatnih mjera od strane nadležnog organa može osigurati odgovarajuća zaštita tog lica.

(3) Fizičko lice kome je odobreno nošenje oružja dužno je kod nadležne policijske stanice podnijeti zahtjev za izdavanje dozvole za nošenje vatrenog oružja u svrhu lične sigurnosti i radi zaštite imovine u roku od 30 dana od dana prijema rješenja kojim se odobrava nošenje oružja.

**Član 27.****(Dozvola za nošenje vatrenog oružja)**

(1) Dozvola za nošenje vatrenog oružja izdaje se na osnovu rješenja iz člana 26. stav (1) ovog zakona.

(2) Dozvola za nošenje vatrenog oružja važi dok traju razlozi zbog kojih je izdata, a najduže do isteka roka važenja oružnog lista na osnovu kojeg je izdata.

(3) Ako se prije isteka roka važenja dozvole za nošenje vatrenog oružja utvrdi da su prestali razlozi zbog kojih je nošenje vatrenog oružja odobreno, donijet će se rješenje kojim se nošenje vatrenog oružja zabranjuje, a dozvola za nošenje vatrenog oružja oduzima i poništava.

**Član 28.****(Nabavljanje municije)**

Municija za vatreno oružje može se nabavljati samo za vrstu oružja za koje fizičko i pravno lice ima važeću ispravu o oružju, izuzev civilnih strelišta i sportskih streljačkih organizacija koji mogu nabavljati različitu municiju za svoje potrebe i potrebe obuke.

**Član 29.****(Spravljanje municije)**

(1) Članovi sportskih streljačkih i lovačkih organizacija mogu spravljati municiju za svoje registrovano vatreno oružje kategorije B na osnovu odobrenja za spravljanje municije policijske uprave mjesta prebivališta člana sportske streljačke, odnosno lovačke organizacije.

(2) Spravljanje municije za registrovano vatreno oružje kategorije B ne smatra se proizvodnjom municije.

(3) Odobrenje iz stava (1) ovog člana izdat će se fizičkom licu ako:

a) priloži dokaz da je član sportske streljačke ili lovačke organizacije;

b) priloži dokaz da je osposobljeno za rukovanje municijom;

c) priloži dokaz da prostorija namijenjena za spravljanje municije ispunjava prostorne i tehničke uvjete za smještaj i čuvanje eksplozivnih materija.

(4) Postojanje uvjeta iz stava (3) utvrđuje komisija u skladu sa pravilnikom iz člana 8. stav (7) i (8) ovog zakona.

(5) Municijom iz ovog člana zabranjeno je trgovati.

(6) Za nabavljanje opreme za spravljanje municije nije potrebno odobrenje nadležne policijske uprave.

(7) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uvjete iz stava (3) ovog člana.

(8) Odobrenje za spravljanje municije će se ukinuti i zabraniti spravljanje municije fizičkom licu iz stava (1) ovog člana ako prestane ispunjavati uvjete iz stava (3) ovog člana.

### **Član 30.**

#### **(Nabavljanje eksplozivnih materija u svrhu spravljanja municije)**

(1) Fizička lica iz člana 29. stav (1) ovog zakona eksplozivne materije u svrhu spravljanja municije mogu nabavljati na osnovu odobrenja policijske uprave mjesta prebivališta ili boravišta člana sportske streljačke, odnosno lovačke organizacije.

(2) Odobrenje iz stava (1) ovog člana izdaje se sa rokom važenja od šest mjeseci od dana izdavanja i sadrži podatke o vrsti, količini i oznakama pakovanja eksplozivnih materija koje će se upotrijebiti za spravljanje municije.

(3) Odobrenje iz stava (1) ovog člana koje nije iskorišteno u roku iz stava (2) ovog člana mora se vratiti nadležnoj policijskoj upravi u roku od osam dana od dana isteka roka.

(4) Postojanje uvjeta za izdavanje odobrenja iz stava (1) ovog člana utvrđuje komisija u skladu sa pravilnikom iz člana 8. stav (7) ovog člana.

### **Član 31.**

#### **(Odobrenje za sakupljanje i držanje starog oružja)**

(1) Odobrenje za sakupljanje i držanje starog oružja nadležna policijska uprava izdaje fizičkom i pravnom licu ako:

a) je posvećeno prikupljanju i očuvanju vatrenog oružja, bitnih dijelova ili municije u istorijske, kulturne, znanstvene, tehničke i obrazovne svrhe ili svrhe očuvanja nasljeđa;

b) fizičko lice, odnosno odgovorno lice u pravnom licu ispunjava uvjete iz člana 9. stav (2) tačka a), b), d), e), f) i stav (3) ovog zakona.

(2) Pod uvjetima iz stava (1) ovog člana fizičkom i pravnom licu (kolekcionaru) može se izdati kolekcionarska dozvola ako posjeduje više od deset komada različitog registrovanog starog oružja.

(3) Odobrenje za sakupljanje i držanje starog oružja i kolekcionarska dozvola izdaju se sa rokom važenja od 5 godina.

(4) Svaki komad starog oružja vlasnik je obavezan registrovati kod nadležne policijske stanice, koja u tu svrhu izdaje oružni list za držanje starog oružja.

(5) Oružje iz stava (1) i (2) ovog člana ne smije se nositi niti upotrebljavati, niti se za njega smije nabavljati, držati ili spravljati municija.

(6) Oružje iz stava (1) i (2) ovog člana smije se prodati samo fizičkom i pravnom licu, kojem je izdata isprava iz stava (1) i (2) ovog člana, a prodavac oružja je dužan izvršiti objavu oružja kod nadležne policijske stanice u roku od osam dana od dana prodaje.

(7) Licu kome je izdato odobrenje za sakupljanje starog oružja, odnosno kolekcionarska dozvola može, pored starog oružja, sakupljati i hladno oružje, automatsko i poluautomatsko oružje i bitne dijelove kategorije A koje više nije u naoružanju oružanih snaga ili policije, a trajno je onesposobljeno za upotrebu, pod uvjetom da se drže na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata ili su od tih objekata odvojeni zaštitnim grudobranom ili zidom koji pruža punu zaštitu od eksplozija i požara.

(8) Opravdanost zahtjeva za izdavanje odobrenja za nabavljanje oružja utvrđuje komisija u skladu sa pravilnikom iz člana 8. stav (7) i (8) ovog zakona.

(9) Nadležna policijska uprava će rješenjem odbiti zahtjev za izdavanje odobrenja za sakupljanje i držanje starog oružja i zahtjev za izdavanje kolekcionarske dozvole ako podnosilac zahtjeva ne ispunjava uvjete iz stava (1) ovog člana.

(10) Nadležna policijska uprava će rješenjem oduzeti staro oružje i isprave o oružju ako fizičko i pravno lice prestane ispunjavati uvjete iz stava (1) ovog člana i postupiti u skladu s članom 52. ovog zakona.

### **Član 32.**

#### **(Oružje sa obavezom prijavljivanja)**

(1) Fizičko i pravno lice može bez odobrenja nabavljati i posjedovati oružje kategorije C.

(2) Lice iz stava (1) ovog člana koje nabavi oružje kategorije C, dužno je prijaviti oružje nadležnoj policijskoj stanici u roku od osam dana od dana nabavljanja i uz prijavu dostaviti dokaz o porijeklu oružja.

(3) Za prijavljeno oružje iz stava (1) ovog člana nadležna policijska stanica izdaje potvrdu o prijavi.

(4) Trgovac oružjem ili prodavac dužan je prijaviti prodaju oružja iz stava (1) ovog člana nadležnoj policijskoj stanici u roku od osam dana od dana prodaje, a prijava o prodatom oružju mora sadržavati podatke o kupcu (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka) i podatke o bitnim dijelovima (serijski broj ili jedinstvenu oznaku).

(5) Oružje kategorije C ne smije se prodati fizičkom licu koje nije navršilo 21 godinu života.

(6) Fizičko i pravno lice koje posjeduje registrovano lovačko ili sportsko oružje, može nabaviti optički nišan za to oružje bez odobrenja za nabavljanje, ali je obavezno prijaviti nabavljanje ili prodaju nadležnoj policijskoj stanici u roku od osam dana od dana nabavljanja ili prodaje.

### **Član 33.**

#### **(Dobrovoljna predaja oružja kategorije B i C)**

(1) Ako je iz bilo kojeg razloga prestala potreba za daljim držanjem i posjedovanjem oružja i bitnih dijelova ili ako vlasnik oružja ne želi da drži i posjeduje oružje, odnosno ne

želi da izvrši zamjenu isprave o oružju, može nadležnoj policijskoj stanici dobrovoljno predati oružje i bitne dijelove kategorije B i C.

(2) Za oružje iz stava (1) ovog člana vlasniku se izdaje potvrda o dobrovoljnoj predaji oružja i bitnih dijelova.

(3) O dobrovoljnoj predaji oružja i bitnih dijelova nadležna policijska stanica sačinjava zapisnik koji potpisuje vlasnik oružja i ovlašteno lice koje je sačinilo zapisnik.

(4) Izjava o dobrovoljnoj predaji ne može se opozvati.

(5) Oružje i bitni dijelovi iz stava (1) ovog člana će se uništiti.

### **POGLAVLJE III. POSTUPANJE SA ORUŽJEM I MUNICIJOM**

#### **Član 34.**

##### **(Prenos vlasništva nad vatrenim oružjem i bitnim dijelovima)**

(1) Vlasnik vatrenog oružja može prodati ili pokloniti vatreno oružje i bitne dijelove samo fizičkom ili pravnom licu koje ima odobrenje za nabavljanje i posjedovanje te vrste oružja.

(2) Vlasnik vatrenog oružja koji je prenio pravo vlasništva na lice iz stava (1) ovog člana dužan je u roku od osam dana od dana zaključivanja ugovora o prodaji ili poklonu vatrenog oružja, odjaviti oružje u nadležnoj policijskoj stanici i izvršiti predaju isprava o oružju.

(3) Zamjena vatrenog oružja i bitnih dijelova između vlasnika može se izvršiti samo ako oružni listovi glase na istu vrstu vatrenog oružja.

(4) Lice koje zamijeni vatreno oružje i bitne dijelove dužno je u roku od osam dana od dana zaključivanja ugovora o zamjeni vatrenog oružja i bitnih dijelova obavijestiti nadležnu policijsku stanicu i podnijeti zahtjev za registraciju oružja i izdavanje isprave o oružju.

#### **Član 35.**

##### **(Postupanje s oružjem i municijom)**

(1) Sa oružjem i municijom mora se postupati s naročitom pažnjom.

(2) Naročita pažnja u postupanju s oružjem i municijom podrazumijeva propisno čuvanje, pravilno, stručno i pažljivo rukovanje, nošenje, prenošenje i držanje u ispravnom stanju.

#### **Član 36.**

##### **(Zabrana nošenja oružja)**

(1) Oružje se ne smije držati i nositi bez odgovarajuće isprave o oružju i isprave o identitetu vlasnika oružja.

(2) Vlasnik oružja koji ima pravo nošenja oružja dužan je nositi oružje na način kojim se ne ugrožava lična sigurnost i sigurnost drugih lica.

(3) Vlasnik oružja kojem je izdat oružni list za držanje oružja smije prenositi oružje i municiju samo radi popravljivanja, modifikacije ili prepravljivanja, onesposobljavanja ili korištenja na strelištu pod uvjetom da je oružje nenapunjeno i u rastavljenom stanju tako da jedan ili više dijelova oružja budu odvojeni od njega, a oružje čije rastavljanje nije moguće mora biti na drugi način onesposobljeno za trenutnu upotrebu (nošenje u futrola, bravica na obaraču i sl.) i pod uvjetom da je pripadajuća municija fizički odvojena od oružja, u odgovarajućim navlakama ili kovčezima.

(4) Van lovišta, odnosno strelišta vatreno ili vazdušno oružje ne smije biti napunjeno i mora se u skladu sa propisima koji regulišu navedenu oblast držati, odnosno nositi u odgovarajućim futrolama i kovčezima.

(5) Zabranjeno je nošenje oružja na javnim, vjerskim i sportskim okupljanjima, osim u svrhu sportskog streljačkog takmičenja, te u školama, zdravstvenim i javnim ustanovama i

javnim preduzećima, ugostiteljskim objektima i prostorima koji se koriste za pružanje ugostiteljskih usluga, kao i na drugim mjestima ili objektima gdje je znakom javno istaknuta zabrana nošenja oružja.

(6) Fizičko lice ne smije nositi oružje kada je pod utjecajem alkohola, opojnih droga ili drugih omamljujućih sredstava, odnosno prilikom ispitivanja odgovarajućim sredstvima i aparatima za mjerenje alkoholiziranosti od strane ovlaštenih lica ne smije imati alkohola, opojnih droga i drugih omamljujućih sredstava u organizmu u količini većoj od 0,00 g/kg.

(7) Oružje se ne smije nositi na javnom mjestu na način kojim se može izazvati osjećanje fizičke ugroženosti, uznemirenosti i negodovanje građana.

#### **Član 37.**

##### **(Čuvanje oružja i municije)**

(1) Oružje i municija čuvaju se na način da nisu dostupni maloljetnom ili drugom neovlaštenom licu, zaključani i odvojeni u metalnom ormaru, sefu ili sličnom spremištu, koje se ne može otvoriti alatom uobičajene upotrebe.

(2) Oružje i municija čuvaju se u stambenom ili drugom odgovarajućem prostoru koji se nalazi u mjestu prebivališta ili boravišta, odnosno sjedišta vlasnika oružja i municije.

#### **Član 38.**

##### **(Dotrajalo vatreno oružje i bitni dijelovi)**

(1) Vlasnik oružja čije je vatreno oružje i bitni dijelovi dotrajalo da njegova upotreba može ugroziti sigurnost ljudi, a ne postoji mogućnost da se oružje popravi, modifikuje ili prepravi, dužan je odmah takvo vatreno oružje i bitne dijelove predati nadležnoj policijskoj stanici.

(2) Oružje iz stava (1) ovog člana će se uništiti.

#### **Član 39.**

##### **(Postupci s oružjem i municijom u slučaju napuštanja mjesta prebivališta ili boravišta)**

(1) Vlasnik oružja, bitnih dijelova i municije, koji napušta mjesto prebivališta ili boravišta na vrijeme duže od tri mjeseca, dužan je predati oružje, bitne dijelove i municiju na čuvanje fizičkom licu koje ima odgovarajuću ispravu o oružju za takvu vrstu oružja.

(2) Izuzetno od stava (1) ovog člana vlasnik oružja, bitnih dijelova i municije može svoje oružje predati na čuvanje i lovačkim ili sportskim organizacijama ili trgovcu oružja.

(3) U slučaju iz stava (1) i (2) ovog člana, vlasnik oružja dužan je da u roku od 8 dana od dana predaje oružja, bitnih dijelova i municije obavijesti nadležnu policijsku stanicu.

(4) Nadležna policijska stanica će izdati potvrdu o prijemu obavještenja iz stava (3) ovog člana.

(5) Uvjeti i način predaje oružja, bitnih dijelova i municije na čuvanje iz stava (1) i (2) ovog zakona utvrdit će se pravilnikom iz člana 8. stav (5) ovog zakona.

#### **Član 40.**

##### **(Rukovanje i upotreba oružja)**

(1) Vlasnik oružja dužan je da pravilno i oprezno rukuje sa oružjem i da se stara da oružje bude u ispravnom stanju.

(2) Zabranjena je upotreba oružja na javnom mjestu i drugim mjestima na kojima se upotrebom oružja ugrožava sigurnost ljudi i objekata, te narušava javni red i mir.

(3) Lovачko i sportsko oružje se ne smije upotrebljavati izvan lovišta, odnosno strelišta ili drugih mjesta koja su određena za vježbe gađanja.

(4) Izuzetno od odredbe stava (3) ovog člana, vazdušno oružje i luk se smiju upotrebljavati i

na mjestima koja su po svom položaju ili po poduzetim mjerama takva, da se ne može ugroziti sigurnost građana.

(5) Vazdušno oružje ili luk mogu se dati na upotrebu djeci starijoj od 12 godina na streljštima i na drugim mjestima određenim i uređenim za vježbe gađanja pod nadzorom trenera koji ispunjava uvjete iz člana 9. ovog zakona i uvjete propisane posebnim propisom o sportu i pod uvjetom da imaju saglasnost oba roditelja ili staratelja.

(6) Vlasnik oružja dužan je da na poziv nadležne policijske stanice donese oružje na ispitivanje i tehnički pregled.

#### **Član 41.**

##### **(Povjeravanje nošenja i prenošenja oružja i municije)**

(1) Pravno lice iz člana 16., 18. i 19. ovog zakona, može povjeriti nošenje oružja članu streljačke ili lovačke organizacije, odnosno fizičkom licu koje obavlja poslove zaštite ili čuvaru šuma, lovišta i ribolovišta, a koji ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona.

(2) Član streljačke ili lovačke organizacije, odnosno fizičko lice, koje obavlja poslove zaštite, ili čuvar šuma, lovišta i ribolovišta iz stava (1) ovog člana, oružje i municiju koje mu je povjereno može nositi samo na streljštu ili terenu gdje se vrši vježba gađanja ili mjestu takmičenja u gađanju, odnosno u lovištu ili ribarskom području, objektu ili području koje obezbjeđuje ili čuva ili na trasi prevoza i prenosa imovine koju obezbjeđuje i samo za vrijeme vježbe gađanja ili obavljanja poslova zaštite i čuvanja.

(3) Fizičko lice iz stava (2) ovog člana, koje ne stanuje na području koje čuva, može prenositi oružje do svog mjesta stanovanja sa izdatom potvrdom o prenošenju oružja i municije.

(4) Pravno lice iz stava (1) ovog člana, izdaje potvrdu o nošenju oružja i municije fizičkom licu iz stava (2) ovog člana, odnosno potvrdu o prenošenju oružja i municije fizičkom licu iz stava (3) i o tome je dužno obavijestiti nadležnu policijsku stanicu kod koje je oružje registrovano u roku od 48 sati od dana izdavanja.

#### **Član 42.**

##### **(Postupanje u slučaju prestanka potrebe za držanjem i posjedovanjem vatrenog oružja, bitnih dijelova i municije pravnih lica)**

(1) Pravno lice iz člana 16. stav (1) tačka b), c) i d) i pravno lice iz člana 18. i 19. ovog zakona kod koga je iz bilo kojih razloga prestala potreba za daljim držanjem vatrenog oružja, bitnih dijelova i municije će u roku od osam dana od dana prestanka potrebe za držanjem i posjedovanjem vatrenog oružja, bitnih dijelova i municije nadležnoj policijskoj upravi vratiti odobrenje za držanje vatrenog oružja, a vatreno oružje, bitne dijelove i municiju predati nadležnoj policijskoj stanici.

(2) Pravna lica iz člana 16. stav (1) tačka a) ovog zakona nadležnoj policijskoj upravi dostavlja obavijest u skladu sa Pravilnikom o vatrenom oružju za obavljanje poslova fizičke zaštite ljudi i imovine („Službene novine F BiH“, broj: 92/14).

(3) Za oružje iz stava (1) i (2) ovog člana pravnom licu se izdaje potvrda.

(4) U slučajevima iz stava (1) i (2) ovog člana nadležna policijska uprava će postupiti u skladu sa članom 52. ovog zakona.

#### **Član 43.**

##### **(Postupanje u slučaju nestanka ili krađe vatrenog oružja, bitnih dijelova, municije ili isprava o oružju)**

(1) Vlasnik oružja u slučaju nestanka ili krađe oružja, bitnih dijelova, municije ili isprave o oružju, dužno je prijaviti nestanak ili krađu nadležnoj policijskoj stanici odmah, a

najkasnije u roku od 24 sata od saznanja za nestanak ili krađu.

(2) Nestanak ili krađa isprave o oružju objavljuje se na internet stranici Ministarstva unutrašnjih poslova.

(3) Ukoliko se u roku od 15 dana od dana objavljivanja na internet stranici ne pronađe isprava o oružju, nadležna policijska uprava donosi rješenje o poništenju isprave o oružju, a vlasnik oružja je dužan da po pravosnažnosti rješenja o poništenju isprave o oružju podnese zahtjev za izdavanje nove isprave o oružju.

(4) O nestalom ili ukradenom oružju, bitnim dijelovima i ispravama o oružju nadležna policijska stanica vlasniku oružja izdaje potvrdu i raspisuje potragu.

(5) U slučaju nestanka ili krađe oružja i bitnih dijelova, vlasnik oružja predaje ispravu o oružju nadležnoj policijskoj stanici odmah, a najkasnije u roku od osam dana od saznanja za nestanak ili krađu.

#### **Član 44.**

##### **(Postupanje sa pronađenim oružjem, bitnim dijelovima, municijom i ispravama o oružju)**

(1) Tko nađe oružje, bitne dijelove, municiju i isprave o oružju ili sazna za skriveno oružje, bitne dijelove i municiju dužan je o tome odmah obavijestiti najbližu policijsku stanicu koja nakon zaprimanja obavijesti poduzima sve neophodne mjere i radnje iz svoje nadležnosti s ciljem pronalaska vlasnika oružja, bitnih dijelova i isprava o oružju.

(2) Obavijest o pronađenom oružju, bitnim dijelovima, municiji i ispravama o oružju objavljuje se na internet stranici Ministarstva unutrašnjih poslova.

(3) Ukoliko se vlasnik pronađenog oružja, bitnih dijelova, municije i isprava o oružju ne javi nadležnoj policijskoj stanici u roku od 30

dana od dana obavještanja o pronalasku oružja, bitnih dijelova, municije ili isprava o oružju, nadležna policijska uprava će donijeti rješenje o oduzimanju oružja, bitnih dijelova, municije ili isprava o oružju. Nakon pravosnažnosti rješenja oduzeto oružje i bitni dijelovi dostavljaju se Upravi policije radi uništenja.

(4) Ukoliko se za pronađeno oružje, bitne dijelove i municiju ne utvrdi vlasnik nakon proteka jedne godine od dana pronalaska oružja, bitnih dijelova i municije, nadležna policijska uprava će donijeti rješenje o njegovom uništenju.

(5) Rješenje o uništenju oružja, bitnih dijelova i municije iz stava (4) ovog člana će se donijeti i u slučaju pronalaska oružja i bitnih dijelova iz člana (7) ovog zakona.

#### **Član 45.**

##### **(Promjena prebivališta, boravišta, sjedišta, ličnog imena, prezimena i naziva pravnog lica)**

(1) Fizičko i pravno lice kome je izdata isprava o oružju, a koje promijeni prebivalište, boravište, odnosno sjedište, dužno je u roku od 30 dana od dana nastale promjene, prijaviti oružje nadležnoj policijskoj stanici na čijem području je novo prebivalište, boravište odnosno sjedište, radi izdavanja nove isprave o oružju i upisa u odgovarajuće evidencije isprava o oružju.

(2) Fizičko i pravno lice kome je izdata isprava o oružju, a koje promijeni lično ime ili prezime, odnosno naziv, kao i druge promjene koje se odnose na vlasnika oružja ili njegovo oružje, dužno je u roku od 30 dana od dana nastale promjene, tu promjenu prijaviti nadležnoj policijskoj stanici, radi izdavanja nove isprave o oružju i upisa u odgovarajuće evidencije isprava o oružju.



**Član 46.****(Postupak s oružjem i municijom u slučaju smrti vlasnika oružja, bitnih dijelova i municije)**

(1) U slučaju smrti vlasnika oružja, bitnih dijelova i municije punoljetni član njegove porodice, zakonski zastupnik, staratelj, fizičko lice koje je s njim živjelo u zajedničkom domaćinstvu ili fizičko lice kod kojeg se oružje, bitni dijelovi i municija u trenutku smrti nalazilo, dužno je najkasnije u roku od 30 dana od dana smrti vlasnika, a na poziv nadležne policijske stanice i prije tog roka predati na čuvanje oružje, bitne dijelove, municiju i isprave o oružju.

(2) Nadležna policijska stanica o predatom oružju i municiji iz stava (1) ovog člana izdaje potvrdu.

(3) Nadležni sud, odnosno notar će rješenje o nasljeđivanju nakon njegove pravosnažnosti dostaviti policijskoj stanici u kojoj je registrovano nasljeđeno oružje.

(4) Nasljednik oružja, bitnih dijelova i municije iz stava (1) ovog člana u roku od 60 dana od dana pravosnažnosti rješenja o nasljeđivanju dužan je postupiti na jedan od slijedećih načina:

a) oružje, bitne dijelove i municiju prodati ili pokloniti licu koje ima odobrenje za nabavljanje i posjedovanje te vrste oružja;

b) podnijeti zahtjev za registraciju oružja i bitnih dijelova i izdavanje oružnog lista, odnosno podnijeti prijavu za posjedovanje oružja kategorije C i izdavanja potvrde o prijavi oružja;

c) podnijeti prijavu za posjedovanje trofejnog oružja, pod uvjetom da je nasljeđeno oružje trajno onesposobljeno za upotrebu;

d) dobrovoljno predati nasljeđeno oružje, bitne dijelove i municiju nadležnoj policijskoj stanici radi uništenja.

(5) Izuzetno od stava (4) ovog člana, nadležna policijska stanica će čuvati oružje, bitne dijelove i municiju maloljetnog nasljednika dok ne navrši 21 godinu života.

(6) Nasljednik iz stava (5) ovog člana sa navršenih 21 godinu života dužan je s oružjem i bitnim dijelovima i municijom postupiti na način propisan stavom (4) ovog člana.

(7) Prodato ili poklonjeno oružje i bitne dijelove nasljednik mora objavit u nadležnoj policijskoj stanici u roku od osam dana od dana zaključivanja ugovora o prodaji ili poklonu.

**Član 47.****(Postupci s nasljeđenim oružjem, bitnim dijelovima i municijom)**

(1) Nasljedniku oružja koji podnese zahtjev za registraciju nasljeđenog oružja, bitnih dijelova i municije nadležna policijska stanica izdaje odgovarajuću ispravu o oružju, ukoliko ispunjava uvjete iz člana 9. ovog zakona.

(2) Ukoliko nasljednik ne postupi u skladu sa članom 46. stav (4) ovog zakona ili mu je odbijen zahtjev za registraciju, oružje, bitni dijelovi i municija će se oduzeti i postupiti u skladu sa članom 52. ovog zakona.

(3) Ukoliko se u roku od pet godina od smrti vlasnika oružja ne provede ostavinska rasprava, odnosno, ako se ne proglašuje nasljednik oružja, bitnih dijelova i municije iz člana 46. ovog zakona, nadležna policijska uprava će donijeti rješenje kojim se oružje, bitni dijelovi i municija, uništava.

**POGLAVLJE IV. ODUZIMANJE  
VATRENOG ORUŽJA, BITNIH  
DIJELOVA, MUNICIJE I ISPRAVA O  
ORUŽJU**

**Član 48.**

**(Oduzimanje vatrenog oružja, bitnih  
dijelova, municije i isprava o oružju)**

(1) Sportskom strijelcu će se oduzeti poluautomatsko vatreno oružje sa središnjom udarnom iglom iz člana 6. stav (1) tačka a) podtačka 9) kategorije A, ako prestane ispunjavati uvjete iz člana 7. stav (2) ovog zakona.

(2) Vatreno oružje, bitni dijelovi, municija i isprave o oružju oduzimaju se od vlasnika oružja ako prestane ispunjavati uvjete iz člana 9., odnosno člana 16., 18. i 19. ovog zakona, kao i u slučaju kada se u njihovom posjedu zatekne spremnik za municiju koji se može pričvrstiti na poluautomatsko ili repetirajuće vatreno oružje sa središnjom udarnom iglom i koji može primiti više od 20 naboja ili u slučaju dugog vatrenog oružja može primiti više od 10 naboja.

(3) Vatreno oružje, bitni dijelovi i municija se oduzimaju u slučaju kada se ne može dokazati porijeklo i kada oružje nije obilježeno žigom iz člana 25. ovog zakona.

(4) Vatreno oružje, bitni dijelovi, municija i isprave o oružju oduzimaju se od vlasnika oružja koji u roku iz člana 24. ovog zakona ne izvrši zamjenu isprave o oružju.

(5) U slučajevima iz stava (2) ovog člana oduzima se i staro oružje.

(6) Vatreno oružje, bitni dijelovi, municija i isprave o oružju oduzimaju se u slučaju iz člana 44. ovog zakona.

(7) Vatreno oružje, bitni dijelovi, municija i isprave o oružju oduzimaju se u slučaju iz člana 46. ovog zakona.

(8) Vatreno oružje, bitni dijelovi, municija i isprave o oružju oduzimaju se u slučaju iz člana 49. ovog zakona.

(9) Ukoliko se oružje, bitni dijelovi, municija i isprave o oružju oduzimaju zbog kriminalističko – obavještajnih razloga ili zbog razloga koji ukazuju na povezanost sa licima iz kriminalističko – obavještajne evidencije iz člana 9. stav (2) tačka f) ovog Zakona u rješenju se neće posebno obrazlagati utvrđeno činjenično stanje.

(10) Postupak oduzimanja oružja, bitnih dijelova, municije i isprava o oružju, kao i način postupanja sa oružjem, bitnim dijelovima, municijom i ispravama o oružju nakon provedenog upravnog postupka utvrdit će se pravilnikom koji donosi ministar na prijedlog policijskog komesara.

**Član 49.**

**(Vanredni zdravstveni pregled)**

(1) Nadležna policijska uprava će uputiti na vanredni zdravstveni pregled vlasnika vatrenog oružja za kojeg se opravdano sumnja da više nije zdravstveno sposoban za držanje i nošenje vatrenog oružja.

(2) U slučaju iz stava (1) ovog člana vlasnik vatrenog oružja dužan je da u roku od 60 dana od dana upućivanja na zdravstveni pregled, dostavi uvjerenje o zdravstvenoj sposobnosti.

(3) Od vlasnika vatrenog oružja za koga je na zdravstvenom pregledu utvrđeno da je nesposoban za držanje i nošenje vatrenog oružja ili koji ne dostavi uvjerenje o zdravstvenoj sposobnosti za držanje vatrenog oružja u roku iz stava (2) ovog člana, nadležna policijska uprava će rješenjem oduzeti vatreno oružje, bitne dijelove, municiju i isprave o oružju i postupiti u skladu sa odredbama člana 52. ovog zakona.

**Član 50.****(Privremeno oduzimanje oružja, bitnih dijelova, municije i isprava o oružju)**

(1) Nadležna policijska uprava može od vlasnika privremeno oduzeti oružje, bitne dijelove, municiju i isprave o oružju ako postoje osnovi sumnje da:

a) je sa oružjem, bitnim dijelovima, municijom i ispravom o oružju izvršeno krivično djelo ili prekršaj;

b) su oružje, bitni dijelovi, municija i isprave o oružju pribavljeni krivičnim djelom ili prekršajem;

c) su oružje, bitni dijelovi, municija i isprave o oružju nastali izvršenjem krivičnog djela ili prekršaja.

(2) Oružje, municija i isprave o oružju mogu se privremeno oduzeti odmah i prije okončanja upravnog, prekršajnog ili krivičnog postupka ako postoje okolnosti koje ukazuju da bi oružje moglo biti zloupotrijebljeno ili ako to nalažu posebni razlozi sigurnosti i zaštite javnog reda i mira i sigurnosti građana ili se radi o poduzimanju hitnih mjera koje se ne mogu odlagati, a postojanje činjenica na kojima se zasniva rješenje je utvrđeno ili su učinjene vjerojatnim.

(3) U slučajevima iz stava (1) i (2) ovog člana, nadležna policijska stanica izdaje potvrdu o privremeno oduzetom oružju, bitnim dijelovima, municiji i ispravama o oružju.

**Član 51.****(Čuvanje oduzetog oružja i municije)**

Oduzeto oružje, bitni dijelovi, municija i isprave o oružju i privremeno oduzeto oružje, municija, dijelovi oružja i isprave o oružju čuva se u nadležnoj policijskoj stanici do okončanja postupka.

**Član 52.****(Postupak s oružjem, bitnim dijelovima, municijom i ispravama o oružju oduzetim u upravnom postupku)**

(1) Po pravosnažnosti rješenja o oduzimanju oružja, bitnih dijelova, municije i isprava o oružju, nadležna policijska uprava pozvat će vlasnika da u roku od šest mjeseci od dana pravosnažnosti rješenja oružje, bitne dijelove i municiju proda ili pokloni.

(2) Ako vlasnik oružja ne postupi u skladu sa stavom (1) ovog člana, oružje, bitni dijelovi i municija dostavljaju se Upravi policije, radi uništenja.

(3) Na kraju svake kalendarske godine Uprava policije donosi odluku o uništenju oduzetog oružja, bitnih dijelova i municije.

(4) Pravilnik o imenovanju i sastavu komisije za uništenje oružja, načinu i programu uništenja oružja, donosi ministar na prijedlog policijskog komesara.

**Član 53.****(Postupak sa oružjem, bitnim dijelovima i municijom oduzetim u prekršajnom ili krivičnom postupku i oružjem za koje se ne može utvrditi porijeklo)**

(1) Sa oružjem, bitnim dijelovima i municijom oduzetim u pravosnažno okončanom prekršajnom ili krivičnom postupku postupa se u skladu sa odlukom nadležnog suda.

(2) Za oružje o kojem nije odlučeno u sudskom postupku i za koje se ne može utvrditi porijeklo ili koje prije stavljanja u promet nije obilježeno žigom u skladu sa posebnim propisima nadležna policijska uprava će donijeti rješenje kojim se oružje, uništava.

**POGLAVLJE V. TRGOVAC ORUŽJEM I POSREDNIK****Član 54.****(Trgovina oružjem, bitnim dijelovima i municijom)**

(1) Trgovinom oružja, bitnim dijelovima i municijom kategorija B i C mogu se baviti pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje Uprave policije (u daljem tekstu: trgovac oružjem).

(2) Odobrenje iz stava (1) ovog člana izdat će se ako:

a) podnosilac zahtjeva priloži dokaz o vlasništvu ili ugovor o zakupu poslovnog prostora;

b) su ispunjeni prostorni i tehnički uvjeti za smještaj i čuvanje kojima se osigurava da oružje, bitni dijelovi i municija ne dođu u posjed neovlaštenih lica i ne ugroze sigurnost ljudi i objekata;

c) fizičko lice, odnosno odgovorno lice u pravnom licu i lice koje neposredno rukuje oružjem ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona.

(3) Postojanje uvjeta iz stava (2) ovog člana utvrđuje komisija u skladu sa pravilnikom iz člana 8. stav (7) i (8) ovog zakona.

(4) Trgovina oružjem, bitnim dijelovima oružja i municijom ne može se vršiti putem interneta.

(5) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uvjete iz stava (2) ovog člana.

(6) Odobrenje za trgovinu oružjem, bitnim dijelovima oružja i municijom će se ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uvjete iz stava (2) ovog člana.

**Član 55.****(Odobrenje za nabavljanje oružja, bitnih dijelova i municije radi prodaje)**

(1) Trgovac oružjem, oružje, bitne dijelove i municiju može nabavljati na osnovu odobrenja za nabavljanje radi prodaje.

(2) Odobrenje iz stava (1) ovog člana izdaje se za svaku ugovorenu količinu oružja, bitnih dijelova i municije i važi šest mjeseci od dana izdavanja.

(3) Zahtjev za izdavanje odobrenja iz stava (1) ovog člana podnosi se nadležnoj policijskoj upravi prema mjestu sjedišta trgovca oružjem, odnosno prema mjestu sjedišta podružnice i sadrži:

a) naziv i adresu trgovca oružjem (kupac);

b) naziv i adresu pravnog lica od koga se oružje nabavlja (prodavac);

c) vrstu, količinu i kalibar oružja, bitnih dijelova i municije;

d) naziv i adresu prevoznika.

(4) Odobrenje za nabavljanje oružja i municije iz stava (1) ovog člana neće se izdati ako zahtjev ne sadrži sve potrebne elemente iz stava (3) ovog člana i ako postoje okolnosti koje ukazuju na ugrožavanje opće sigurnosti građana.

(5) Ukoliko iz bilo kojih razloga posumnja u porijeklo ili ispravnost oružja, bitnih dijelova i municije, trgovac oružjem je dužan odbiti nabavljanje oružja, bitnih dijelova ili municije, te o navedenom odmah obavijestiti nadležnu policijsku upravu.

**Član 56.****(Prodaja oružja, bitnih dijelova i municije)**

(1) Trgovac oružjem može prodavati vatreno oružje i bitne dijelove kategorije B fizičkom i pravnom licu koje ima odobrenje za nabavljanje i posjedovanje vatrene oružja kategorije B, kao i oružje i bitne dijelove kategorije C u skladu sa odredbama ovog zakona.

(2) Nakon prodaje oružja ili bitnih dijelova iz stava (1) ovog člana trgovac oružjem je dužan u roku od osam dana od dana prodaje pismeno obavjestiti nadležnu policijsku upravu o prodaji oružja ili bitnih dijelova.

(3) Obavijest iz stava (2) ovog člana sadrži: datum prodaje oružja ili bitnih dijelova, podatke o kupcu (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku), naziv nadležnog organa koji je izdao odobrenje za nabavljanje i posjedovanje vatrenog oružja kategorije B, broj i datum odobrenja, serijski broj i datum izdavanja lične karte i naziv organa koji je izdao ličnu kartu kupca.

(4) Trgovac oružjem može prodavati municiju samo licima koja imaju važeću ispravu o oružju, a u roku od osam dana od dana prodaje dužan je o tome obavjestiti policijsku stanicu koja je izdala važeću ispravu o oružju.

(5) Obavijest iz stava (4) ovog člana sadrži: datum prodaje municije, podatke o kupcu (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o municiji (kalibar i broj komada), podatke o ispravi o oružju (serijski broj isprave, datum izdavanja i naziv organa koji je izdao ispravu), serijski broj i datum izdavanja lične karte i naziv organa koji je izdao ličnu kartu kupca.

(6) Prilikom prodaje oružja trgovac oružja je dužan da zadrži jedan primjerak odobrenja za nabavljanje i posjedovanje oružja, a na drugi primjerak da stavi zabilješku o izvršenoj prodaji i ovjeri je štambiljem i potpisom odgovornog lica.

## Član 57.

### (Popravljanje, modifikacija ili prepravljavanje vatrenog oružja, bitnih dijelova i municije)

(1) Popravljanjem, modifikacijom ili prepravljavanjem vatrenog oružja, bitnih dijelova i municije mogu se baviti pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje Uprave policije.

(2) Odobrenje iz stava (1) ovog člana izdat će se ako:

a) podnosilac zahtjeva priloži dokaz o vlasništvu ili ugovor o zakupu poslovnog prostora;

b) podnosilac zahtjeva priloži dokaz o položenom majstorskom ispitu za zanimanje puškar;

c) su ispunjeni prostorni i tehnički uvjeti za smještaj i čuvanje kojima se osigurava da vatreno oružje, bitni dijelovi i municija ne dođu u posjed neovlaštenih lica i ne ugroze sigurnost ljudi i objekata;

d) fizičko lice, odnosno odgovorno lice u pravnom licu i lice koje neposredno rukuje oružjem ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona.

(3) Postojanje uvjeta iz stava (2) ovog člana utvrđuje komisija u skladu sa pravilnikom iz člana 8. stav (7) i (8) ovog zakona.

(4) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uvjete iz stava (2) ovog člana.

(5) Odobrenja iz stava (1) ovog člana će se ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uvjete iz stava (2) ovog člana.

**Član 58.****(Vatreno oružje i bitni dijelovi koji mogu biti predmet popravljivanja, modifikacije ili prepravljivanja)**

(1) Pravna i fizička lica registrirana za obavljanje djelatnosti iz člana 57. ovog zakona mogu primiti radi popravljivanja, modifikacije ili prepravljivanja samo oružje za koje je izdata važeća isprava o oružju kategorije B i važeća isprava o oružju iz člana 7. stav (2) ovog zakona.

(2) Pravno i fizičko lice iz stava (1) ovog člana o izvršenoj popravci, modifikaciji ili prepravci vlasniku oružja izdaje potvrdu i u roku od 48 sati u pisanoj formi obaviještava nadležnu policijsku stanicu.

(3) Obavijest iz stava (2) ovog člana sadrži: datum prijema oružja radi popravke i modifikacije ili prepravke, podatke o vlasniku (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o vatrenom oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku), podatke o ispravi o oružju (serijski broj isprave, datum izdavanja i naziv organa koji je izdao ispravu), razlog popravke, modifikacije ili prepravke vatrenog oružja, datum preuzimanja vatrenog oružja, serijski broj i datum izdavanja lične karte i naziv organa koji je izdao ličnu kartu vlasnika oružja.

(4) Nadležna policijska stanica, po prijemu prijave o izvršenoj popravci, modifikaciji ili prepravci, podatke unosi u isprave o oružju i evidencije.

(5) Oružje koje je primljeno radi popravke, modifikacije ili prepravke ne smije se iznositi iz prostorija određenih za rad do njegove predaje vlasniku.

(6) Izuzetno, od stava (5) ovog člana, vatreno oružje i bitni dijelovi koji su primljeni radi popravke, modifikacije ili prepravke, smije se iznositi iz prostorija određenih za rad, prije njegove predaje vlasniku, radi funkcionalne probe.

**Član 59.****(Odobrenje za posredovanje)**

(1) Pregovaranjem ili ugovaranjem transakcija za kupovinu ili prodaju vatrenog oružja, bitnih dijelova ili municije, ili opskrbu njima, kao i dogovaranjem transfera vatrenog oružja, bitnih dijelova ili municije mogu se baviti pravna i fizička lica koja nakon registracije za obavljanje takve djelatnosti dobiju odobrenje Uprave policije.

(2) Odobrenje iz stava (1) ovog člana izdaje se za svako ugovoreno posredovanje oružja, bitnih dijelova ili municije i važi šest mjeseci od dana izdavanja.

(3) Odobrenje iz stava (1) ovog člana izdat će se ako:

a) podnosilac zahtjeva priloži rješenje o upisu u sudski registar, odnosno odobrenje za rad nadležnog općinskog organa i ugovor o posredovanju kojim se posrednik obavezuje da drugu ugovornu stranu dovede u vezu sa nekim trećim licem radi zaključivanja ugovora;

b) fizičko lice, odnosno odgovorno lice u pravnom licu, kao i lica zaposlena kod pravnog ili fizičkog lica iz stava (1) ovog člana, ispunjavaju uvjete iz člana 9. stav (2) tačke a), b), d), e) i f) i stav (3) tačke a) i b) ovog zakona.

(4) Postojanje uvjeta iz stava (3) ovog člana utvrđuje komisija u skladu sa pravilnikom iz člana 8. stav (7) i (8) ovog zakona.

(5) Zahtjev za izdavanje odobrenja za posredovanje će se odbiti ako podnosilac zahtjeva ne ispunjava uvjete iz stava (3) ovog

člana ili ako se utvrdi da bi se izdavanjem ovog odobrenja ugrozila javna sigurnost.

(6) Odobrenje za posredovanje će se ukinuti ako posrednik nakon izdavanja odobrenja prestane ispunjavati uvjete iz stava (3) ovog člana.

#### **Član 60.**

##### **(Obaveze trgovca oružjem i posrednika i odgovornost ugovornih strana)**

(1) Trgovci oružjem i posrednici dužni su odbiti svaku transakciju za kupovinu ili prodaju vatrenog oružja, bitnih dijelova ili municije ili opskrbu njima, kao i pregovaranje ili ugovaranje transakcija za kupovinu ili prodaju vatrenog oružja, bitnih dijelova ili municije ili opskrbu njima ili dogovaranje transfera vatrenog oružja, bitnih dijelova ili municije, ukoliko iz bilo kojih razloga posumnjaju u porijeklo ili ispravnost vatrenog oružja, bitnih dijelova i municije, zbog njezine prirode ili opsega, te su o navedenom dužni odmah obavijestiti Upravu policije.

(2) Odgovornost ugovornih strana utvrđuje se prema općim pravilima obligacionog prava.

## **POGLAVLJE VI . ONESPOSABLJAVANJE VATRENOG ORUŽJA**

#### **Član 61.**

##### **(Uvjeti za onesposobljavanje vatrenog oružja)**

(1) Onesposobljavanjem vatrenog oružja mogu se baviti pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje Uprave policije.

(2) Odobrenje iz stava (1) ovog člana će se izdati ako:

a) podnosilac zahtjeva priloži dokaz o vlasništvu ili ugovor o zakupu poslovnog prostora;

b) podnosilac zahtjeva priloži dokaz o položenom majstorskom ispitu za zanimanje puškar;

c) su ispunjeni prostorni i tehnički uvjeti za smještaj i čuvanje kojima se osigurava da oružje ne dođe u posjed neovlaštenih lica i ne ugrozi sigurnost ljudi i objekata;

d) fizičko lice, odnosno odgovorno lice u pravnom licu i lice koje neposredno rukuje oružjem ispunjava uvjete iz člana 9. stav (2) tačka a), b), d), e) i f) i stava (3) tačka a) i b) ovog zakona.

(3) Postojanje uvjeta iz stava (2) ovog člana utvrđuje komisija u skladu sa pravilnikom iz člana 8. stav (7) i (8) ovog zakona.

(4) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uvjete iz stava (2) ovog člana.

(5) Odobrenje iz stava (1) ovog člana će se ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uvjete iz stava (2) ovog člana.

#### **Član 62.**

##### **(Vatreno oružje koje može biti predmet onesposobljavanja)**

U smislu ovog zakona predmet onesposobljavanja može biti vatreno oružje:

a) pištolji (jednostrijelni i poluautomatski);

b) revolveri (uključujući revolvare koji se pune na bubnju);

c) jednostrijelno dugocijevno vatreno oružje (koje se ne puni prelamanjem);

d) vatreno oružje koje se puni prelamanjem (npr. s olučenom (užlijebljenom), neolučenom (glatkom) cijevi, kombinacijom olučene (užlijebljene) ili neolučene (glatke) s padajućim ili okretnim blokom, kratkocijevno i dugocijevno vatreno oružje);

e) repetirajuće dugocijevno vatreno oružje (s olučenom (užlijebljenom) ili neolučenom (glatkom) cijevi);

f) poluautomatsko dugocijevno vatreno oružje (s olučenom (užlijebljenom) ili neolučenom (glatkom) cijevi);

g) automatsko vatreno oružje: npr. jurišne puške, strojnice i kratke strojnice, automatski pištolji;

h) vatreno oružje koje se puni s usta cijevi uključujući oružje koje se puni prelamanjem (osim revolvera koji se pune na bubnju).

### **Član 63.**

#### **(Provjera i potvrđivanje onesposobljavanja vatrenog oružja)**

(1) Fizičko i pravno lice iz člana 61. ovog zakona dužno je da o onesposobljavanju vatrenog oružja u roku od 48 sati obavijesti upravu policije.

(2) Obavijest iz stava (1) ovog člana sadrži: datum prijema oružja radi onesposobljavanja, podatke o vlasniku oružja (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku), podatke o ispravi o oružju (serijski broj isprave, datum izdavanja i naziv organa koji je izdao ispravu), naznaku da je oružje onesposobljeno u skladu sa tehničkim specifikacijama vatrenog oružja, datum preuzimanja oružja, serijski broj i datum izdavanja lične karte i naziv organa koji je izdao ličnu kartu kupca oružja.

(3) Uprava policije vršit će provjere da li je vatreno oružje onesposobljeno u skladu s tehničkim specifikacijama za onesposobljavanje vatrenog oružja utvrđenim pravilnikom o onesposobljavanju vatrenog oružja koji donosi ministar na prijedlog policijskog komesara.

(4) Ako je onesposobljavanje vatrenog oružja provedeno u skladu s tehničkim specifikacijama za onesposobljavanje vatrenog oružja utvrđenim u pravilniku o onesposobljavanju oružja, Uprava policije vlasniku vatrenog oružja izdaje potvrdu o onesposobljavanju oružja.

(5) Potvrda iz stava (4) ovog člana sadrži: naziv pravnog ili fizičkog lica koje je provelo onesposobljavanje, datum izdavanja potvrde o onesposobljavanju, podaci o onesposobljenom vatrenom oružju i bitnim dijelovima (proizvođač, vrsta, tip, marka, serijski broj i kalibar).

(6) Vlasnik onesposobljenog vatrenog oružja potvrdu iz stava (4) ovog člana čuva trajno.

(7) Ako je onesposobljeno vatreno oružje stavljeno u promet uz njega se prilaže potvrda o onesposobljavanju.

### **Član 64.**

#### **(Označivanje onesposobljenog vatrenog oružja)**

(1) Onesposobljeno vatreno oružje označava se zajedničkom jedinstvenom oznakom kako bi se naznačilo da je onesposobljeno u skladu s tehničkim specifikacijama utvrđenima u pravilniku o onesposobljavanju vatrenog oružja.

(2) Prilikom onesposobljavanja vatrenog oružja izvorni serijski brojevi vatrenog oružja moraju biti sačuvani.

(3) Uprava policije na sve bitne dijelove koji su prepravljani radi onesposobljavanja vatrenog oružja stavlja oznaku koja mora sadržavati naziv: "Bosna i Hercegovina Federacija Bosne i Hercegovine Unsko-sanski kanton Ministarstvo unutrašnjih poslova Uprava policije", mora biti jasno vidljiva i stavljena na takav način da se ne može ukloniti i mora sadržavati podatke o fizičkom ili pravnom licu koje je provelo onesposobljavanje.



**POGLAVLJE VII. CIVILNA STRELIŠTA****Član 65.  
(Osnivanje civilnih streljšta)**

(1) Civilno streljšte za obavljanje sportske djelatnosti, djelatnosti za provođenje obuke u rukovanju vatrenim oružjem ili druge djelatnosti mogu osnovati pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje Uprave policije.

(2) Odobrenje iz stava (1) ovog člana izdat će se ako:

a) su ispunjeni prostorni i tehnički uvjeti za čuvanje, smještaj i upotrebu oružja i municije, kojima se obezbjeđuje da oružje i municija ne dođe u posjed neovlaštenih lica i ne ugrozi sigurnost ljudi i objekta;

b) ako osnivač civilnog streljšta i lice koje neposredno rukuje oružjem na civilnom streljštu ispunjava uvjete iz člana 9. stav (2) tačka a), b), d), e) i f) i stava (3) tačka a) ovog zakona.

c) ako lica iz stava (2) tačke b) ovog člana posjeduju certifikat obrazovne ili stručne ustanove ili druge odgovarajuće organizacije ili institucije za certificiranog instruktora za vatreno oružje ili za certificiranog instruktora za provođenje obuke u rukovanju vatrenim oružjem.

(3) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uvjete iz stava (2) ovog člana.

(4) Odobrenje za osnivanje civilnih streljšta Uprava policije će ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uvjete iz stava (2) ovog člana.

(5) Odredbe ovog zakona ne primjenjuju se na lovačka streljšta koja pravna lica registrovana za obavljanje djelatnosti lova u okviru lovišta upotrebljavaju za gađanje i probu lovačkog oružja svojih članova prema propisima o lovstvu.

(6) Uvjete iz stava (2) ovog člana utvrđuje komisija u skladu sa pravilnikom iz člana 8. stav (7) ovog zakona.

(7) Bliže odredbe o prostornim i tehničkim uvjetima za čuvanje, smještaj i upotrebu oružja i municije na civilnim streljštima, broj i vrsta oružja u vlasništvu civilnog streljšta, način korištenja oružja i municije na civilnom streljštu i vođenje civilnog streljšta, utvrđuju se pravilnikom koji donosi ministar na prijedlog policijskog komesara.

**Član 66.  
(Upotreba oružja na civilnom streljštu)**

(1) Na civilnom streljštu samo fizičko lice kojem je izdata isprava o oružju može vršiti gađanje, svojim vlastitim ili oružjem u vlasništvu streljšta na kojem se vrši gađanje.

(2) Članovi sportskih streljačkih organizacija mogu na civilnom streljštu koristiti vatreno oružje i municiju koji su vlasništvo sportskih streljačkih organizacija.

(3) Fizičko lice kojem nije izdata isprava o oružju može vršiti gađanje pod nadzorom ovlaštenog lica civilnog streljšta i isključivo sa oružjem i municijom koje je vlasništvo civilnog streljšta.

(4) Ovlašteno lice civilnog streljšta će zabraniti izvođenje gađanja i pristup licima iz stava (1), (2) i (3) ovog člana, ako njihovo ponašanje ukazuje da su pod dejstvom alkoholola, opojnih droga ili drugih omamljujućih sredstava ili ako njihovo psihofizičko stanje ukazuje na nesposobnost rukovanja oružjem.

**Član 67.**  
**(Nabavljanje oružja za potrebe  
civilnog strelišta)**

(1) Nabavljanje vatrenog oružja za potrebe civilnog strelišta vrši se na osnovu izdatog odobrenja za osnivanje civilnog strelišta i u skladu sa pravilnikom iz člana 65. stav (7) ovog zakona.

(2) Odobrenje iz stava (1) ovog člana izdaje policijska uprava prema mjestu sjedišta civilnog strelišta, odnosno prema mjestu sjedišta podružnice civilnog strelišta.

(3) U slučaju prestanka rada civilnog strelišta ili u slučaju prestanka ispunjavanja uvjeta za osnivanje i rad civilnih strelišta, odnosno ako osnivač civilnog strelišta prestane ispunjavati opće i posebne uvjete iz člana 9. ovog zakona, policijska uprava donosi rješenje o oduzimanju oružja, municije i isprava o oružju.

**POGLAVLJE VIII. MEHANIČKI TRAG  
VATRENOG ORUŽJA**

**Član 68.**  
**(Uzimanje mehaničkog traga  
vatrenog oružja)**

(1) Nadležna policijska stanica će u postupku registracije za vatreno oružje koje se prvi put registruje uzimati mehanički trag vatrenog oružja, ukoliko je dostavljen od strane proizvođača oružja radi unosa u evidenciju o mehaničkom tragu vatrenog oružja.

(2) Vlasnik vatrenog oružja dužan je na poziv nadležne policijske stanice donijeti vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja.

(3) U slučaju zamjene bitnih dijelova vlasnik je dužan u roku od 8 dana donijeti vatreno oružje radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja.

(4) Vlasnik oružja kojem zbog tehničke neispravnosti nije moguće uzeti mehanički trag vatrenog oružja može vatreno oružje onesposobiti ili predati nadležnoj policijskoj stanici na uništenje u skladu sa ovim zakonom.

(5) Način uzimanja, evidentiranja, pohranjivanja i čuvanja mehaničkog traga vatrenog oružja urediće se pravilnikom, koji donosi ministar na prijedlog policijskog komesara.

**POGLAVLJE IX. NADZOR**

**Član 69.**  
**(Nadzor)**

(1) Nadzor nad primjenom ovog zakona provodi Uprava policije Ministarstva unutrašnjih poslova.

(2) Nadzor iz stava (1) ovog člana provodi Komisija za nadzor koju imenuje policijski komesar Uprave policije.

(3) Način imenovanja i sastav komisije za nadzor, nadležnost i način rada, kao i druga pitanja od značaja za rad komisije, propisuje ministar na prijedlog policijskog komesara.

**Član 70.**  
**(Ovlaštenja u vršenju  
neposrednog nadzora)**

(1) U obavljanju nadzora Komisija iz člana 69. ovog zakona je ovlaštena da:

a) prati i kontroliše implementaciju ovog zakona i podzakonskih akata donesenih u skladu sa ovim zakonom;

b) predlaže izmjene ovog zakona i podzakonskih akata kada utvrdi da neke odredbe nije moguće primjenjivati zbog izmjena u zakonima ili u načelima;

c) predlaže i poduzima inicijativu za rješavanje pitanja iz ove oblasti;

d) prikuplja neophodne podatke, sačinjava izvještaje, informacije i podnosi ih policijskom komesaru;

e) pregleda i kontroliše skladišta oružja i municije, civilna strelišta i druge prostorije gdje se drži i čuva oružje i municija, obavlja trgovina, popravlanje, modifikacija ili prepravlanje, onesposobljavanje oružja, te spravljanje municije;

f) vrši nadzor nad postupanjem sa oružjem i municijom i pregled propisanih evidencija i ostale dokumentacije u vezi s držanjem, sakupljanjem, kolekcionarstvom i čuvanjem oružja i municije, trgovinom, posredovanjem, popravlanjem, modifikacijom ili prepravlanjem i onesposobljavanjem oružja, spravljanjem municije, osposobljavanjem lica za rukovanjem oružjem i vođenjem civilnog strelišta;

g) predloži privremenu zabranu obavljanja čuvarske službe, trgovine, posredovanja, popravlanja, modifikacije ili prepravlanja i onesposobljavanja oružja, spravljanja municije, osposobljavanja lica za rukovanjem oružjem, te upotrebu civilnog strelišta i naredi da se utvrđene nepravilnosti otklone u određenom roku;

h) predloži zabranu obavljanja čuvarske službe, trgovine, posredovanja, popravlanja, modifikacije ili prepravlanja i onesposobljavanja oružja, spravljanja municije, osposobljavanja lica za rukovanjem oružjem, te upotrebu civilnog strelišta ako utvrdi da je u obavljanju tih poslova učinjen teži propust u preduzimanju zaštitnih ili drugih sigurnosnih mjera ili druge teže kažnjive radnje ili ukoliko je prestao jedan od uvjeta pod kojima je odobrenje izdato ili ako se ne postupi po nalogu nadležnog organa;

i) predloži preduzimanje i drugih propisanih mjera.

(2) Fizička i pravna lica, kao i organizacione jedinice Uprave policije dužni su omogućiti obavljanje nadzora i dati na uvid traženu dokumentaciju, kao i pružiti potrebne podatke i obavijesti.

## POGLAVLJE X. EVIDENCIJE

### Član 71.

#### (Evidencije nadležnog organa)

(1) Uprava policije vodi evidencije o:

a) izdatim odobrenjima za provođenje obuke u rukovanju vatrenim oružjem;

b) izdatim odobrenjima za trgovinu oružjem bitnim dijelovima i municijom;

c) izdatim odobrenjima za popravlanje i modifikaciju ili prepravlanje vatrenog oružja, bitnih dijelova i municije;

d) izdatim odobrenjima za posredovanje;

e) izdatim odobrenjima za onesposobljavanje vatrenog oružja;

f) izdatim potvrdama o onesposobljenom vatrenom oružju;

g) izdatim odobrenjima za osnivanje civilnog strelišta.

(2) Policijska uprava vodi evidencije o:

a) izdatim odobrenjima za nabavljanje i posjedovanje vatrenog oružja i bitnih dijelova fizičkom licu;

b) izdatim odobrenjima za nabavljanje i posjedovanje vatrenog oružja pravnom licu radi naoružanja čuvara;

c) izdatim uvjerenjima o ispunjavanju uvjeta za neposredno rukovanje oružjem i municijom;

d) izdatim odobrenjima za nabavljanje i posjedovanje vatrenog oružja i municije radi obavljanja muzejske djelatnosti;

e) izdatim odobrenjima za nabavljanje i posjedovanje vatrenog oružja za potrebe lovačke ili sportske streljačke organizacije ili ustanove koja posjeduje odobrenje za provođenje obuke u rukovanju vatrenim oružjem, naučnog istraživanja za koje je potrebno oružje, snimanja filmskih i

prikazivanja pozorišnih predstava, te za potrebe aerodroma radi odstrela, plašenja i rastjerivanja ptica i divljači;

f) izdatim odobrenjima za spravljanje municije;

g) izdatim odobrenjima za nabavljanje eksplozivnih materija u svrhu spravljanja municije;

h) izdatim odobrenjima za sakupljanje i držanje starog oružja i izdatim kolekcionarskim dozvolama;

i) izdatim rješenjima o oduzimanju vatrenog oružja, bitnih dijelova, municije i isprava o oružju;

j) izdatim rješenjima o privremenom oduzimanju vatrenog oružja, bitnih dijelova, municije i isprava o oružju;

k) upućivanju na vanredni zdravstveni pregled vlasnika oružja;

l) izdatim odobrenjima za nabavljanje vatrenog oružja, bitnih dijelova i municije radi prodaje;

m) izdatim odobrenjima za nabavljanje oružja za potrebe civilnog strelišta.

(3) Policijska stanica vodi evidencije o:

a) izdatim oružnim listovima;

b) izdatim odobrenjima za držanje vatrenog oružja;

c) izdatim dozvolama za nošenje vatrenog oružja;

d) izdatim oružnim listovima za držanje starog oružja;

e) izdatim potvrdama za prijavljeno oružje kategorije C;

f) dobrovoljno predatom oružju kategorije B i C;

g) izdatim potvrdama u slučaju napuštanja mjesta prebivališta ili boravišta duže od tri mjeseca;

h) zaprimljenim obavještenjima o izdatim potvrdama o prenošenju oružja i municije;

i) izdatim potvrdama u slučaju prestanka potrebe za držanjem i posjedovanjem vatrenog oružja i municije pravnih lica;

j) izdatim potvrdama o nestanku ili krađi oružja, bitnih dijelova i municije ili isprava o oružju;

k) raspisanim potragama o nestanku ili krađi oružja, bitnih dijelova i municije ili isprava o oružju;

l) pronađenom oružju, bitnim dijelovima, municiji i ispravama o oružju;

m) izdatim potvrdama o predatom na čuvanje oružju, bitnih dijelova, municiju i isprava o oružju u slučaju smrti vlasnika oružja;

n) oduzetom vatrenom oružju bitnim dijelovima, municiji i ispravama o oružju;

o) privremeno oduzetom vatrenom oružju bitnim dijelovima, municiji i ispravama o oružju;

p) popravljenom, modificiranom ili prepravljenom vatrenom oružju i municiji;

r) onesposobljenom vatrenom oružju;

s) mehaničkom tragu vatrenog oružja;

t) dobrovoljno predatom vatrenom oružju, bitnim dijelovima i municiji kategorije A;

u) predatom vatrenom oružju po amnestiji;

v) uništenom vatrenom oružju kategorije B;

z) uništenom vatrenom oružju kategorije A.

(4) Evidencije iz ovog člana čuvaju se trajno.

(5) Obrasci, sadržaj i način vođenja evidencija iz ovog člana utvrđuje se pravilnikom, koji donosi ministar na prijedlog policijskog komesara.

**Član 72.**  
**(Evidencije pravnih i fizičkih lica)**

(1) Pravna lica i fizička lica registrirana za obavljanje djelatnosti, uključujući i sportske streljačke organizacije i lovačke organizacije vode evidencije:

- a) nabavljenom oružju B i C kategorije,
- b) nabavljenoj municiji;
- c) izdatim potvrdama za nošenje i prenošenje oružja i municije.

(2) Trgovac oružjem dužan je voditi evidencije o:

- a) nabavljenom oružju, bitnim dijelovima i municiji;
- b) prodatom oružju;
- c) prodatoj municiji,
- d) popraavljenom, modificiranom ili prepravljenoj oružju i municiji.

(3) Posrednik je dužan voditi posebnu knjigu o zaključenim ugovorima o posredovanju u vezi transakcija za kupovinu ili prodaju vatrenog oružja, bitnih dijelova ili municije, ili opskrbu njima.

(4) Pravno lice koje se bavi onesposobljavanjem vatrenog oružja i municije ili fizičko lice registrirano za obavljanje djelatnosti onesposobljavanja vatrenog oružja i municije dužno je voditi evidenciju o onesposobljenom vatrenom oružju.

(5) Pravno lice koje se bavi vođenjem civilnog strelišta ili fizičko lice registrirano za obavljanje djelatnosti vođenja civilnog strelišta dužno je voditi evidencije o:

- a) nabavljenom oružju i municiji;
- b) nabavljenoj municiji;

c) registrovanom oružju koje je u vlasništvu civilnog strelišta;

d) evidencije o korištenom oružju koje se upotrebljava prilikom gađanja;

e) evidencije o utrošenoj municiji;

f) evidencije o licima koja koriste usluge civilnog strelišta;

g) evidencije o licima obučanim za rukovanje oružjem.

(6) Pravno i fizičko lice kojem je izdato odobrenje za sakupljanje i držanje starog oružja ili kolekcionarstva dužno je voditi:

a) evidenciju o sakupljenom starom oružju i evidenciju oružja koje drži na osnovu kolekcionarske dozvole i

b) evidencije o sakupljenom hladnom, automatskom i poluautomatskom oružju i bitnim dijelovima kategorije A.

(7) Fizičko lice kojem je izdato odobrenje za spravljanje municije dužno je voditi evidenciju o spravljenoj municiji.

(8) Evidencije iz ovog člana čuvaju se trajno.

(9) Trgovci oružjem, posrednici, pravna i fizička lica koja se bave onesposobljavanjem oružja dužni su u roku od 15 dana od dana prestanka obavljanja djelatnosti evidencije iz stava (2), (3) i (4) ovog člana dostaviti Upravi policije.

(10) Trgovci oružjem, posrednici pravna i fizička lica koja se bave onesposobljavanjem oružja dužni su odmah prijaviti nabavljanje i prodaju, odnosno izvršeno posredovanje oružja, bitnih dijelova i municije, odnosno izvršeno onesposobljavanje vatrenog oružja u bazu podataka iz člana 88. ovog zakona.

(11) Obrasci, sadržaj i način vođenja evidencija iz ovog člana utvrđuje se pravilnikom koji donosi ministar na prijedlog policijskog komesara.

**POGLAVLJE XI. KAZNENE ODREDBE****ODJELJAK A. KRIVIČNO DJELO****Član 73.**

**(Neovlašteno nabavljanje, posjedovanje, držanje, nošenje, trgovina, popravljanje, modifikacija ili prepravljanje i posredovanje oružjem, bitnim dijelovima i municijom)**

(1) Kaznom zatvora do tri godine kaznit će se za krivično djelo:

a) ko bez važeće isprave o oružju nabavi, posjeduje, drži ili nosi vatreno oružje, bitne dijelove ili municiju za oružje kategorije B;

b) ko proda vatreno oružje ili posreduje u trgovini oružjem, bitnim dijelovima ili municijom kategorije B fizičkom ili pravnom licu koje nema odobrenje za nabavljanje i posjedovanje tog oružja;

c) ko prepravlja napravu s ležištem municije za ispaljivanje sačme, zrna ili projektila djelovanjem zapaljivog potisnog sredstva;

d) ko popravlja, modifikuje ili prepravlja vazdušno, gasno, airsoft i paintball naprave i reprodukcije oružja, za ispaljivanje bojeve municije;

e) trgovac oružjem ako nabavi oružje i municiju bez odobrenja za nabavljanje radi prodaje;

f) ko drži staro oružje bez odobrenja za sakupljanje i držanje starog oružja ili ko nosi ili upotrebljava staro oružje ili nabavlja, drži ili spravlja municiju za to oružje ili proda staro oružje licu koje nema odobrenje za sakupljanje i držanje starog oružja;

g) ko nabavi eksplozivne materije u svrhu spravljanja municije ili ko spravlja municiju bez odobrenja;

h) ko popravlja, modifikuje ili prepravlja vatreno oružje ili bitne dijelove oružja ili ko

onesposobljava oružje bez odobrenja ili popravlja, modifikuje ili prepravlja ili onesposobljava vatreno oružje ili bitne dijelove za koje nije izdata važeća isprava o oružju kategorije B ili ko onesposobljava oružje koje ne može biti predmet onesposobljavanja.

(2) Za krivična djela iz stava (1) ovog člana obavezno se izriče i sigurnosna mjera oduzimanja oružja, bitnih dijelova, municije i isprava o oružju.

**ODJELJAK B - PREKRŠAJI****Član 74.**

**(Novčana kazna od 1000,00 do 1.500,00 KM i zaštitna mjera za prekršaje fizičkih lica)**

(1) Novčanom kaznom od 1000,00 KM do 1.500,00 KM kaznit će se fizičko lice za prekršaj, ako:

a) nabavi, posjeduje, drži i trguje hladnim oružjem kojem je osnovna namjena napad ili nanošenje ozljeda ili nosi takvo hladno oružje na javnom mjestu, osim u svrhu sportskog takmičenja (član 7. stav (3));

b) nabavi, posjeduje, drži i trguje podvodnim puškama i drugim predmetima, koji snagom opruge, napete gume ili sabijenog plina izbacuju osti ili harpun i koji su isključivo namijenjeni ribolovu (član 7. stav (4));

c) drži ili nosi oružje kategorije C bez odgovarajuće potvrde o prijavi oružja (član 7. stav (6));

d) nabavi, drži ili nosi oružje kategorije C, a nije navršilo 21 godinu života (član 7. stav (7));

e) u roku od 15 dana prije datuma isteka važnosti isprave o oružju ne podnese zahtjev za zamjenu isprave o oružju (člana 24. stav (3));

f) proda oružje kategorije C fizičkom licu koje nije navršilo 21 godinu života (član 32. stav (5));

g) drži i nosi oružje bez odgovarajuće isprave o oružju i isprave o identitetu vlasnika oružja (član 36. stav (1));

h) nosi oružje na javnim, vjerskim i sportskim okupljanjima u školama, zdravstvenim i javnim ustanovama i javnim preduzećima, ugostiteljskim objektima i prostorima koji se koriste za pružanje ugostiteljskih usluga, kao i na drugim mjestima ili objektima gdje je znakom javno istaknuta zabrana nošenja oružja (član 36. stav (5));

i) nosi oružje pod uticajem alkohola, opojnih droga ili drugih omamljujućih sredstava u organizmu u količini većoj od 0,00 g/kg (član 36. stav (6));

j) nosi oružje na javnom mjestu na način kojim može izazvati osjećanje fizičke ugroženosti, uznemirenosti i negodovanja građana (član 36. stav (7));

k) ne čuva oružje i municiju na način da nije dostupno maloljetnom ili drugom neovlaštenom licu, a koje nije zaključano i odvojeno u metalnom ormaru, sefu ili sličnom spremištu koje se ne može otvoriti alatom uobičajne upotrebe (član 37. stav (1));

l) ne čuva oružje i municiju u stambenom ili drugom odgovarajućem prostoru koji se nalazi u mjestu prebivališta ili boravišta vlasnika oružja i municije (član 37. stav (2));

m) upotrebljava oružje na javnom mjestu i drugim mjestima čime ugrožava sigurnost ljudi i objekata, te narušava javni red i mir (član 40. stav (2));

n) upotrebljava lovačko ili sportsko oružje izvan lovišta, odnosno strelišta ili drugih mjesta koja su određena za vježbe gađanja (član 40. stav (3));

o) vazdušno oružje i luk da na upotrebu djeci mlađoj od 12 godina na strelištima i drugim mjestima određenim i uređenim za vježbe gađanja bez nadzora trenera i bez saglasnosti oba roditelja ili staratelja (član 40. stav (5));

p) ne donese na ispitivanje i tehnički pregled oružje po pozivu nadležne policijske stanice (član 40. stav 6.);

r) nosi oružje i municiju kada ne obavlja vježbe gađanja ili ne obavlja poslove zaštite i čuvanja (član 41. stav (2));

s) na poziv nadležne policijske stanice ne donese vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 68. stav (2));

t) u slučaju zamjene bitnih dijelova oružja u roku od osam dana ne donese vatreno oružje nadležnoj policijskoj stanici radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 68. stav (3));

u) zbog tehničke neispravnosti ne onesposobi ili ne preda vatreno oružje na uništenje nadležnoj policijskoj stanici (član 68. stav (4));

v) ne omogući obavljanje nadzora ili ne da na uvid traženu dokumentaciju ili ne pruži potrebne podatke i obavijesti (član 70. stav (2));

z) ne podnese zahtjev za zamjenu isprava o oružju do isteka roka naznačenog u ispravi (član 83.);

(2) Za prekršaje iz stava (1) ovog člana obavezno se izriče i zaštitna mjera oduzimanja oružja, bitnih dijelova, municije i isprava o oružju.

**Član 75.****(Novčana kazna od 500,00 KM do 1000,00 KM i zaštitna mjera za prekršaje fizičkih lica)**

(1) Novčanom kaznom od 500,00 KM do 1000,00 KM kaznit će se fizičko lice za prekršaj, ako:

a) u propisanom roku ne podnese zahtjev za registraciju vatrenog oružja i bitnih dijelova radi izdavanja oružnog lista (član 23. stav (1));

b) u propisanom roku ne vrati nadležnoj policijskoj upravi odobrenje za nabavljanje eksplozivnih materija radi spravljanja municije (član 30. stav (3));

c) ne prijavi nadležnoj policijskoj stanici nabavljanje oružja kategorije C u propisanom roku (član 32. stav (2));

d) ne prijavi nadležnoj policijskoj stanici prodaju oružja kategorije C u propisanom roku (član 32. stav (4));

e) sa oružjem i municijom ne postupa s naročitom pažnjom (član 35. stav (1)),

f) nosi oružje na način kojim se ugrožava lična sigurnost ili sigurnost drugih lica (član 36. stav (2)),

g) prenosi oružje radi popravljavanja, modifikacije ili prepravljavanja, onesposobljavanja ili korištenja na strelištu koje je napunjeno i sastavljeno ili ako pripadajuća municija nije fizički odvojena od oružja, u odgovarajućim navlakama ili kovčezima (član 36. stav (3));

h) van lovišta, odnosno strelišta drži, odnosno nosi vatreno ili vazdušno oružje bez futrole ili kovčega ili koje je napunjeno (član 36. stav (4));

i) ne održava oružje u ispravnom stanju, nepravilno i neoprezno rukuje sa oružjem (član 40. stav (1));

j) vazdušno oružje i luk upotrebljava na mjestima na kojim se može ugroziti sigurnost građana (član 40. stav (4));

k) prenosi oružje do svog mjesta stanovanja bez izdate potvrde o prenošenju oružja i municije (član 41. stav 3.)).

(2) Za prekršaje iz stava (1) tačka: a), b), e) i i) ovog člana obavezno se izriče i zaštitna mjera oduzimanja oružja, bitnih dijelova oružja i municije i isprava o oružju.

**Član 76.****(Novčana kazna od 200,00 KM do 500,00 KM i zaštitna mjera za prekršaje fizičkih lica)**

(1) Novčanom kaznom od 200,00 KM do 500,00 KM kaznit će se fizičko lice za prekršaj, ako:

a) u propisanom roku ne vrati odobrenje za nabavljanje i posjedovanje vatrenog oružja i bitnih dijelova kategorije B (član 21. stav (2));

b) ne izvrši odjavu oružja kod nadležne policijske stanice u roku od osam dana od dana prodaje (član 31. stav (6)).

c) u propisanom roku ne prijavi nabavljanje ili prodaju optičkog nišana (član 32. stav (6));

d) u propisanom roku ne odjavi oružje i ne preda isprave o oružju (član 34. stav (2));

e) u propisanom roku ne obavijesti nadležnu policijsku stanicu o izvršenoj zamjeni oružja i ne podnese zahtjev za registraciju i izdavanje isprava o oružju (član 34. stav (4));

f) ne preda nadležnoj policijskoj stanici vatreno oružje i bitne dijelove za koje ne postoji mogućnost popravke, modifikacije ili prepravke (član 38.);

g) ne preda na čuvanje oružje, bitne dijelove i municiju fizičkom licu koje posjeduje ispravu o oružju za takvo oružje kada napusti mjesto prebivališta ili boravišta duže od tri mjeseca (član 39. stav (1));



h) u roku od 8 dana od dana predaje oružja, bitnih dijelova i municije ne obavijesti nadležnu policijsku stanicu (član 39. stav (3));

i) u propisanom roku ne prijavi nestanak ili krađu oružja, bitnih dijelova, municije ili isprava o oružju nadležnoj policijskoj stanici (član 43. stav (1));

j) u propisanom roku ne preda ispravu o oružju nadležnoj policijskoj stanici u slučaju nestanka ili krađe oružja i bitnih dijelova (član 43. stav (5));

k) ne obavijesti nadležnu policijsku stanicu o pronalasku oružja, bitnih dijelova, municije ili isprava o oružju (član 44. stav (1));

l) u propisanom roku ne prijavi promjenu prebivališta ili boravišta ili promjenu ličnog imena ili prezimena (član 45.);

m) u slučaju smrti vlasnika oružja i municije ne preda oružje, bitne dijelove, municiju i odgovarajuću ispravu nadležnoj policijskoj stanici (član 46. stav (1));

n) u propisanom roku ne proda ili pokloni oružje i municiju, ne podnese zahtjev za registraciju oružja i izdavanje oružnog lista, odnosno ne podnese prijavu za posjedovanje oružja kategorije C i izdavanja potvrde o prijavi oružja ili ne podnese prijavu za posjedovanje trofejnog oružja koje je trajno onesposobljeno za upotrebu ili ne preda oružje nadležnoj policijskoj stanici radi uništenja (član 46. stav (4));

o) u propisanom roku ne odjavi oružje koje je prodao ili poklonio (član 46. stav (7));

p) u propisanom roku ne prijavi nadležnoj policijskoj stanici posjedovanje oružja kategorije C (član 84.).

(2) Za prekršaj iz stava (1) tačke: e), g), h), k) i l) ovog člana izriče se i zaštitna mjera oduzimanja oružja, bitnih dijelova, municije i isprava o oružju.

### Član 77.

#### **(Novčana kazna od 3.000,00 KM do 5.000,00 KM i zaštitna mjera za prekršaje pravnih lica i fizičkih lica registriranih za obavljanje djelatnosti)**

(1) Novčanom kaznom od 3.000,00 KM do 5.000,00 KM kaznit će pravno lice i fizičko lice registrirano za obavljanje djelatnosti, ako:

a) nabavi, posjeduje, drži i trguje hladnim oružjem kojem je osnovna namjena napad ili nanošenje ozljeda ili nosi takvo hladno oružje na javnom mjestu, osim u svrhu sportskog takmičenja (član 7. stav (3));

b) nabavi posjeduje, drži i trguje podvodnim puškama i drugim predmetima, koji snagom opruge, napete gume ili sabijenog plina izbacuju osti ili harpun i koji su isključivo namijenjeni ribolovu (član 7. stav (4));

c) u propisanom roku ne podnese zahtjev za izdavanje odobrenja za držanje oružja (član 23. stav (2));

d) ne prijavi prodaju oružja kategorije C nadležnoj policijskoj stanici u propisanom roku (član 32. stav (4));

e) proda oružje kategorije C fizičkom licu koje nije navršilo 21 godinu života (član 32. stav (5));

f) drži oružje bez odgovarajuće isprave o oružju i isprave o identitetu vlasnika oružja (član 36. stav (1));

g) ne čuva oružje i municiju na način da nije dostupno maloljetnom ili drugom neovlaštenom licu, a koje nije zaključano i odvojeno u metalnom ormaru, sefu ili sličnom spremištu koje se ne može otvoriti alatom uobičajne upotrebe (član 37. stav (1));

h) ne čuva oružje i municiju u odgovarajućem prostoru koji se nalazi u mjestu sjedišta vlasnika (član 37. stav (2));

i) da vazdušno oružje ili luk na upotrebu djeci mlađoj od 12 godina na strelištu ili na drugim

mjestima bez nadzora trenera i bez saglasnosti oba roditelja ili staratelja (član 40. stav (5));

j) ne donese na ispitivanje i tehnički pregled oružje po pozivu nadležne policijske stanice (član 40. stav 6.);

k) povjeri nošenje oružja i municije fizičkom licu koji nije član lovačke ili streljačke organizacije, odnosno koje ne obavlja poslove zaštite, odnosno čuvanja šuma, lovišta ili ribolovišta i ne ispunjava uvjete iz člana 9. stav (2) i (3) ovog zakona (član 41. stav (1));

l) ne izda potvrdu fizičkom licu kome povjerava oružje i o izdanoj potvrdi ne obavijesti nadležnu policijsku stanicu (član 41. stav (4));

m) ne obavijesti u propisanom roku nadležnu policijsku stanicu o prestanku potrebe za daljim držanjem oružja i municije ili ne vrati odobrenje za držanje vatrenog oružja ili ne preda oružje (član 42.);

n) ako prilikom prodaje oružja ili bitnih dijelova u roku od 8 dana ne obavijesti nadležnu policijsku upravu (56. stav (2));

o) o izvršenoj popravci i modifikaciji ili prepravci oružja vlasniku ne izda potvrdu ili u propisanom roku ne obavijesti nadležnu policijsku stanicu (član 58. stav (2));

p) u propisanom roku ne obavijesti Upravu policije o onesposobljavanju oružja (član 63. stav (1));

r) bez odobrenja Uprave policije pusti u rad civilno strelište (član 65. stav (1));

s) na civilnom strelištu da vatreno oružje na korištenje fizičkom licu koje nema odgovarajuću ispravu o oružju (član 66. stav (1));

t) dozvoli licu koje nema odgovarajuću ispravu o oružju da može vršiti gađanje bez nadzora ovlaštenog lica strelišta ili sa oružjem i municijom koje nije vlasništvo civilnog strelišta (član 66. stav (3));

u) dozvoli licu pod dejstvom alkoholola, opojnih droga ili drugih omamljujućih sredstava ili ako njihovo psihofizičko stanje ukazuje na nesposobnost rukovanja oružjem pristup civilnom strelištu ili omogući mu izvođenje gađanja (član 66. stav (4));

v) na poziv nadležne policijske stanice ne donese vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 68. stav (2));

z) u slučaju zamjene bitnih dijelova vatrenog oružja u roku od osam dana ne donese vatreno oružje nadležnoj policijskoj stanici radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 68. stav (3));

aa) ne omogući obavljanje nadzora ili ne da na uvid traženu dokumentaciju ili ne pruži potrebne podatke i obavijesti (član 70. stav (2));

bb) ne podnese zahtjev za zamjenu isprava o oružju do isteka roka naznačenog u ispravi (član 83.);

cc) ne uskladi svoje poslovanje sa odredbama ovog zakona u propisanom roku (član 85. stav (1).

(2) Za prekršaj iz stava (1) tačke: a), b), h), i) i l) ovog člana, izriče se i zaštitna mjera oduzimanja oružja, bitnih dijelova, municije i isprava o oružju.

(3) Za prekršaje iz stava (1) ovog člana kaznit će se novčanom kaznom od 1.000,00 KM do 2.000,00 KM odgovorno lice u pravnom licu.

(4) Za prekršaje iz stava (1) tačke: a), b), i), o), r) i v) ovog člana, uz novčanu kaznu može se izreći i zaštitna mjera zabrane obavljanja djelatnosti u trajanju od šest mjeseci.

**Član 78.****(Novčana kazna od 1.000,00 KM do 3.000,00 KM za prekršaje pravnih lica i fizičkih lica registriranih za obavljanje djelatnosti)**

(1) Novčanom kaznom od 1.000,00 KM do 3.000,00 KM kaznit će se pravno lice i fizičko lice registrirano za obavljanje djelatnosti, ako:

a) u propisanom roku ne vrati odobrenje za nabavljanje i posjedovanje vatrenog oružja i bitnih dijelova kategorije B (član 21. stav (2));

b) u roku od 15 dana prije datuma isteka važnosti isprave o oružju ne podnese zahtjev za zamjenu isprave o oružju (člana 24. stav (3));

c) ne izvrši odjavu oružja kod nadležne policijske stanice u roku od osam dana od dana prodaje (član 31. stav (6)).

d) ne prijavi nadležnoj policijskoj stanici nabavljanje oružja kategorije C u propisanom roku (član 32. stav (2));

e) u propisanom roku ne prijavi nabavljanje ili prodaju optičkog nišana (član 32. stav (6));

f) u propisanom roku ne odjavi oružje i ne preda isprave o oružju (član 34. stav (2));

g) u propisanom roku ne obavijesti nadležnu policijsku stanicu o izvršenoj zamjeni oružja i ne podnese zahtjev za registraciju i izdavanje isprava o oružju (član 34. stav (4));

h) sa vatrenim oružjem ne postupa sa naročitom pažnjom (član 35. stav (1));

i) ne preda nadležnoj policijskoj stanici vatreno oružje i bitne dijelove za koje ne postoji mogućnost popravke, modifikacije ili prepravke (član 38.);

j) ne održava oružje u ispravnom stanju, nepravilno i neoprezno rukuje sa oružjem (član 40. stav (1));

k) ne izda potvrdu o nošenju, odnosno prenošenju oružja i municije fizičkom licu (član 41. stav (4));

l) u propisanom roku ne prijavi nestanak ili krađu oružja, bitnih dijelova, municije ili isprava o oružju (član 43. stav (1));

m) u propisanom roku ne preda ispravu o oružju nadležnoj policijskoj stanici (član 43. stav (5));

n) u propisanom roku ne prijavi promjenu sjedišta ili naziva (član 45.);

o) o izvršenoj prodaji municije u propisanom roku ne obavijesti nadležnu policijsku stanicu (član 56. stav (4));

p) ne vodi propisane evidencije (član 72.);

r) ne zamjeni u propisanom roku ispravu o oružju (član 83.).

(2) Za prekršaj iz stava (1) tačke: b), d), e), f), h), m), o) i p) ovog člana izriče se i zaštitna mjera oduzimanja oružja, bitnih dijelova, municije i isprava o oružju.

(3) Za prekršaje iz stava (1) ovog člana kaznit će se novčanom kaznom od 500,00 KM do 1.500,00 KM odgovorno lice u pravnom licu.

**DIO TREĆI - PRELAZNE I ZAVRŠNE ODREDBE****Član 79.****(Oduzimanje oružja u slučaju kad se u krivičnom, odnosno prekršajnom postupku, optuženi ne proglašuje krivim, odnosno ako ne dođe do pokretanja krivičnog ili prekršajnog postupka)**

(1) Oružje za koje se po odredbama ovog zakona izriče sigurnosna, odnosno zaštitna mjera oduzimanja oružja, bitnih dijelova, municije i isprava o oružju, može se oduzeti i kad se u krivičnom, odnosno prekršajnom postupku, optuženi ne proglašuje krivim, odnosno ako ne dođe do pokretanja krivičnog ili prekršajnog postupka, ako to zahtijevaju

interesi opće sigurnosti i interesi morala o čemu se donosi posebno rješenje.

(2) Oružje iz stava (1) ovog člana će se uništiti.

**Član 80.**  
**(Oduzimanje i dobrovoljna predaja**  
**oružja kategorije A)**

(1) Lice koje dođe u posjed oružja, bitnih dijelova i municije kategorije A, mora takvo oružje, bitne dijelove i municiju, uz prethodnu najavu, dobrovoljno predati nadležnoj policijskoj stanici.

(2) O vrsti i količini predatog oružja, bitnih dijelova i municije iz stava (1) ovog člana, nadležna policijska stanica izdaje odgovarajuću potvrdu.

(3) Nadležna policijska stanica dužna je voditi posebnu evidenciju o dobrovoljno predatom oružju, bitnim dijelovima i municiji.

(4) Ako protiv lica iz stava (1) ovog člana, prije dobrovoljne predaje oružja, bitnih dijelova i municije kategorije A, nije zaprimljena prijava zbog nedozvoljenog nabavljanja, posjedovanja, držanja ili nošenja, trgovine i pregovaranja ili ugovaranja transakcija za kupovinu ili prodaju vatrenog oružja, bitnih dijelova ili municije ili opskrbe njima ili dogovaranje transfera vatrenog oružja, bitnih dijelova ili municije, nadležna policijska stanica neće postupiti u skladu sa odredbama Krivičnog zakona Federacije Bosne i Hercegovine.

(5) U slučaju da lice iz stava (1) ovog člana dobrovoljno ne preda oružje, bitne dijelove i municiju kategorije A, nadležna policijska stanica će postupiti u skladu sa odredbama Krivičnog zakona Federacije Bosne i Hercegovine.

(6) Oružje, bitne dijelove i municiju kategorije A, nadležna policijska uprava će oduzeti i kad o istima nije odlučeno u sudskom postupku ili kad se u sudskom postupku optuženi ne proglasi krivim,

odnosno ako ne dođe do pokretanja krivičnog postupka, o čemu se donosi posebno rješenje.

(7) Oružje, bitni dijelovi i municija kategorije A će se uništiti.

**Član 81.**  
**( Amnestija i legalizacija oružja)**

(1) Lice koje na dan stupanja na snagu ovog zakona posjeduje oružje kategorije B koje prema ranije važećim propisima nije registrovano, takvo oružje mora odmah predati nadležnoj policijskoj stanici.

(2) Lice koje dobrovoljno preda oružje iz stava (1) ovog člana neće odgovarati za nelegalno posjedovanje.

(3) Lice iz stava (1) ovog člana može u roku od 12 mjeseci dana stupanja na snagu ovog zakona nadležnoj policijskoj upravi podnijeti zahtjev za registraciju i izdavanje isprave o oružju.

(4) Do okončanja postupka po podnesenom zahtjevu iz stava (1) ovog člana oružje se čuva u nadležnoj policijskoj stanici.

(5) Prilikom podnošenja zahtjeva iz stava (3) ovog člana lice nije dužno da dokazuje porijeklo oružja.

(6) Isprava o oružju neće se izdati licu koje ne ispunjava uvjete iz člana 9. stav (2) i (3) ovog Zakona, kao i kada se oružje potražuje od nadležnih organa i u slučaju da je oružje već registrovano.

(7) U slučaju iz stava (6) ovog člana nadležna policijska uprava će oduzeti oružje.

(8) Nakon pravosnažnosti rješenja iz stava (7) ovog člana oružje će se dostaviti Upravi policije radi uništenja.

(9) Mjere i radnje koje poduzima Uprava policije na provođenju amnestije za nelegalno posjedovanje oružja, kao i u vezi legalizacije oružja, propisuje ministar na prijedlog policijskog komesara.

**Član 82.**  
**(Podzakonski akti)**

U roku od šest mjeseci od dana stupanja na snagu ovog zakona, na prijedlog policijskog komesara, ministar će donijeti:

- a) Pravilnik o izgledu i sadržaju obrazaca isprava o oružju i zahtjeva za izdavanje isprava o oružju i drugih dokumenata (član 8. stav (4));
- b) Pravilnik o postupku rješavanja zahtjeva za izdavanje odobrenja za nabavljanje i posjedovanje oružja, izdavanje i zamjena isprava o oružju, kao i postupak izdavanja potvrda, obavještenja i drugih dokumenata (član 8. stav (5));
- c) Pravilnik o postupku rješavanja zahtjeva za provođenje obuke u rukovanju oružjem, odobrenja za obavljanje djelatnosti (trgovina, popravljavanje, modifikacija ili prepravljavanje i onesposobljavanje oružja) i odobrenja za osnivanje civilnih strelišta (član 8. stav (6));
- d) Pravilnik o imenovanju i načinu rada komisija i drugih u postupku ocjene ispunjavanja uvjeta i opravdanosti zahtjeva za izdavanje odobrenja i isprava o oružju (član 8. stav (7));
- e) Pravilnik o smještaju i čuvanju oružja i municije (član 8. stav (8));
- f) Pravilnik o uvjetima koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja (član 12. stav (4));
- g) Pravilnik o programu obuke i načinu osposobljavanja za pravilno rukovanje i poznavanje propisa u vezi držanja, čuvanja i nošenja vatrenog oružja, imenovanje i način rada komisije (član 14. stav (3));
- h) Pravilnik o vatrenom oružju za obavljanje poslova pravnih lica (član 16. stav (4)).
- i) Pravilnik o postupku oduzimanja oružja, bitnih dijelova, municije i isprava o oružju, kao i način postupanja sa oružjem, bitnim dijelovima, municijom i ispravama o oružju nakon provedenog upravnog postupka (član 48. stav (10));
- j) Pravilnik o imenovanju i sastavu komisije za uništenje oružja, načinu i programu uništenja oružja (član 52. stav (4));
- k) Pravilnik o onesposobljavanju vatrenog oružja (član 63. stav (3));
- l) Pravilnik o prostornim i tehničkim uvjetima za čuvanje, smještaj i upotrebu oružja i municije na civilnim strelištima, broj i vrsta oružja u vlasništvu civilnog strelišta, način korištenja oružja na civilnom strelištu i vođenje civilnog strelišta (član 65. stav (7));
- m) Pravilnik o načinu uzimanja, evidentiranja, pohranjivanja i čuvanja mehaničkog traga vatrenog oružja (član 68. stav (5));
- n) Pravilnik o načinu rada komisije za nadzor nad provođenjem i primjenom Zakona o oružju i municiji Unsko - sanskog kantona (član 69. stav (3));
- o) Pravilnik o obrascima, sadržaju i načinu vođenja evidencija o oružju i municiji nadležnog organa (član 71. stav (5));
- p) Pravilnik o obrascima, sadržaju i načinu vođenja evidencija o oružju i municiji pravnih i fizičkih lica (član 72. stav (11));
- r) Pravilnik o mjerama i radnjama koje poduzima Uprava policije Ministarstva unutrašnjih poslova na provođenju amnestije za nelegalno posjedovanje oružja, kao i u vezi legalizacije oružja (član 81. stav (9));
- s) Pravilnik o obliku, sadržaju i načinu vođenja baze podataka (član 88. stav (7)).

**Član 83.****(Zamjena isprava o oružju izdatih u skladu sa ranijim propisima)**

(1) Isprave o oružju izdate prema ranijim propisima važe do isteka roka naznačenog u ispravi.

(2) Na zahtjev vlasnika oružja nadležna policijska stanica će zamijeniti isprave o oružju i to:

a) oružni list za držanje oružja sa oružnim listom;

b) oružni list za držanje i nošenje oružja sa dozvolom za nošenje oružja;

c) odobrenje za sakupljanje oružja sa odobrenjem za sakupljanje i držanje starog oružja;

d) oružni list za držanje trofejnog oružja sa potvrdom o prijavi za oružje kategorije C, samo ako dostavi dokaz da je trofejno oružje trajno onesposobljeno za upotrebu;

e) odobrenje za držanje oružja sa odobrenjem za držanje vatrenog oružja.

(3) Postupak zamjene isprava o oružju provodi se u skladu sa članom 24. ovog zakona.

**Član 84.****(Obaveza prijave oružja kategorije C)**

Fizičko i pravno lice koje posjeduje oružje kategorije C, dužno je takvo oružje prijaviti nadležnom organu u roku od 90 dana od dana stupanja na snagu ovog zakona.

**Član 85.****(Usklađivanje obavljanja djelatnosti)**

(1) Pravno lice i fizičko lice registrirano za obavljanje djelatnosti prometa oružja i municije, popravljajanja, modifikacije ili prepravljajanja i onesposobljavanja oružja ili vođenje civilnih strelišta i obavljanje drugih djelatnosti u skladu sa ovim zakonom, dužno

je svoje poslovanje uskladiti sa odredbama ovog zakona u roku od šest mjeseci od dana stupanja na snagu ovog zakona.

(2) Pravnom licu i fizičkom licu registriranom za obavljanje djelatnosti, koji u roku iz stava (1) ovog člana, ne podnese zahtjev za usklađivanje poslovanja sa odredbama ovog zakona, nadležni organ će rješenjem zabraniti dalje obavljanje djelatnosti.

**Član 86.****(Odluka o uništenju oružja)**

(1) Policijski komesar će u roku od 60 dana od dana stupanja na snagu ovog zakona donijeti o odluku o uništenju oružja za koje je komisija iz člana 55. stav (2) Zakona o oružju i municiji („Službeni glasnik Unsko - sanskog kantona“, broj: 11/07 i 11/08) sačinila zapisnik o uništenju oružja.

(2) Odluka o uništenju oružja će se donijeti i za oružje koje se nalazi u depozitu organizacionih jedinica Uprave policije za koje se ne može dokazati porijeklo.

**Član 87.****(Zaštita podataka)**

(1) Svi subjekti koji na bilo koji način primjenjuju odredbe ovog zakona dužni su da prikupljaju, pohranjuju i obrađuju podatke u skladu sa propisima kojima se uređuje zaštita ličnih podataka i zaštita tajnih podataka.

(2) Na ovaj zakon ne primjenjuju se odredbe Zakona o slobodi pristupa informacijama.

**Član 88.****(Baza podataka)**

(1) Radi praćenja i identificiranja vatrenog oružja i bitnih dijelova, te radi razmjene podataka nadležnih organa, fizičkih i pravnih lica koji vode evidencije u skladu sa odredbama Zakona o oružju i municiji, Uprava policije Ministarstva unutrašnjih poslova u roku od jedne godine dana od dana

stupanja na snagu ovog Zakona putem softverske aplikacije uspostavlja elektronsku bazu podataka za Unsko - sanski kanton (u daljem tekstu: baza podataka).

(2) Baza podataka sadrži:

(a) vrstu, marku, model, kalibar, serijski broj svakog vatrenog oružja i oznaku na njegovom kućištu ili uvodniku metaka kao jedinstvenu oznaku koja služi kao jedinstveni identifikator svakog vatrenog oružja;

(b) serijski broj ili jedinstvenu oznaku na bitnim dijelovima, ako je drugačija od oznake na kućištu ili uvodniku metaka svakog vatrenog oružja;

(c) imena i adrese dobavljača i lica koje nabavljaju ili posjeduju vatreno oružje, zajedno s odgovarajućim datumom ili datumima;

(d) sva prepravljanja ili modifikacije vatrenog oružja zbog čega se mijenja njegova kategorija ili podkategorija, uključujući njegovo ovjereno onesposobljavanje ili uništenje, zajedno s odgovarajućim datumom ili datumima.

(3) Podaci o vatrenom oružju i bitnim dijelovima, uključujući povezane lične podatke u bazi podataka čuvaju se u razdoblju od 30 godina nakon uništenja vatrenog oružja ili bitnih dijelova.

(4) Nakon proteka roka iz stava (3) ovog člana, podaci o vatrenom oružju i bitnim dijelovima, uključujući i lične podatke, brišu se iz baze podataka.

(5) Pristup bazi podataka mora biti omogućen, odnosno podaci iz baze podataka na pismeno traženje moraju se dostaviti:

a) organima nadležnim za provođenje odredaba Zakona o oružju i municiji i organima nadležnim za carinske postupke u razdoblju do 10 godina nakon uništenja vatrenog oružja ili bitnih dijelova;

b) organima nadležnim za sprečavanje, istragu, otkrivanje ili progon krivičnih djela ili izvršavanje krivičnih sankcija u razdoblju do 30 godina nakon uništenja vatrenog oružja ili bitnih dijelova.

(6) Brisanje podataka ne utječe na slučajeve u kojima su određeni lični podaci preneseni organu nadležnom za sprečavanje, istragu, otkrivanje ili progon krivičnih djela ili izvršenje krivičnih sankcija i upotrebljavaju se u tom određenom kontekstu. U tim slučajevima obrada tih podataka vrši se u skladu sa članom 87. ovog zakona.

(7) Oblik, sadržaj i način vođenja baze podataka, propisuje ministar na prijedlog policijskog komesara.

#### **Član 89.**

#### **(Rješavanje zahtjeva prije stupanja na snagu ovog zakona)**

Svi postupci koji do dana stupanja na snagu ovog zakona nisu okončani završiće se po odredbama ovog zakona.

#### **Član 90.**

#### **(Gramatička terminologija)**

Gramatička terminologija u ovom zakonu podrazumijeva uključivanje oba spola.

#### **Član 91.**

#### **(Direktive)**

Ovim zakonom preuzimaju se odredbe Direktive Vijeća od 18. juna 1991. godine o nadzoru nabavke i posjedovanja oružja broj 91/477/EEZ, Direktive 2008/51/EZ Europskog parlamenta i Vijeća od 21. maja 2008. godine o izmjeni Direktive Vijeća 91/477/EEZ o nadzoru nabavke i posjedovanja oružja i Direktive (EU) 2017/853 Europskog parlamenta i Vijeća od 17. maja 2017. godine o izmjeni Direktive Vijeća 91/477/EEZ o nadzoru nabavke i posjedovanja oružja.





- vezuju uz cjeloživotno učenje: lično zadovoljstvo i razvoj pojedinca, aktivno građanstvo, društvena uključenost i zapošljivost.
- c) **Cjeloživotna karijerna orijentacija** se u kontekstu cjeloživotnog učenja odnosi na niz aktivnosti karijernog vođenja i savjetovanja koje omogućavaju da građani identificiraju svoje vlastite sposobnosti sa ciljem upravljanja svojim stručnim i profesionalnim razvojem.
- d) **Dokvalifikacija** je dodatno stručno obrazovanje prema posebno utvrđenim diferenciranim programima radi sticanja višeg stepena kvalifikacije u okviru istog zanimanja.
- e) **Formalno obrazovanje** je učenje usmjereno od strane nastavnika ili instruktora koje se stiče u obrazovnim ustanovama, a prema nastavnim planovima i programima odobrenim od nadležnih obrazovnih vlasti i vodi do sticanja kvalifikacije.
- f) **Generički deskriptori** definišu očekivane kompetencije ili dio kompetencije za svaki kvalifikacijski nivo obrazovanja.
- g) **Informalno učenje** je proces samostalnog sticanja kompetencija ili dijela kompetencija u životnom, radnom i socijalnom okruženju.
- h) **Inkluzivno obrazovanje** podrazumijeva obrazovanje svakog lica tokom cijelog života, posebno lica s posebnim potrebama u smislu uključivanja u obrazovni proces.
- i) **Ishodi učenja** predstavljaju iskaze očekivanih kompetencija ili dijelova kompetencija koje bi polaznik trebalo da pokaže / demonstrira nakon završenog procesa učenja.
- j) **Javno važeći obrazovni program** je program obrazovanja koji je donijelo, ili odobrilo Ministarstvo obrazovanja, nauke, kulture i sporta Unsko - sanskog kantona (u daljnjem tekstu: Ministarstvo).
- k) **Ključne kompetencije** predstavljaju skup kompetencija određenog nivoa, koje su potrebne svakom pojedincu za lični razvoj, aktivan građanski život, društvenu integraciju i zapošljavanje. U smislu Evropskog referentnog okvira, ove kompetencije podrazumijevaju: komunikaciju na maternjem jeziku, komunikaciju na stranom jeziku, matematičku kompetenciju i osnovne kompetencije u prirodnim naukama i tehnologiji, digitalnu kompetenciju, kompetenciju učenja, društvene i građanske kompetencije, smisao za inicijativu i poduzetništvo, kulturološku senzibilizaciju i izražavanje.
- l) **Kompetencije** označavaju upotrebu stečenih znanja, vještina, stavova, vrijednosti i sposobnosti u različitim životnim situacijama.
- m) **Kvalifikacija** označava formalni naziv za rezultat procesa procjene i validacije prethodnog učenja koji je dobiven onda kada nadležno tijelo odredi da je pojedinac ostvario ishode učenja prema predviđenim standardima kvalifikacija.
- n) **Prekvalifikacija** je obrazovanje i osposobljavanje koje odraslom, koji je već prethodno stekao neko stručno zvanje, odnosno zanimanje omogućava da stekne nove kompetencije i kvalifikacije za obavljanje novog zanimanja ili nove profesionalne djelatnosti.

- o) **Kvalifikacijski okvir** je instrument uspostave nivoa kvalifikacija stečenih u Bosni i Hercegovini, kojim se daju osnove za jasnoću, pristupanje, prohodnost, sticanje i kvalitetu kvalifikacija.
- p) **Neformalno obrazovanje** je proces usmjeren ka sticanju, usavršavanju, specijalizaciji i dopunjavanju kompetencija ili dijela kompetencija prema posebnim programima koje izvode organizatori obrazovanja odraslih, a odvija se neovisno od službenog (formalnog) sistema obrazovanja i ne vodi sticanju službenih potvrda (diploma i kvalifikacija).
- q) **Obrazovanje odraslih** je dio obrazovnog sistema koji je ravnopravan s ostalim dijelovima obrazovnog sistema, a ima za cilj zadovoljavanje obrazovnih potreba odraslih.
- r) **Odrasli polaznici** su lica starija od 15 godina koja pohađaju osnovno obrazovanje, odnosno lica starija od 18 godina koja se obrazuju, a da pri tome nemaju status učenika ili studenta, s ciljem sticanja kvalifikacije, usavršavanja, specijalizacije i dopunjavanja kompetencija ili dijela kompetencija.
- s) **Osnovno obrazovanje odraslih** je organizaciona i programska cjelina u sistemu formalnog obrazovanja u kojoj odrasli stiču obavezno osnovno obrazovanje primjereno njihovim potrebama, mogućnostima učenja i potrebama tržišta rada.
- t) **Osposobljavanje** je obrazovanje za uključivanje u rad nakon završene osnovne škole, za obavljanje jednostavnih i manje složenih poslova određenog zanimanja.
- u) **Pismenost** je historijski promjenljiva kategorija koja zavisi od stepena društvenog razvoja neke civilizacije. Ona predstavlja minimum kompetencija neophodnih savremenom čovjeku za aktivnu participaciju u savremenom društvu.
- v) **Posebni programi** su programi za povećanje općeobrazovnog i kulturnog nivoa stanovništva i povećanje stručnih i drugih kompetencija.
- w) **Prethodno učenje** obuhvata kompetencije ili dijelove kompetencija stečene kroz prethodno obrazovanje ili iskustvo, a može biti ishod bilo koje forme učenja.
- x) **Samousmjereno učenje odraslih** označava aktivnosti u kojima odrasli sami upravljaju proces učenja bez neposredne i kontinuirane pomoći drugih.
- y) **Specijalizacija** je obrazovanje i osposobljavanje u okviru istog zanimanja radi sticanja posebnih kompetencija ili dijelova kompetencija neophodnih za određene poslove.
- z) **Stručne kompetencije**, u smislu ovog Zakona, jesu sposobnosti upotrebe stečenih znanja, vještina i stavova, neophodnih za obavljanje radnih aktivnosti.
- aa) **Usavršavanje** je svaki oblik obrazovanja nakon završenog inicijalnog obrazovanja ili tokom radnog vijeka koje treba pomoći odraslom da efikasnije i efektivnije obavlja neku djelatnost u različitim životnim situacijama.
- bb) **Vještine** predstavljaju sposobnost primjene znanja i korištenja principa „znati kako“ da se izvrši određeni zadatak i da se riješi problem.

- cc) **Znanje** je rezultat transformacije iskustva kroz proces učenja, odnosno skup činjenica, principa, teorija i praksi koje se odnose na područje izučavanja.

### **Član 3.** **(Ravnopravnost)**

- (1) Terminološko korištenje muškog ili ženskog roda u ovom zakonu podrazumijevaju uključivanje oba roda.
- (2) Djelatnost obrazovanja odraslih usmjerena je ka punom razvoju ljudske ličnosti i dostojanstva, poštivanju ljudskih prava, građanskih i drugih demokratskih, zakonskih i ustavnih načela i sloboda i omogućava jednake prilike i uvjete za pristup, učešće i sticanje obrazovanja, bez obzira na godine života, spol, psiho-fizičke i druge lične osobine, porodični status, materijalno i zdravstveno stanje, mjesto življenja, rasnu, nacionalnu, etničku, kulturnu, socijalnu i vjersku pripadnost, seksualnu orijentaciju, te druge osnove.

### **Član 4.** **(Zabrana diskriminacije)**

Obrazovanje odraslih je namijenjeno svima i u tom smislu ne može se ograničiti pristup obrazovanju odraslih, direktno ili indirektno, prema bilo kojoj stvarnoj ili pretpostavljenoj osnovi suprotnoj ustavu, zakonima i međunarodnom pravu.

### **Član 5.** **(Supsidijarna primjena Zakona)**

U upravnim stvarima koje nisu uređene ovim zakonom postupa se u skladu sa Zakonom o upravnom postupku Federacije Bosne i Hercegovine, Zakonom o ustanovama BiH, Zakonom o osnovnom i općem srednjem odgoju i obrazovanju Unsko - sanskog kantona i Zakonom o srednjem obrazovanju Unsko - sanskog kantona.

### **Član 6.** **(Posebni interes)**

- (1) Obrazovanje odraslih kao dio jedinstvenog obrazovnog sistema Kantona predstavlja javnu djelatnost od posebnog društvenog interesa za Kanton.
- (2) Obrazovanje odraslih realizira se na način i pod uvjetima utvrđenim ovim Zakonom, ukoliko drugačije nije regulisano posebnim zakonom.

### **Član 7.** **(Ciljevi obrazovanja odraslih)**

Obrazovanje odraslih se organizuje i provodi s ciljem:

- a) povećanja vrijednosti ljudskog kapitala u zemlji, kroz poboljšanje obrazovne i kvalifikacione strukture stanovništva Kantona i Bosne i Hercegovine u cijelosti;
- b) izgradnje društvenog ambijenta za održivi društveno - ekonomski razvoj Kantona i bosanskohercegovačkog društva, na svim nivoima organizovanja;
- c) postizanja veće zaposlenosti i povećanja profesionalne fleksibilnosti radno aktivnog stanovništva i njegove veće mobilnosti na domaćem i evropskom tržištu rada;
- d) razvoja demokratije, interkulturalnosti i tolerancije;
- e) unapređivanja kvaliteta života, odnosno ličnog, porodičnog, socijalnog i prirodnog okruženja;
- f) ostvarenja sveobuhvatnosti koncepta cjeloživotnog učenja, koji treba da doprinese bržem napredovanju Kantona i Bosne i Hercegovine prema društvu koje uči, a time i njenom uspješnom integriranju u evropski društveni i ekonomski prostor uvažavanjem evropskih okvira obrazovanja;

- g) dostizanja najmanje nivoa osnovnog obrazovanja među odraslom populacijom i omogućavanje odraslim da prate promjene u domenu osnovne i funkcionalne pismenosti;
- h) osposobljavanja za zapošljavanje odraslih koji nemaju završeno formalno obrazovanje;
- i) omogućavanja daljnjeg obrazovanja i obuke, odnosno mogućnosti dokvalifikacije, prekvalifikacije, specijalizacije i kontinuiranog stručnog usavršavanja tokom cijelog radnog vijeka;
- j) obrazovanje za aktivno građanstvo i održiv razvoj;
- k) obrazovanja i učenja u skladu s ličnim sposobnostima, afinitetima i životnom dobi pojedinca;
- l) zadovoljenja specifičnih obrazovnih potreba pripadnika nacionalnih manjina i etničkih grupa;
- m) zadovoljavanje specifičnih obrazovnih potreba posebnih i naročito marginaliziranih društvenih grupa;
- n) omogućavanja formalnog priznavanja i potvrđivanja rezultata prethodnog učenja, odnosno kompetencija ili dijela kompetencija bez obzira na način njihovog sticanja.
- c) povezivanja obrazovanja s tržištem rada;
- d) uvažavanja različitosti potreba i mogućnosti, prethodnih znanja i iskustava, te s tim u vezi i specifičnosti obrazovanja i učenja odraslih odnosno ravnopravnog ishoda obrazovanja bez obzira na oblik, vrstu i način učenja i sticanja obrazovanja;
- e) slobode izbora odgovarajućeg obrazovanja, kao i oblika, metoda i načina učenja;
- f) dostupnosti i raznovrsnosti obrazovne ponude;
- g) osiguranja odgovarajućeg kvaliteta obrazovanja, bez obzira na nacionalne, etničke, kulturne, socijalne, ekonomske, regionalne, lokalne i druge specifičnosti okruženja u kojem se ono organizuje i provodi;
- h) profesionalnosti i odgovornosti organizatora obrazovanja odraslih te profesionalnosti i etičnosti andragošskog kadra;
- i) poštovanja ličnosti i dostojanstva svakog učesnika u procesu obrazovanju odraslih;
- j) informisanja, savjetovanja i vođenja u daljnjem obrazovanju i karijernom napredovanju;
- k) garancije kvaliteta obrazovne ponude;
- l) međusektorske i partnerske saradnje u oblasti obrazovanja odraslih.

### **Član 8.**

#### **(Djelatnost obrazovanja odraslih)**

Djelatnost obrazovanja odraslih je usmjerena ka punom razvoju ljudske ličnosti i dostojanstva, poštovanju ljudskih prava, građanskih i drugih demokratskih, zakonskih i ustavnih načela i sloboda.

### **Član 9.**

#### **(Načela obrazovanja odraslih)**

Obrazovanje odraslih se zasniva na načelima:

- a) cjeloživotnog učenja;
- b) javnosti;

## **POGLAVLJE II. OPĆE ODREDBE**

### **Član 10.**

#### **(Oblici obrazovanja odraslih)**

Obrazovanje odraslih odvija se kroz sljedeće oblike:

- a) formalno i neformalno obrazovanje;
- b) informalno i samousmjereno učenje.

**Član 11.**  
**(Formalno obrazovanje)**

- (1) Formalno obrazovanje odraslih je djelatnost koja se realizuje u javnim ili privatnim obrazovnim ustanovama upisanim u Registar koji vodi Ministarstvo radi sticanja općeg obrazovanja, odgovarajućih kvalifikacija, kompetencija ili dijelova kompetencija u skladu s posebnim zakonima, Standardima i normativima te nastavnim planovima i programima koje donosi ili odobrava ministar Ministarstva obrazovanja, nauke, kulture i sporta Unsko - sanskog kantona (u daljem tekstu: ministar).
- (2) Programi formalnog obrazovanja obuhvataju:
- a) programe za sticanje osnovnog obrazovanja;
  - b) programe za sticanje srednjeg stručnog obrazovanja;
  - c) programe dokvalifikacije;
  - d) programe prekvalifikacije.
- (3) Programom formalnog obrazovanja se obavezno utvrđuje:
- a) naziv programa;
  - b) cilj i/ili ciljeve programa;
  - c) obrazovni ishodi koji se stiču završetkom programa;
  - d) uslovi za upis, napredovanje i završetak programa;
  - e) nastavni predmeti ili nastavni sadržaji;
  - f) ukupno trajanje programa i trajanje programa po nastavnim predmetima ili sadržajima (izraženo u nastavnim satima);
  - g) način realizacije odnosno oblici izvođenja programa;
  - h) kadrovski, didaktički, prostorni i drugi uslovi za izvođenje programa;

- i) procedura provjere ishoda učenja;
  - j) način evaluacije programa; i
  - k) način arhiviranja i čuvanja dokaza ishoda učenja polaznika.
- (4) Programi formalnog obrazovanja odraslih za prvo sticanje srednje stručne spreme se izvode u javnim registrovanim ustanovama za obrazovanje odraslih, a programi prekvalifikacije i dokvalifikacije kao dio formalnog obrazovanja se, pored javnih ustanova mogu realizirati i u specijaliziranim ustanovama za obrazovanje odraslih i drugim registrovanim ustanovama za ovu djelatnost.

**Član 12.**  
**(Neformalno obrazovanje)**

- (1) Neformalno obrazovanje odraslih označava organizovane procese učenja na osnovu posebnih programa usmjerenih na sticanje kompetencija ili dijelova kompetencija usmjerenih na lični razvoj odraslih, rad i zapošljavanje i socijalne aktivnosti.
- (2) Neformalno obrazovanje uključuje sljedeće programe:
- a) usavršavanja;
  - b) osposobljavanja;
  - c) sticanja ili unapređenja ključnih kompetencija;
  - d) sticanja dodatnih kompetencija u struci;
  - e) zaštite životne i radne sredine;
  - f) unapređenje zdravlja i podizanja kvaliteta života;
  - g) namijenjene osobama u trećoj životnoj dobi;
  - h) zadovoljavanja specifičnih obrazovnih i kulturnih potreba posebnih društvenih grupa;
  - i) sticanja drugih znanja, vještina i sposobnosti.

- (3) Neformalno obrazovanje odraslih mogu organizovati i realizovati: odgojno - obrazovne ustanove, škole, odnosno centri za učenje jezika, škole odnosno centri za informaciono-komunikacijske tehnologije, centri za kulturu i obrazovanje, autoškole, udruženja građana, privredni subjekti i druga pravna lica koja su, između ostalog, kao svoju djelatnost navela neformalno obrazovanje odraslih, u daljem tekstu organizatori obrazovanja odraslih.
- (4) Način, uslovi i vrijeme obrazovanja odraslih, utvrđuju se aktima organizatora neformalnog obrazovanja odraslih.
- (5) Neformalno obrazovanje odraslih, kao javno važeće, organizuju i realizuju organizatori obrazovanja odraslih iz stava (3) ovog člana ukoliko ispunjavaju prostorne, materijalne, kadrovske i druge uslove propisane ovim zakonom i standardima i normativima za obrazovanje odraslih.
- (6) Vrijeme organizovanja javno važećeg neformalnog obrazovanja odraslih u toku godine utvrđuje se godišnjim programom rada organizator obrazovanja odraslih, koji provodi neformalno obrazovanje.
- (7) Neformalno obrazovanje odraslih koje nema status javno važećeg obrazovanja mogu provoditi i ostali organizatori obrazovanja odraslih u skladu s odredbama ovog zakona i ne podliježu obavezi programske akreditacije.

#### **Član 13.**

##### **(Informalno i samousmjereno učenje)**

- (1) Informalno učenje odraslih predstavlja neplanirane aktivnosti u kojima odraslo lice prihvata stavove i pozitivne vrijednosti, kao i znanje i vještine iz svakodnevnog iskustva i raznih drugih uticaja i izvora iz svoje okoline.

- (2) Samousmjereno učenje se odvija kroz aktivnosti kojima odraslo lice samo upravlja sopstvenim procesom učenja i odgovornosti za rezultate tog učenja bez neposredne i kontinuirane pomoći drugih.

#### **Član 14.**

##### **(Dokazivanje kompetencija stečenih informalnim i samousmjerenim učenjem)**

- (1) Kompetencije ili dijelovi kompetencije stečeni informalnim i samousmjerenim učenjem odrasli mogu dokazati, nezavisno od načina na koji su stečeni, polaganjem ispita.
- (2) Ispite iz stava (1) ovoga člana organizuje i provodi Komisija koju imenuje Ministarstvo, uz prethodni prijedlog organizatora obrazovanja odraslih kojeg ovlasti Ministarstvo.

#### **Član 15.**

##### **(Javno važeće obrazovanje)**

- (1) Javno važeće obrazovanje odraslih je obrazovanje koje se stiče po javno važećem obrazovnom programu osnovnog i srednjeg obrazovanja, ili po prilagođenom javno važećem obrazovnom programu ili dijelu tog programa, u skladu s posebnim propisom koji uređuje tu oblast obrazovanja.
- (2) Odrasli mogu sticati kompetencije ili dijelove kompetencija po donesenom, odnosno odobrenom programu obrazovanja ili dijelu tog programa, u skladu s ovim Zakonom.
- (3) Obrazovanje stečeno u smislu stava (2) ovog člana, nakon provjere od strane ovlaštene ustanove, jeste javno važeće obrazovanje i dokazuje se javnom ispravom.

### **POGLAVLJE III. ORGANIZATORI OBRAZOVANJA ODRASLIH**

#### **Član 16.**

##### **(Organizator obrazovanja odraslih)**

- (1) Organizator obrazovanja odraslih mogu biti ustanove, organizacije i drugi pravni subjekti, koji ispunjavaju uslove za obavljanje ove djelatnosti.
- (2) Programe obrazovanja odraslih u skladu sa ovim zakonom mogu provoditi:
  - a) obrazovne ustanove u sistemu redovnog - formalnog obrazovanja;
  - b) specijalizirane ustanove za obrazovanje odraslih;
  - c) centri i organizacije za stručno usavršavanje, učenje stranih jezika, informaciono-komunikacijske tehnologije, obuku i razvoj ljudskih resursa;
  - d) zavodi i službe za zapošljavanje;
  - e) javne agencije, javna preduzeća i privredna društva;
  - f) privredne komore, poslodavci, preduzetnici i obrtnici i njihova udruženja, sindikalne organizacije;
  - g) fondacije i udruženja građana;
  - h) ustanove za profesionalnu rehabilitaciju i zapošljavanje lica s invaliditetom;
  - i) ustanove za smještaj i brigu o licima s posebnim potrebama;
  - j) penološke ustanove;
  - k) vjerske organizacije;
  - l) centri za informisanje i savjetovanje i karijerno vođenje;
  - m) kulturno - obrazovni centri i
  - n) drugi subjekti.
- (3) Organizator obrazovanja odraslih iz stava (2) ovog člana mogu provoditi programe obrazovanja odraslih pod

uvjetom da posjeduje odobrenje Ministarstva, ukoliko realizuje formalne, neformalne javnovažeće programe obrazovanja odraslih i/ili neformalne programe obrazovanja odraslih, odnosno rješenje o ispunjenosti uvjeta za izvođenje formalnih, neformalnih javno važećih programa obrazovanja odraslih i/ili neformalnih programa obrazovanja odraslih (u daljnjem tekstu: organizatori programa obrazovanja odraslih).

- (4) Organizator formalnog obrazovanja odraslih, neformalnog javno važećeg programa obrazovanja odraslih i neformalnog obrazovanja odraslih djelatnost obavljaju u skladu sa Standardima i normativima za obrazovanje odraslih (u daljnjem tekstu: Standardi i normativi) kojim se standardiziraju i normiraju prostor, oprema, kadrovi, nastavna sredstava i učila.
- (5) Standarde i normative iz stava (4) ovog člana, te način postupka za utvrđivanje ispunjenosti uvjeta za obavljanje djelatnosti propisuje Ministarstvo uz prethodnu saglasnost Vlade.
- (6) Državno tijelo i ustanove, koje u skladu sa posebnim zakonima obavljaju stručno usavršavanje odraslih, obavljaju djelatnost stručnog usavršavanja u skladu sa zakonom kojim im je određena ta nadležnost ne podliježu postupku odobravanja obavljanja djelatnosti obrazovanja odraslih sukladno ovom Zakonu.

#### **Član 17. (Osnivač)**

- (1) Javne ustanove za obrazovanje odraslih može osnovati Kanton ili jedinice lokalne samouprave.
- (2) Kanton može, u skladu s međunarodnim ugovorima, otvoriti odjeljenje za obrazovanje odraslih za naše građane u inostranstvu.

- (3) Organizatori obrazovanja odraslih za izvođenje formalnog obrazovanja odraslih, neformalnog javnovažećeg i neformalnog obrazovanja odraslih može osnovati domaće i strano pravno i fizičko lice u svim oblicima vlasništva (u daljem tekstu: osnivač) uz odobrenje Ministarstva.

### **Član 18.**

#### **(Sredstva za osnivanje i rad)**

- (1) Osnivač organizatora obrazovanja odraslih osigurava sredstva potrebna za osnivanje i rad, u skladu sa Standardima i normativima za realizaciju programa obrazovanja odraslih, kojima se posebno standardiziraju i normiraju prostor, oprema, kadrovi, nastavna sredstva i učila.
- (2) Ako organizatora obrazovanja odraslih osniva više pravnih odnosno fizičkih lica, oni svoje međusobne odnose uređuju ugovorom.

### **Član 19.**

#### **(Odluka o osnivanju organizatora obrazovanja odraslih)**

Odluka o osnivanju organizatora obrazovanja odraslih sadrži:

- a) naziv osnivača;
- b) naziv i sjedište organizatora obrazovanja odraslih;
- c) vrstu programa za koje se osniva;
- d) izvore i način osiguravanja sredstava za rad;
- e) nastavni plan i program;
- f) broj nastavnika, predavača i drugog osoblja koje je kvalifikovano da provodi predviđenu nastavu i treninge;
- g) podatke o objektima koji su osigurani i koji se koriste;
- h) lice koje predstavlja i zastupa instituciju i njegova ovlaštenja i odgovornosti;

- i) rok za donošenje općeg akta, imenovanje organa upravljanja i rukovođenja; te
- j) druga pitanja značajna za rad organizatora obrazovanja odraslih.

### **Član 20.**

#### **(Uslovi za obavljanje djelatnosti obrazovanja odraslih)**

Organizator obrazovanja odraslih može izvoditi program obrazovanja odraslih ako ima registrovanu djelatnost obrazovanja i ako ispunjava standarde i normative u pogledu tehničkih, higijenskih, prostornih, kadrovskih, materijalnih i drugih uvjeta za izvođenje programa propisanih od strane Ministarstva.

### **Član 21.**

#### **(Uslovi za osnivanje organizatora obrazovanja odraslih)**

- (1) Organizator obrazovanja odraslih može se osnovati ako:
- a) postoji potreba za osnivanjem, kada se osniva kao javna ustanova;
  - b) su osigurana sredstva za finansiranje, odnosno sufinansiranje programa za obrazovanje odraslih;
  - c) je osiguran adekvatan prostor koji ispunjava higijensko-tehničke uslove u skladu sa standardima i normativima prostora i opreme;
  - d) ima potreban broj predavača, stručnih saradnika i ostalih zaposlenih;
  - e) su osigurana sredstva za rad od strane osnivača.
- (2) Osnivač je dužan, uz zahtjev za izdavanje rješenja o ispunjavanju uslova za osnivanje organizatora obrazovanja odraslih, Ministarstvu dostaviti:
- a) osnivački akt;
  - b) elaborat o opravdanosti osnivanja;



- c) podatke o licu ovlaštenom za zastupanje;
  - d) dokaz o osiguranim uslovima i sredstvima za rad;
  - e) dokaz o izvršenoj uplati sredstava na ime troškova provođenja postupka osnivanja od faze podnošenja zahtjeva do okončanja postupka po zahtjevu.
- (3) Ministarstvo obavještava osnivača o urednosti i usklađenosti zahtjeva sa zakonom i određuje rok za otklanjanje utvrđenih nedostataka.
- (4) Rok za otklanjanje nedostataka iz stava 3 ovog člana ne može biti duži od 30 dana.
- (5) Smatra se da je osnivač odustao od zahtjeva ukoliko u roku od 30 dana od dana dostavljanja obavijesti iz stava 3 ovog člana ne otkloni utvrđene nedostatke.
- (6) Ispunjenost uslova za osnivanje organizatora obrazovanja odraslih utvrđuje ekspertna komisija koju imenuje ministar posebnim rješenjem.
- (7) Troškove postupka utvrđivanja ispunjenosti uslova za osnivanje organizatora obrazovanja odraslih snosi osnivač.
- (8) Troškove iz tačke e) stav (2) ovog člana snosi osnivač, a visinu naknade utvrđuje Ministarstvo posebnom odlukom.
- (9) Javne ustanove čiji je osnivač Skupština Unsko - sanskog kantona oslobađaju se obaveza plaćanja troškova iz tačke e) stav (2) ovog člana.

#### **Član 22.**

##### **(Sadržaj elaborata)**

Elaborat o opravdanosti osnivanja organizatora obrazovanja odraslih obavezno sadrži: podatke o osnivaču, sjedište i naziv, ciljeve, dužinu trajanja obrazovanja odraslih, nastavni plan i program, odnosno vrste programa za obrazovanje odraslih koje planira realizovati, profil i stepen stručne spreme koji

se stiče po završetku obrazovanja, opće i posebne uslove utvrđene Standardima i normativima, finansijska sredstva potrebna za ispunjenje tih uslova, način osiguranja finansijskih sredstava za rad organizatora obrazovanja odraslih.

#### **Član 23.**

##### **(Ekspertna komisija)**

- (1) Nakon dostavljanja urednog zahtjeva iz člana 21 stava (2) ovog Zakona, Ministarstvo donosi poseban akt kojim obrazuje ekspertnu komisiju radi razmatranja zahtjeva i elaborata te davanja stručnog mišljenja.
- (2) Ekspertnu komisiju iz stava (1) ovog člana, koja broji pet članova, imenuje Ministarstvo iz reda andragoških i drugih stručnjaka za odgovarajuće vrste obrazovanja (jedan član), predstavnika osnivača organizatora obrazovanja odraslih u osnivanju (jedan član), te predstavnike Ministarstva i Pedagoškog zavoda (tri člana).
- (3) Akt o imenovanju ekspertne komisije iz stava (1) ovog člana obavezno sadrži opis poslova i zadataka, način rada, rok od najduže 90 dana za izvršenje povjerenih poslova i zadataka, te visinu naknade za rad članovima komisije.

#### **Član 24.**

##### **(Odluka Ministarstva o elaboratu)**

- (1) Ocjenu elaborata od strane ekspertne komisije, uredan zahtjev osnivača sa stručnim mišljenjem ekspertne komisije dostavlja se ministru na saglasnost.
- (2) Odluka ministra o elaboratu iz stava (1) ovog člana mora biti donesena najkasnije u roku od 30 dana od dana dostavljanja izvještaja ekspertne komisije.
- (3) U slučaju da je ministar odlukom odbije dati saglasnost na elaborat, zbog negativnog izvještaja i stručnog mišljenja ekspertne komisije, osnivač može tražiti da se osnuje posebna

ekspertna komisija koja će pristupiti pisanju novog elaborata o trošku osnivača. Nalaz i mišljenje posebne ekspertne komisije dostavlja se ministru na saglasnost.

- (4) Komisiju iz stava (3) ovog člana obrazuje Ministarstvo iz reda istaknutih naučnih radnika, andragoških i drugih stručnjaka, predstavnika Ministarstva, koji nisu bili imenovani u ekspertnoj komisiji, s tim da se jedan član imenuje po prijedlogu osnivača organizatora obrazovanja odraslih u osnivanju.
- (5) Akt o obrazovanju posebne ekspertne komisije iz stava (4) ovog člana obavezno sadrži opis poslova i zadataka, način rada, rok od najduže 60 dana za izvršenje povjerenih poslova i zadataka te visinu naknade za rad članovima komisije.
- (6) Ocjenu posebne ekspertne komisije, uredan zahtjev osnivača sa stručnim mišljenjem posebne ekspertne komisije i stručnim mišljenjem komisije iz stava (1) ovog člana posebna ekspertna komisija dostavlja ministru na razmatranje i davanje saglasnosti u roku od 15 dana od dana dostavljanja izvještaja posebne ekspertne komisije.
- (7) Ministarstvo će donijeti odluku o odbijanju zahtjeva iz člana 21. stav (2) ovog zakona ukoliko je izvještaj ekspertne i posebne ekspertne komisije negativan.
- (8) Protiv odluka ministra iz stava (3) i (7) ovog člana nije dopuštena žalba, ali se može pokrenuti upravni spor pred nadležnim sudom u roku od 30 dana od dana prijema rješenja.
- (9) Isti osnivač ili suosnivač može podnijeti ponovo zahtjev iz člana 21. stav (2) ovog zakona nakon isteka roka od najmanje dvije godine od donošenja odluke ministra iz stava (2) ovog člana, ukoliko je ona bila negativna.

## **Član 25.**

### **(Rješenje o ispunjenosti uslova za osnivanje ustanove za obrazovanje odraslih)**

- (1) Na osnovu donesene odluke ministra o saglasnosti na elaborat, donosi se Rješenje o ispunjavanju uslova za osnivanje organizatora za obrazovanje odraslih.
- (2) Nakon donošenja rješenja iz stava (1) ovog člana Ministarstvo o tome, u roku od osam dana obavještava osnivača.
- (3) Rješenje iz stava (1) ovog člana kojeg donosi ministar je konačan upravni akt.

## **Član 26.**

### **(Registar organizatora obrazovanja odraslih)**

- (1) Organizatori obrazovanja odraslih, koji su ispunili uslove za osnivanje propisane ovim Zakonom, upisuju se u Registar organizatora obrazovanja odraslih (u daljnjem tekstu: Registar).
- (2) Registar vodi Ministarstvo.
- (3) Ministar donosi rješenje o ispunjenosti uslova za upis u Registar.
- (4) Nakon upisa u Registar organizator obrazovanja odraslih upisuje se u sudski registar ili u registar nadležnog organa.
- (5) Postupak utvrđivanja uslova za upis u Registar, sadržaj i način vođenja Registra utvrđuje se podzakonskim aktom koji donosi ministar uz prethodnu saglasnost Vlade.

## **Član 27.**

### **(Akreditovani organizator obrazovanja odraslih)**

- (1) Organizator obrazovanja odraslih koji je ispunio uslove predviđene ovim zakonom, nakon upisa u Registar organizatora obrazovanja odraslih ima

status akreditovanog organizatora obrazovanja odraslih.

- (2) Status akreditovanog organizatora obrazovanja odraslih je vremenski ograničen i produžava se kroz proces re-akreditacije svakih pet godina.

### **Član 28.**

#### **(Javne isprave, isprave i pečat)**

- (1) Organizator obrazovanja odraslih koji provodi formalne i/ili neformalno javnovažeće programe obrazovanja odraslih obavezan je voditi dokumentaciju i evidenciju o obrazovanju odraslih i izdavati odgovarajuće javne isprave o završenom obrazovanju.
- (2) Organizatori obrazovanja odraslih koji provode formalne i/ili neformalne javnovažeće programe obrazovanja odraslih vode posebnu andragošku dokumentaciju i evidenciju koja, između ostalog, obavezno uključuje:
- a) matične knjige;
  - b) dnevnik rada;
  - c) programe obrazovanja;
  - d) dokumente o upisu u program;
  - e) ugovor o obrazovanju;
  - f) evidencije o andragoškim radnicima;
  - g) evidencije o polaznicima;
  - h) evidencije o provjerama ishoda učenja;
  - i) evidencije o izdatim javnim ispravama.
- (3) Organizator obrazovanja odraslih ima pečat koji se koristi kao dokaz autentičnosti svakog dokumenta koji izdaje.
- (4) Ministarstvo vodi evidencije organizatora obrazovanja odraslih, donesenih odnosno odobrenih formalnih programa obrazovanja odraslih i neformalnih javno važećih programa obrazovanja odraslih.
- (5) Pravilnik o sadržaju, oblicima te načinu vođenja i čuvanja andragoške

dokumentacije i evidencije i izdavanju javnih isprava donosi Ministar uz prethodnu saglasnost Vlade.

- (6) Reprezentativna udruženja poslodavaca, privredne i obrtničke komore vode evidenciju poslodavaca kod kojih se može obavljati praktični rad, te druge evidencije iz djelokruga njihovih aktivnosti u području obrazovanja odraslih.
- (7) Organizatori obrazovanja odraslih koji provode neformalne programe obrazovanja odraslih vode posebnu andragošku dokumentaciju
- a) evidenciju o polaznicima
  - b) programe obrazovanja.

### **Član 29.**

#### **(Baza podataka)**

- (1) Propisane evidencije o obrazovanju odraslih objedinjuju se u odgovarajuće baze podataka na nivou organizatora obrazovanja odraslih, kao i na nivou Ministarstva i drugih relevantnih organa i institucija, na različitim nivoima vlasti.
- (2) Navedene baze podataka služe isključivo u svrhu nadzora, analize i unapređenja stanja obrazovanja odraslih, te planiranja njegovog razvoja uz obavezu poštivanja procedura koje su utvrđene Zakonom o zaštiti ličnih podataka, te će Ministar posebnim pravilnikom urediti način vođenja baze podataka o obrazovanju odraslih.
- (3) U cilju ispunjavanja obaveza Bosne i Hercegovine u pogledu međunarodnog izvještavanja o stanju obrazovanja odraslih u zemlji, kao i u cilju dogovaranja i poduzimanja zajedničkih mjera i aktivnosti domaćih organa na unapređenju politika i prakse obrazovanja odraslih, odgovarajući podaci i informacije o stanju i u vezi sa obrazovanjem odraslih dostavljaju se i objedinjuju na

nivou Ministarstva civilnih poslova Bosne i Hercegovine, u skladu sa dogovorenim sistemom koordinacije.

### **Član 30. (Akreditacija)**

- (1) Ministarstvo vrši kontrolu rada organizatora obrazovanja odraslih svakih pet godina, a po potrebi i češće u cilju osiguranja kvaliteta.
- (2) Kontrola rada organizatora obrazovanja odraslih obuhvata kontrolu u oblastima:
  - a) planova i programa rada organizatora obrazovanja odraslih;
  - b) upravljanja i rukovođenja;
  - c) programa obrazovanja;
  - d) nastavnog procesa;
  - e) obrazovnih postignuća polaznika i adekvatnih načina procjene ishoda učenja;
  - f) ljudskih i drugih resursa.
- (3) Ako se prilikom kontrole utvrdi da organizator obrazovanja odraslih ne obavlja djelatnost na način utvrđen Zakonom ili ne ispunjava uvjete propisane Zakonom, Ministarstvo će utvrditi rok za otklanjanje nepravilnosti koji ne može biti duži od šest mjeseci.
- (4) Dok traje rok za otklanjanje utvrđenih nepravilnosti iz stava (3) ovog člana i dok se ne dobije rješenje kojim se potvrđuje da su utvrđene nepravilnosti otklonjene, organizator obrazovanja odraslih ne može vršiti prijem i upis polaznika, a u obavezi je da polaznicima koji su započeli proces obrazovanja omogućiti okončanje istog pod uslovima koji su važili u trenutku upisa.
- (5) Ako organizator obrazovanja odraslih u roku iz stava (2) ovog člana ne otkloni nepravilnosti, Ministarstvo obavezno donosi rješenje o zabrani rada i nalaže brisanje iz Registra.

- (6) Mogućnost ponovnog podnošenja zahtjeva za akreditaciju organizatora obrazovanja odraslih može se steći nakon isteka roka od pet godina od dana brisanja iz Registra.

### **Član 31. (Brisanje iz Registra)**

- (1) Organizator obrazovanja odraslih se briše iz Registra kada prestane da ispunjava uvjete propisane ovim zakonom i bližim propisima koje donosi ministar.
- (2) Izreka Rješenja o ukidanju i brisanje organizatora obrazovanja odraslih iz Registra objavljuje se u Službenom glasniku Unsko - sanskog kantona.

## **POGLAVLJE IV. PLAN I PROGRAM OBRAZOVANJA ODRASLIH**

### **Član 32. (Planovi i programi obrazovanja odraslih)**

Obrazovanje odraslih zasniva se na planovima i programima obrazovanja odraslih ili dijelovima odgovarajućih programa za redovne učenike prilagođenim odraslima, kojima odrasli stječu ključne i stručne kompetencije i kvalifikacije potrebne za lični i profesionalni razvoj, rad i zapošljavanje, kao i društveno odgovorno ponašanje, odnosno dopunjuju znanja, vještine, sposobnosti i stavove.

### **Član 33. (Plan obrazovanja odraslih)**

- (1) Planom obrazovanja odraslih Kantona (u daljnjem tekstu: Plan obrazovanja) utvrđuje se opći interes obrazovanja odraslih.
- (2) Srednjoročni trogodišnji Plan obrazovanja iz stava (1) ovog člana, na prijedlog Ministarstva, donosi Vlada.
- (3) Plan obrazovanja iz stava (2) ovog člana, u slučaju zahtjeva tržišta rada, može se mijenjati za svaku godinu.

- (4) Prijedlog Plana obrazovanja odraslih priprema Vijeće za obrazovanje odraslih.
- (5) Plan obrazovanja odraslih utvrđuje:
  - a) prioritetne obrazovne oblasti obrazovanja odraslih;
  - b) okvirni obim sredstava za obrazovanje odraslih;
  - c) programe rada i dinamiku njihovog ostvarivanja.
- (6) Vijeće za obrazovanje odraslih dostavlja prijedlog Plana obrazovanja odraslih najkasnije do 31. januara za tekuću godinu Ministarstvu.
- (7) Ministarstvo dostavlja na saglasnost Vladi Kantona prijedlog Plana za obrazovanje odraslih najkasnije do 31. marta tekuće godine.

#### **Član 34.**

##### **(Imenovanje i način rada Vijeća za obrazovanje odraslih)**

- (1) Vijeće čine predsjednik i dvanaest članova, koje imenuje Vlada Unsko - sanskog kantona na prijedlog ministra, na razdoblje od četiri godine, vodeći računa o zastupljenosti ministarstava, ustanova za obrazovanje odraslih, poslodavaca i sindikata.
- (2) Kandidate za članove i predsjednika Vijeća bira ministar na osnovu prijedloga koje podnose rukovodioci tijela, kantonalnih organa uprave, organizatora obrazovanja odraslih, poslovno-stručnih organizacija, sindikata, udruženja poslodavaca, nevladinog sektora i predstavnika lokalne samouprave.
- (3) Način rada Vijeća za obrazovanje odraslih utvrđuje se poslovníkom.
- (4) Članovi Vijeća za obrazovanje odraslih imaju pravo na naknadu za svoj rad, a visinu naknade utvrdit će Vlada Kantona.

#### **Član 35.**

##### **(Program obrazovanja odraslih)**

- (1) Program obrazovanja odraslih (u daljnjem tekstu: Program obrazovanja) je dokument koji donosi Ministarstvo, na prijedlog organizatora obrazovanja odraslih i drugih zainteresovanih subjekata, ako je riječ o formalnom obrazovanju odraslih.
- (2) Program neformalnog javnovažećeg obrazovanja odraslih donosi Ministarstvo na prijedlog organizatora obrazovanja odraslih i drugih zainteresovanih subjekata, a njime se utvrđuju obrazovni ciljevi, sadržaji i ishodi učenja koji su predviđeni tim programom.
- (3) Program neformalnog obrazovanja odraslih donosi organizator obrazovanja odraslih, a njime se utvrđuju obrazovni ciljevi, sadržaji i ishodi učenja koji su predviđeni tim programom.
- (4) Programom obrazovanja određuju se oblasti i forme obrazovnog rada kao i metodičko - didaktička uputstva za njihovu realizaciju.
- (5) Program obrazovanja je prilagođen odgovarajućem stepenu i sadržaju obrazovanja.

#### **Član 36.**

##### **(Svrha programa obrazovanja)**

Obrazovanje odraslih obuhvata programe obrazovanja kojima odrasli stiču elementarnu funkcionalnu pismenost, ključne i stručne kompetencije i kvalifikacije potrebne za lični i profesionalni razvoj, radi zapošljavanja i društveno odgovornog ponašanja, odnosno dopunu kompetencija ili dijelova kompetencija.

#### **Član 37.**

##### **(Sadržaj programa obrazovanja odraslih)**

- (1) Programom obrazovanja odraslih utvrđuje se:

- a) naziv programa;
  - b) obrazovni ciljevi i ishodi;
  - c) obrazovni sadržaji;
  - d) način i oblik izvođenja programa;
  - e) trajanje programa i način provjere ishoda učenja;
  - f) završetak programa i mogućnosti daljeg napredovanja i usavršavanja radi horizontalne i vertikalne prohodnosti;
  - g) školska ili stručna sprema ili zanimanje ili opis znanja, vještina i sposobnosti koje se stiču završetkom programa;
  - h) uslovi za upis;
  - i) kadrovski, didaktički i prostorni i drugi uslovi za realizaciju programa;
  - j) kadrovski potencijali za realizaciju nastavnih sadržaja;
  - k) praćenje, vrednovanje i evaluacija programa i postignuća.
- (2) Program obrazovanja odraslih može se prilagoditi ciljnoj grupi.

### **Član 38.**

#### **(Zahtjev za odobravanje realizacije novih programa obrazovanja)**

- (1) Zahtjev za odobravanje realizacije novih formalnih i/ili neformalnih javnovažećih programa obrazovanja odraslih organizator obrazovanja odraslih podnosi Ministarstvu.
- (2) Uz zahtjev se prilažu:
- a) programi obrazovanja odraslih;
  - b) dokaz o kompetencijama stručnih lica koji realizuju programe obrazovanja odraslih;
  - c) dokaz o posjedovanju adekvatnog prostora, opreme i nastavnih sredstava;
  - d) dokaz o posjedovanju materijalnih sredstava za izvođenje programa obrazovanja odraslih; i

- e) dokaz o uplati naknade na ime troškova provođenja postupka provjere ispunjenosti uslova za izvođenje novih programa obrazovanja.
- (3) Rješenje o ispunjenosti uslova za realizaciju novih programa obrazovanja odraslih donosi ministar.
- (4) Pravilnik kojim se preciznije uređuje proces i način provjere ispunjenosti uslova za rad i realizaciju novih programa obrazovanja donosi Ministar uz prethodnu saglasnost Vlade.
- (5) Odluku o visini naknade iz stava (2) tačka e) ovog člana donosi ministar.

### **Član 39.**

#### **(Programi formalnog obrazovanja odraslih)**

Programi formalnog obrazovanja odraslih obuhvataju:

- a) programe za sticanje osnovnog obrazovanja;
- b) programe za sticanje srednjeg stručnog obrazovanja;
- c) programe prekvalifikacije; i
- d) programe dokvalifikacije.

### **Član 40.**

#### **(Realizacija programa formalnog obrazovanja odraslih)**

- (1) Programi formalnog obrazovanja odraslih se realizuju kroz:
- a) redovnu nastavu;
  - b) konsultativno-instruktivnu nastavu;
  - c) online nastavu;
  - d) praktični rad; i
  - e) druge primjerene načine nastave.
- (2) Polaznici su obavezni prisustvovati redovnoj nastavi.
- (3) Za polaznike formalnog obrazovanja odraslih koji nisu u mogućnosti svakodnevno prisustvovati redovnoj nastavi, organizuje se konsultativno-

instruktivna nastava, koja u programima za sticanje osnovnog i srednjeg obrazovanja, odnosno prekvalifikacije i dokvalifikacije može biti zastupljena sa najviše 30% (trideset posto) od ukupno predviđenog trajanja nastave.

- (4) Konsultativno - instruktivna nastava se provodi putem grupnih i individualnih konsultacija.
- (5) Online nastava se organizuje za polaznike obrazovanja koji su se, zbog fizičke i prostorne udaljenosti, opredijelili za samostalno učenje i može se provoditi ako za to postoje organizacijski i tehnički uslovi, te osiguran odgovarajući nastavni materijal i mentorski rad s polaznikom što će biti regulisano posebnim pravilnikom kojeg donosi ministar.
- (6) Praktični rad se izvodi u fondu sati predviđenih programom obrazovanja odraslih odobrenim od strane ministarstva. Praktični rad se može izvoditi u objektu organizatora programa obrazovanja odraslih, kod poslodavca koji ispunjava uvjete predviđene programom obrazovanja odraslih ili drugog organizatora programa obrazovanja odraslih, pri čemu se međusobni odnosi organizatora obrazovanja odraslih, poslodavaca i polaznika regulišu ugovorom.
- (7) Organizatori obrazovanja odraslih dužni su voditi evidencije o održanoj nastavi.
- (8) Sadržaj i način vođenja evidencije o održanoj nastavi iz stava (7) ovog člana propisuje ministar uz prethodnu saglasnost Vlade.

#### **Član 41.**

##### **(Programi neformalnog obrazovanja odraslih)**

- (1) Programe neformalnog obrazovanja odraslih donosi organizator

obrazovanja odraslih bez saglasnosti Ministarstva.

- (2) Program neformalnog obrazovanja odraslih, ukoliko je od posebnog interesa za Kanton, odnosno u slučaju odgovora na hitne potrebe tržišta rada, a pa osnovu podnesenog zahtjeva zainteresiranih privrednih subjekata i drugih lica, odlukom Ministarstva može postati javno važeći neformalni program obrazovanja odraslih.
- (3) Ministarstvo uz prethodnu saglasnost Vlade će u roku od 6 (šest) mjeseci od dana stupanja na snagu ovog zakona donijeti Pravilnik o uslovima i načinu obuke odraslih u cilju odgovora na hitne potrebe tržišta rada.

#### **Član 42.**

##### **(Privredna komora i udruženja poslodavaca)**

- (1) Privredna komora i udruženja poslodavaca predlažu zanimanja za koja se pripremaju odgovarajući programi iz člana 35. ovog zakona.
- (2) Privredna komora i udruženja poslodavaca:
  - a) organizuju savjetovanja i specijalizacije za zaposlene;
  - b) učestvuju u koncipiranju programa učenja uz rad;
  - c) predlažu standarde praktičnih znanja;
  - d) predlažu programe usavršavanja i osposobljavanja;
  - e) vode registar poslodavaca kod kojih se obavlja praktični rad;
  - f) jednom godišnje ili po potrebi i češće dostavljaju Ministarstvu spisak poslodavaca kod koji se obavlja praktični rad.
- (3) Verifikacija poslodavaca kod kojih se obavlja praktični rad, sadržaj i način vođenja registra poslodavaca utvrđuje se pravilnikom koji donosi ministar na prijedlog Privredne komore.

**Član 43.****(Programi obrazovanja odraslih koji se realizuju kroz praktični rad)**

- (1) Programi obrazovanja odraslih koji se realizuju kroz praktični rad mogu se ostvariti kod organizatora obrazovanja odraslih, kod drugog organizatora obrazovanja ili poslodavca.
- (2) Ako se praktični rad izvodi u objektima koji ne pripadaju organizatoru obrazovanja odraslih, međusobna prava i obaveze organizatora obrazovanja odraslih i drugog organizatora obrazovanja ili poslodavca uređuju se ugovorom, a međusobna prava polaznika obrazovanja i drugog organizatora obrazovanja ili poslodavca ugovorom o praktičnom radu.

**Član 44.****(Osposobljavanje odraslih kod poslodavaca)**

- (1) Poslodavac može, radi prilagođavanja tržišnim zahtjevima i promjenama, novim tehnološkim i radnim procesima, organizovati različite oblike osposobljavanja odraslih i usavršavanja zaposlenih.
- (2) Lica iz stava (1) ovog člana mogu stečene kompetencije ili dio kompetencije dokazati polaganjem ispita kojeg provodi Komisija u skladu s članom 14. stav (2) ovog zakona.

**Član 45.****(Validacija)**

- (1) Validacija je postupak u kojem se od strane nadležne institucije odnosno tijela provjeravaju i potvrđuju ishodi prethodnog učenja polaznika, prema unaprijed utvrđenim kriterijima i standardima provjere.
- (2) Ishodi iz stava (1) ovog člana koje je odrasli stekao kroz prethodno učenje, formalno, neformalno obrazovanje,

učenje kroz životno i radno iskustvo (informalno učenje i samousmjerenom učenje) mogu se provjeriti i potvrditi kroz postupak validacije prethodnog učenja.

- (3) Odrasli mogu dokazati znanja, vještine i sposobnosti, neovisno o načinu na koji su stečena, polaganjem ispita.
- (4) Ispite iz stava (3) ovoga člana organizuje i provodi organizator obrazovanja odraslih koji izvodi program za sticanje istih znanja, vještina i sposobnosti i koji dobije ovlaštenje Ministarstva za provođenje ispita.
- (5) Za organizovanje ispita iz stava (4) ovog člana organizator obrazovanja odraslih formira komisiju stručnjaka čije su stručne kompetencije propisane programom obuke.
- (6) Komisija iz stava 5 ovog člana ima tri člana.
- (7) Ministarstvo u saradnji sa ostalim nadležnim obrazovnim vlastima u Bosni i Hercegovini osigurava neophodne pretpostavke za uspostavu sistema validacije prethodnog učenja, kao integralnog dijela kvalifikacijskog okvira u Bosni i Hercegovini.

**Član 46.****(Godišnji program rada)**

- (1) Na osnovu Programa obrazovanja odraslih, organizator obrazovanja odraslih koji vrši formalno obrazovanje odraslih, donosi godišnji program rada za svaku školsku godinu, najkasnije do 30. septembra tekuće godine.
- (2) Organizatori obrazovanja odraslih koji vrše neformalno javno važeće obrazovanje odraslih, donose godišnji program rada za svaku kalendarsku godinu, najkasnije do 31. januara tekuće godine.



**Član 47.****(Publikacija programa obrazovanja)**

- (1) Registrovani programi obrazovanja odraslih se objavljuju u publikacijama, u printanom ili elektronskom obliku.
- (2) Publikacije iz stava 1 ovog člana moraju biti dostupne zainteresovanim polaznicima obrazovanja odraslih i široj javnosti.
- (3) Organizatori obrazovanja odraslih obavezni su na svojoj zvaničnoj internet stranici objaviti podatke o registrovanim programima koje realizuju s ciljem informisanja javnosti.
- (4) Podaci iz stava (3) ovog člana treba da sadrže: naziv programa, broj rješenja o odobrenju izvođenja programa, trajanje programa i uvijete za upis.

**Član 48.****(Stručna lica za realizaciju programa obrazovanja odraslih)**

- (1) Andragoški radnici su lica koja su andragoški osposobljena da izvode programe obrazovanja odraslih ili osiguravaju stručnu podršku i pomoć u njihovoj realizaciji, a to su:
  - a) izvođači programa obrazovanja odraslih i to: učitelji, nastavnici, profesori, predavači, voditelji, treneri i instruktori praktične nastave;
  - b) stručni saradnici i saradnici.
- (2) Uslovi u pogledu kvalifikacija i kompetencija andragoškog radnika definišu se odgovarajućim programom obrazovanja koji donosi ministar.
- (3) Andragoški radnici imaju pravo i obavezu stalnog stručnog usavršavanja.
- (4) Organizator obrazovanja odraslih obavezan je jednom godišnje organizirati andragoško stručno usavršavanje za svoje uposlenike u minimalnom trajanju od 12 nastavnih sati.

- (5) Minimalan broj stalno zaposlenih radnika kod organizatora obrazovanja odraslih propisat će se Standardima i normativima.
- (6) Ministarstvo osigurava sistemski rješenja i institucionalni okvir za njihovo andragoško – metodičko - didaktičko osposobljavanje i usavršavanje, kao i za profesionalno napredovanje.

**POGLAVLJE V. OBRAZOVANJE I OSPOSOBLJAVANJE ZA OBAVLJANJE OBRTA I SRODNIH DJELATNOSTI****Član 49.****(Obrazovanje za obrt)**

- (1) Obrazovanje odraslih za obavljanje obrta i srodnih djelatnosti za koje se traži odgovarajuća školska sprema vrši se u osnovnim, odgovarajućim srednjim školama i visokoškolskim ustanovama.
- (2) Obrazovanje za obavljanje obrta i srodnih djelatnosti za koje je majstorski ispit predviđen kao daljnja kvalifikacija izvodi se prema programu kojeg donosi ministar na prijedlog srednje stručne škole i Obrtničke komore.

**Član 50.****(Pomoćnički i majstorski ispit i ispit za obavljanje obrta)**

- (1) Polaganje pomoćničkih i majstorskih ispita i ispita o stručnoj osposobljenosti za obavljanje vezanih obrta vrši se u skladu sa odredbama Zakona o obrtu i srodnim djelatnostima Federacije Bosne i Hercegovine.
- (2) Majstorskom ispitu mogu pristupiti lica, koja su završila odgovarajuću srednju stručnu školu i imaju najmanje dvije godine radnog iskustva u obrtu za koji žele polagati majstorski ispit, kao i lica sa neodgovarajućom

srednjom školom i najmanje pet godina radnog iskustva u obrtu za koji žele polagati majstorski ispit.

- (3) Naziv, sadržaj i oblik isprave koja se stječe polaganjem ispita iz stava (1) ovog člana, te nadzor nad zakonitošću i provođenje ispita provodi se u skladu sa odredbama Zakona o obrtu i srodnim djelatnostima Federacije Bosne i Hercegovine.

## **POGLAVLJE VI. ORGANIZACIJA RADA NA OBRAZOVANJU ODRASLIH**

### **Član 51.**

#### **(Rokovi formalnog i neformalnog javno važećeg programa obrazovanja odraslih)**

- (1) Organizator formalnog obrazovanja odraslih svoje aktivnosti provodi u rokovima i u skladu s važećim zakonima koji uređuju oblast iz koje se vrši obrazovanje.
- (2) Realizacija programa za sticanje osnovnog obrazovanja za odrasle traje za prvi (I), drugi (II), treći (III), četvrti (IV) i peti (V) razred po tri mjeseca, za šesti (VI), sedmi (VII), osmi (VIII) i deveti (IX) razred po četiri mjeseca.
- (3) Ministar uz prethodnu saglasnost Vlade će posebnim pravilnikom propisati način organizovanja, provođenja, dužinu trajanja, potrebni fond sati za sticanje srednje stručne sprema, program prekvalifikacije, program dokvalifikacije, javno važeći program obrazovanja odraslih osposobljavanja i brze obuke za hitne potrebe tržišta rada .
- (4) Neformalno javnovažeće obrazovanje odraslih se provodi, prema iskazanoj potrebi, tokom cijele godine u skladu s programom obrazovanja i ovim zakonom.

### **Član 52.**

#### **(Aktivnosti na realizaciji Plana i programa obrazovanja odraslih)**

Realizacija Plana i programa obrazovanja od strane organizatora obrazovanja odraslih odvija se kroz slijedeće aktivnosti:

- a) objavljivanje javnog konkursa za realizaciju odgovarajućih programa obrazovanja odraslih;
- b) upis polaznika;
- c) realizaciju Plana i programa obrazovanja;
- d) praćenje izvođenja programa obrazovanja i preduzimanje mjera koje su potrebne za unapređivanje te djelatnosti;
- e) planiranje sredstava za finansiranje programa obrazovanja;
- f) organizovanje ispita i provjera ostvarivanja planiranih obrazovnih ishoda znanja; i
- g) izdavanje javnih isprava.

### **Član 53.**

#### **(Sadržaj i postupak provođenja javnog konkursa)**

- (1) Upis polaznika za obrazovanje odraslih vrši se javnim konkursom, koji objavljuje organizator obrazovanja odraslih.
- (2) Javni konkurs raspisuju organizatori obrazovanja odraslih, a najviše tri puta u toku jedne kalendarske godine;
- (3) Pored općih i posebnih uslova utvrđenih programom obrazovanja, konkurs sadrži i:
  - a) broj kandidata koji se mogu upisati;
  - b) kriterije i mjerila za utvrđivanje redosljeda prijema kandidata;
  - c) rok za predaju prijava;
  - d) rok za objavu rezultata;
  - e) pouku o pravnom lijeku;

- f) broj i naziv akta o odobravanju izvođenja programa obrazovanja;
  - g) način realizacije programa obrazovanja i forme nastave;
  - h) trajanje programa obrazovanja i uslove za njegovo završavanje;
  - i) naziv i pravnu prirodu javne isprave koja se izdaje po završetku programa obrazovanja;
  - j) visinu školarine i ostalih troškova po pojedinom polazniku obrazovanja, odnosno po ispitu; ukoliko obrazovanje nije finansirano ili sufinansirano iz javnih prihoda;
  - k) spisak potrebne dokumentacije za upis.
- (4) Ako se na konkurs prijavi više kandidata u odnosu na broj naznačen u javnom konkursu, organizator programa obrazovanja je dužan da prilikom izbora kandidata uzima u obzir stepen ispunjenosti uslova u pogledu prethodnog obrazovanja, iskustva diskriminacije uz obavezu davanja prednosti kandidatima koji pripadaju boračkoj populaciji u skladu sa Zakonom o dopunskim pravima porodica poginulih boraca i ratnih vojnih invalida.
- (5) Uslove upisa u neformalne programe obrazovanja odraslih određuje organizator obrazovanja odraslih, a upis se vrši putem oglašavanja, ili na osnovu neposrednog dogovora, odnosno sporazuma između organizatora obrazovanja odraslih i zainteresovanih poslodavaca ili pojedinaca.

#### **Član 54.**

##### **(Ugovor o obrazovanju)**

- (1) Prilikom upisa u program obrazovanja odraslih, organizator obrazovanja odraslih je dužan zaključiti sa

polaznikom ugovor o obrazovanju, kojim uređuje međusobna prava i obaveze tokom trajanja obrazovanja.

- (2) U ugovoru su obavezno sadržane odredbe o:
- a) nazivu, vremenu trajanja i načinu završetka programa, kao i vrsti isprave koja se polazniku izdaje po uspješno završenom programu;
  - b) oblicima realizacije obrazovnog procesa i mjestu njegovog realizovanja;
  - c) visini školarine i opisu troškova obrazovanja koji su uključeni u školarinu;
  - d) pravima i obavezama polaznika za vrijeme obrazovanja, kao i načinu prestanka statusa polaznika;
  - e) pravima i obavezama organizatora obrazovanja odraslih u pogledu realizacije obrazovnog procesa, kao i u slučaju prestanka rada;
  - f) uslovima raskida ugovora.
- (3) Status polaznika prestaje završetkom programa, ispisivanjem iz programa ili iz drugih razloga predviđenih ugovorom o obrazovanju ili drugim aktima.

#### **Član 55.**

##### **(Polaznik obrazovanja)**

Odrasli koji se upisuju u program obrazovanja za odrasle stiču status polaznika obrazovanja odraslih, a status kandidata uključivanjem u postupak priznavanja prethodnog učenja.

#### **Član 56.**

##### **(Ocjenjivanje polaznika)**

- (1) Ocjenjivanje polaznika obrazovanja odraslih za sticanje osnovnog i srednjeg obrazovanja vrši se u skladu s propisima i standardima koji regulišu te oblasti obrazovanja.

- (2) Polazniku koji uspješno završi program obrazovanja izdaje se javna isprava u skladu s ovim zakonom.

### **Član 57.**

#### **(Certificiranje i izdavanje javnih isprava)**

- (1) Certificiranjem, odnosno izdavanjem odgovarajućih isprava o obrazovanju se potvrđuje da su ishodi učenja, odnosno kompetencije ili dijelovi kompetencija koje je pojedinac stekao kroz formalni i neformalno obrazovanje/ili informalno učenje provjereni i potvrđeni od strane nadležne institucije, odnosno tijela, u skladu s utvrđenim kriterijima i standardima.
- (2) Nakon završetka formalnih programa obrazovanja odraslih: osnovnog i srednjeg obrazovanja ili dokvalifikacije i prekvalifikacije, polaznicima se izdaju javne isprave, svjedodžbe i diplome koje imaju istu važnost kao i isprave stečene tokom redovnog obrazovanja.
- (3) Nakon završetka neformalnog javnovažećeg programa obrazovanja odraslih: osposobljavanja ili usavršavanja, polaznicima se izdaju javnovažeća uvjerenja o završenim programima osposobljavanja i usavršavanja.
- (4) Polaznicima programa neformalnog obrazovanja, nakon završetka programa provjere znanja, vještina i sposobnosti, organizator obrazovanja odraslih o tome izdaje uvjerenje, potvrdu, certifikat ili drugu ispravu, koja nema status javne isprave.
- (5) Ukoliko nakon završetka neformalnog programa nije bilo provjere znanja, vještina i sposobnosti, polaznicima se mogu izdati potvrde ili druge isprave koje nemaju status javnih isprava, ali iz kojih je evidentno da su bili učesnici određenog programa neformalnog obrazovanja, kao i sticanje kojih znanja, vještina i sposobnosti je bilo predviđeno programom.

- (6) Nazivi, forma i sadržaji javnih isprava koje se stiču u sistemu obrazovanja odraslih uređuju se podzakonskim aktom koji donosi ministar uz prethodnu saglasnost Vlade.

### **Član 58.**

#### **(Provođenje ispita)**

Ministar uz prethodnu saglasnost Vlade pravilnikom propisuje način organiziranja i provođenja ispita iz člana 14. stav (2) ovog zakona, kao i formu i sadržaj javnih isprava za certificiranje prethodno stečenog znanja.

## **POGLAVLJE VII. FINANSIRANJE**

### **Član 59.**

#### **(Značaj i sredstva za finansiranje obrazovanja odraslih)**

- (1) Obrazovanje odraslih je zajednička odgovornost Kantona, jedinica lokalne samouprave, poslodavaca, zaposlenika, Privredne komore, naučno - istraživačkih i obrazovnih institucija i pojedinaca (u daljnjem tekstu: akteri).
- (2) Finansiranje obrazovanja odraslih vrši se iz: javnih prihoda; sredstava poslodavaca; sredstava polaznika; sredstava fondova Evropske unije; donacija i drugih izvora u skladu s Planom obrazovanja iz člana 33. ovog zakona.
- (3) U okviru uspostavljenog međusektorskog partnerstva i socijalnog dijaloga, svi akteri dijele zajedničku odgovornost za finansiranje obrazovanja odraslih i u tom smislu, u okviru svojih nadležnosti, predlažu i preduzimaju konkretne akcije i mjere na planu unapređenja postojećih zakonodavstava i razvijanja adekvatnih strategija i modela za dugoročno i održivo finansiranje obrazovanja odraslih.

- (4) Akcije i mjere iz stava 3 ovog člana su naročito usmjerene na:
- jačanje odgovornosti vladinog sektora za finansiranje obrazovanja odraslih;
  - kreiranje stimulativnih poreskih politika i uvođenje drugih poticajnih mjera za poslodavce i druge subjekte koji ulažu u obrazovanje odraslih;
  - uspostavu namjenskih fondova u području obrazovanja odraslih;
  - osiguranje adekvatne infrastrukturne podrške obrazovanju odraslih;
  - osiguranje veće finansijske slobode za javne obrazovne ustanove koje su organizatori obrazovanja odraslih, s ciljem jačanja njihove tržišne konkurentnosti;
  - uspostavu adekvatne politike sufinansiranja organizatora neformalnog obrazovanja; i
  - osiguranje različitih oblika i mehanizama finansijske podrške pojedincima koji se uključuju u proces obrazovanja odraslih.

#### **Član 60.**

##### **(Nosioци troškova programa obrazovanja)**

- Troškovi za sticanje osnovnog obrazovanja za odrasle koji imaju stalno mjesto prebivališta u Kantonu osiguravaju se iz sredstava budžeta Unsko - sanskog kantona, Službe za zapošljavanje, poslodavaca, pojedinaca i drugih izvora.
- Za lica koja se nalaze na evidenciji nezaposlenih lica Službe za zapošljavanje, a koja imaju najviše završen četvrti (IV) stepen obrazovanja i koja su na prijedlog Službe za zapošljavanje upućeni na obuku javno priznatih programa obrazovanja odraslih, obuku lica s invaliditetom i verifikaciju informalno

stečenih znanja i vještina, nosilac troškova obrazovanja je Služba za zapošljavanje.

- Za sticanje ostalih vidova obrazovanja i osposobljavanja odraslih troškove obrazovanja snose polaznici programa obrazovanja, poslodavci, zavod, odnosno službe za zapošljavanje ili druga zainteresovana pravna i fizička lica.

#### **Član 61.**

##### **(Sredstva koja se osiguravaju budžetom Kantona)**

- U Budžetu Kantona obavezno se osiguravaju sredstva za:
  - troškove realizacije programa osnovnog obrazovanja odraslih u ustanovama čiji je osnivač Skupština Unsko - sanskog kantona;
  - troškove praćenja, unapređivanja i razvoja obrazovanja odraslih.
- U Budžetu Kantona mogu se osigurati sredstva za troškove izvođenja programa srednjoškolskog obrazovanja odraslih koji imaju završenu samo osnovnu školu, te druge programe obrazovanja u skladu s Planom obrazovanja iz člana 33. ovog Zakona.

#### **Član 62.**

##### **(Sredstva koja osigurava jedinica lokalne samouprave)**

- U Budžetu jedinice lokalne samouprave osiguravaju se sredstva za:
  - investicije i investicijsko održavanje u ustanovama za obrazovanje odraslih kojima je osnivač;
  - materijalne troškove poslovanja u svrhu obavljanja djelatnosti obrazovanja odraslih u ustanovama za obrazovanje odraslih kojima je osnivač.

- (2) U Budžetu lokalne samouprave mogu se osigurati sredstva za troškove izvođenja programa.

### **Član 63.**

#### **(Akt o utvrđivanju cijene troškova programa obrazovanja)**

- (1) Cijene troškova obrazovanja odraslih i provjere znanja utvrđuju se posebnim aktom koji donosi organizator programa obrazovanja.
- (2) Saglasnost na akt iz stava (1) ovog člana za organizatore obrazovanja odraslih čiji je osnivač Skupština Unsko - sanskog kantona, a koji provode formalno obrazovanje odraslih daje Ministarstvo uz prethodnu saglasnost Vlade.

## **POGLAVLJE VIII. NADZOR I PREKRŠAJNE ODREDBE**

### **Član 64.**

#### **(Nadzor)**

- (1) Upravni nadzor nad radom organizatora obrazovanja odraslih provodi Ministarstvo najmanje jednom u toku pet godina, a po potrebi i češće.
- (2) Stručno - andragoški nadzor, s ciljem organizovanog praćenja obrazovanja odraslih vrši Pedagoški zavod Unsko - sanskog kantona.
- (3) Stručno - andragoški nadzor vrši se najmanje jednom u toku dvije godine, a po potrebi i češće i ima andragoško - instruktivni karakter.
- (4) Inspeksijski nadzor nad primjenom Zakona i drugih propisa iz oblasti obrazovanja odraslih vrši Kantonalna uprava za inspeksijske poslove Unsko - sanskog kantona.
- (5) Ukoliko se u postupku nadzora utvrdi da je obrazovanje odraslih provedeno u suprotnosti sa odredbama ovog zakona,

Ministarstvo će poništiti izdate javne isprave i oglasiti ih nevažećim u Službenom glasniku Unsko - sanskog kantona.

### **Član 65.**

#### **(Novčana kazna od 2.000 do 10.000 KM i zabrana izvođenja programa)**

- (1) Novčanom kaznom u iznosu od 2.000 do 10.000 KM kaznit će se za prekršaj organizator obrazovanja odraslih koji:
- počne obavljati djelatnost obrazovanja odraslih prije donošenja rješenja o ispunjavanju uslova za osnivanje organizatora obrazovanja odraslih (član 25. ovog zakona);
  - ne obavlja djelatnost u skladu s programom obrazovanja (član 32. ovog zakona);
  - počne da realizuje nove programe obrazovanja prije donošenja rješenja o ispunjenosti uslova za realizaciju novih programa obrazovanja (član 38. ovog zakona);
  - je izdao javnu ispravu o završenom formalnom obrazovanju odraslih suprotno odredbama ovog Zakona (član 64. stav (5))
  - je izdao javnu ispravu o završenom neformalnom javnovažećem programu obrazovanja odraslih suprotno odredbama ovog Zakona. (član 64. stav (5))
- (2) Za prekršaje iz stava 1 ovog člana kaznit će se i odgovorno lice u organizatoru obrazovanja odraslih novčanom kaznom od 2.000 do 5.000 KM.
- (3) Za prekršaje iz stava (1) ovog člana organizatoru obrazovanja odraslih izriče se zaštitna mjera trajne zabrane

izvođenja programa obrazovanja odraslih i briše se iz Registra obrazovanja odraslih.

#### **Član 66.**

##### **(Novčana kazna od 1.000 do 5.000 KM i privremena zabrana izvođenja programa)**

- (1) Novčanom kaznom od 1.000 do 5.000 KM kaznit će se za prekršaj organizator obrazovanja odraslih ako:
  - a) suprotno članu 28. ovog zakona propusti voditi dokumentaciju i evidenciju o završenom obrazovanju odraslih po javno važećim programima;
  - b) ne vodi baze podataka iz člana 29. ovog zakona;
  - c) ne obavlja djelatnost u skladu s programom obrazovanja iz članova 32., 33., 35., 39., 40., 41., 42., 43. i 44. ovog zakona;
  - d) ne zaključi ugovor s polaznikom u skladu s članom 54. stavom (1) ovog zakona ili propusti da to uradi pravovremeno i uredno;
  - e) postupi suprotno članu 52. stav (2) ovog zakona;
  - f) izvrši naplatu troškova za sticanje osnovnog obrazovanja od polaznika obrazovanja suprotno članu 61. stavu (1) ovog zakona.
- (2) Za prekršaje iz stava (1) ovog člana kaznit će se i odgovorno lice u organizatoru obrazovanja odraslih novčanom kaznom od 1.000 do 3.000 KM.
- (3) Za prekršaje iz stava (1) ovog člana organizatoru obrazovanja odraslih mogu se izreći i zaštitne mjere zabrane izvođenja programa obrazovanja u trajanju od jedne do tri godine.

## **POGLAVLJE IX. PRELAZNE I ZAVRŠNE ODREDBE**

#### **Član 67.**

##### **(Usklađivanje akata)**

- (1) Organizatori obrazovanja odraslih koji su registrovani na području Kantona dužni su u roku od godinu dana od dana stupanja na snagu ovog zakona podnijeti zahtjev za ponovni upis u novi Registar koji će voditi Ministarstvo i uskladiti svoja opća akta s ovim zakonom.
- (2) Organizatori obrazovanja odraslih koji u zadanom roku iz stava (1) ovog člana ne podnesu zahtjev za ponovni upis u novi Registar neće moći provoditi programe obrazovanja odraslih za koje su prethodno dobili odobrenje ovog Ministarstva.

#### **Član 68.**

##### **(Obaveze Vlade)**

Vlada je dužna, u roku od godinu dana od dana stupanja na snagu ovog zakona, donijeti srednjoročni trogodišnji Plan obrazovanja iz člana 33. stav (2).

#### **Član 69.**

##### **(Rok za uspostavljanje Registra)**

Ministarstvo je dužno, u roku od 60 dana od dana stupanja na snagu ovog zakona, donijeti pravilnik o izgledu i načinu vođenja Registra i uspostaviti i ažurno voditi Registar iz člana 26. ovog zakona.

#### **Član 70.**

##### **(Rok donošenja podzakonskih akata)**

Ministarstvo uz prethodnu saglasnost Vlade će u roku od šest mjeseci od dana stupanja na snagu ovog zakona, donijeti sljedeće pravilnike:







**SADRŽAJ****SKUPŠTINA UNSKO-SANSKOG KANTONA**

- |  |           |  |           |
|--|-----------|--|-----------|
| <b>463.</b> Zakon o oružju i municiji Unsko -<br>sanskog kantona   | <b>1</b>  | <b>466.</b> Zaključak Skupštine Unsko -<br>sanskog kantona broj: 01-02-4-<br>327/21 od 19. 5. 2021. godine | <b>73</b> |
| <b>464.</b> Zakon o obrazovanju odraslih   | <b>48</b> | <b>467.</b> Zaključak Skupštine Unsko -<br>sanskog kantona broj: 01-02-4-<br>328/21 od 19. 5. 2021. godine | <b>73</b> |
| <b>465.</b> Zaključak Skupštine Unsko -<br>sanskog kantona broj: 01-02-4-<br>325/21 od 19. 5. 2021. godine | <b>72</b> |  |           |

**OBAVJEŠTENJE**

Obavještavamo pravna i fizička lica, dosadašnje pretplatnike, kao i lica koja žele da se pretplate za „Službeni glasnik Unsko-sanskog kantona“ za ovu godinu, da godišnja pretplata iznosi 200 KM, za elektronsku verziju jednog broja (CD) 10 KM, a za internet izdanje 100 KM a može se izvršiti na račun broj 338002210005877 u korist budžeta USK-a, vrsta prihoda 722631, budžetska organizacija 3201001, identifikacijski broj 4263249630000. Izdavač: Vlada Unsko-sanskog kantona, Ulica Alije Đerzeleza broj 2 Bihać; Telefon 316-000 Za izdavača: Šefik Veladžić; Redakcija tel. 316-018, 316-003 i pretplata: tel. 316-001, fax 227-796